













ROMANISED EDITION.

## SELECTIONS

FROM THE

# HISTORY OF INDIA

FOR

EXAMINATIONS BY THE LOWER STANDARD,  
IN URDU

ADAPTED BY

THE SECRETARY TO THE BOARD OF EXAMINERS,  
FORT WILLIAM,

FROM THE WAQI'AT-I-HIND,

AND PUBLISHED

UNDER THE AUTHORITY OF THE GOVERNMENT  
OF INDIA.



CALCUTTA :

OFFICE OF THE SUPERINTENDENT OF GOVERNMENT PRINTING, INDIA.

1898.

*Printed by permission of the Proprietors of the Newal Kishore Press,  
Lucknow and Lahore.*

*Price Re. 1 As. 4 or 1s. 8d.*

17973

✓  
✓

N.R.

CALCUTTA :  
GOVERNMENT OF INDIA CENTRAL PRINTING OFFICE.  
8, HASTINGS STREET.

## PREFACE.

---

THESE selections from the History of India have been prepared by the Secretary to the Board of Examiners under the orders of the Government of India.

The *Wāqī'āt-i-Hind* published at Lucknow has been adopted as the text-book with certain alterations and additions, Messrs. Newal Kishore, who were the owners of the copyright, having waived their claims, and having given full permission for the printing and publishing of the present Edition.

The thanks of the Board of Examiners are due to Messrs. Newal Kishore for thus facilitating the work of providing a suitable text-book.

GEORGE RANKING, M.D.,  
*Surgeon-Lieut.-Colonel,*  
*Secretary, Board of Examiners.*



I.—A Table showing the correspondence of the *vowels* in the Persian and Roman characters:—

a	آ or ا	i	ی or ا	ū	اُ or اُو
ā	آ or ا *	ī	ای or اِ *	e	اے or اِ
au	اُ or اُو	o	او or اَو *		
ai	ای or اِ	u	اُ or اُو		

\* In the middle of a word as مادر *mādar*, بوتل *botal*, بیبی *bībī*.

† This value of ی is when unaccompanied by either *fathah* or *kasrah* as مین *men*, کسر *kesar*, بیتا *betā*.

II.—A Table showing the correspondence of *consonants*:—

ب	b	د	d	ف	f
به	bh	ده	dh	ق	q
پ	p	ذ	z	ک	k
په	ph	ر	r	که	kh
ت	t	ره	rh	گ	g
ته	th	ر	r	که	gh
ت	t	ره	rh	ل	l
ته	th	ز	z	م	m
ث	s	ژ	zh	ن	n
ج	j	س	s	ن (nasal)	n
جه	jh	ش	sh	و or sometimes v	w
چ	ch	ص	s	ه or p, h	h
چه	chh	ض	z	—	—
ح	h	ط	t	ی (ي)	y
خ	kh	ظ	z	اُ	au
د	d	ع	—	ی	ā
ده	dh	غ	gh		

The following examples show the transliteration of:—

ء (Hamza) as قائل *qā'āl*.

ی as a consonant as یاقوت *yāqūt*, یوسف *yūsuf*, یاقین *yaqīn*.

Tanwīn *fathah* as اتقاتاً *ittāqān*, فوراً *fauran*, قطعاً *qat'an*.

Alif *maqṣūrah* as عقبی *'uqbā*, موسمی *musammā*.

ن (nasal) as مین *men*.



## MUQADDAMAH.



Zamānah-i-darāz se Bāgh-o-Bahār Fort William College ke kutub-i-niṣāb men dākhil thī: aur is men shubhah nahin ki kyā apnī zabān kī salāsat aur Dillī ki roz-marrah bol-chāl ke i'tibār se, aur kyā kaṣīru-l-isti'māl alfāz kī bahutāyat ke rū se, yih kitāb ek taur par Ṣāhibān-i-Angrez ke liye mufid thī; magar sāth hī is ke nuqṣ se bhī khālī na thī. Yih to ek wāziḥ amr hai, ki ek zabān, khwāh kisī jagah kī kyaun na ho, hamesha yak-sān nahin rahtī. Joṇ joṇ zamānah guzartā jātā hai, toṇ toṇ na'e na'e khayālāt ke paidā hone, na'e na'e mulkon ke logon ke sāth sābiqah hone se, zabān bhī ek nayā pīrāya ikhtiyār kartī jātī hai; ḥattā-ki chand ṣadiyon ke ba'd agar muqābalah kar ke dekho, to zabān wuh zabān hī nahin rahtī jo chand ṣadi peshtar murawwaj thī. Chhunānchi agar Shakespeare ke waqt kī Angrezī kā zamānah-'i-hāl kī Angrezī se muqābalah kar ke dekhā jā'e, to donon men āsmān o zamīn kā farq pāyā jā'egā. Pas lā-muḥālah Bāgh-o-Bahār kī bhī yihī ḥālat hū'ī. Ab se ko'ī sau baras qabl yih kitāb likhī ga'ī thī. Bahutere alfāz, beshtar muḥāwarāt, jo us waqt musta'mal the, ab bi-l-kull matrūk ho ga'e. Maṣalan, *āliyan thīn*, *jātiyan thīn* kī jagah ab *ātī thīn jātī thīn* bolte hain; pahle, *wuh* zamīr wāḥid ghā'ib, aur *we* jam' ghā'ib ke liye isti'māl karte the; ab wāḥid aur jam' donon ke liye *wuh* hī bolā jātā hai. Dūsre, is ke qisṣon kā uslūb, jinn o parī ke afsāne un ṣāhibān-i-wālā-shān ke mazāq ke bi-l-kull khilāf hain, jo raushan-khayāl aur Maghribī



tahzīb se bahra-mand haiṇ. Is liye Sarkār Daulat-madār-i-Inglishīya kā khayāl ek ‘arṣah se is jānib rujū‘ thā, ki is kitāb ko uṭhā kar ko’i aisī dusrī kitāb is kī jagah par jārī kī jā’e, jis kā pīrāya European ḥazarāt ke liye dil-chasp ho, aur khubiy-i-zabān ke ‘alāwah bāshindagān-i-Hind ke ḥālāt us meṇ hoṇ, jin se tāza-walāyat ṣāhiboṇ ko wāqifiyat hoṇi bahut zarūr hai.

Alḥamdu-li-llāh ki ab un shikāyatoṇ ke raf‘ karne kī ṣurat dikhā’i dī; aur inhīṇ bātoṇ ko madd-i-naẓar rakh kar Ḥuẓūr Faiz-ganjūr Surgeon-Lieutenant-Colonel Ranking Ṣāhib Bahādur, Secretary, Board of Examiners, Kalkatta, ne is kitāb Tārikh-i-Hindūstān ko jā-ba-jā se mufīd tarmīmeṇ kar ke Sarkār meṇ pesh kiyā; aur Sarkār Bahādur ne un kī tajwīz ko pasand kar ke Bāgh-o-Bahār kī jagah par is ko kitāb-i-niṣāb qarār denā manẓūr farmāyā. Aur ba-har-ḥāl, is bāt kā zikr kar denā bhī yahāṇ munāsib ma‘lūm hotā hai, ki Maṭba‘-i-Munshī Nawal Kishor, Lakhna’ū ke (jahāṇ yih kitāb pahle chhapī thī) mālīk ne maḥẓ rifāh-i-‘amm ke khayāl se is kitāb kā ḥaqq-i-taṣnīf bi-lā-‘iwāẓ Sarkār Bahādur ko de diyā, jis ke liye wuh qābil-i-āfrīṇ haiṇ.

KALKATTA,

*13wīṇ Aktūbar,*

*San 1897 ‘Isawī.*

## MUNTA<sup>II</sup>AB-I-TĀRĪKH-I-HINDUSTĀN.



‘Ajab nādān haiṁ wuh jin ko hai ‘ujb-i-tāj-i-sultānī;  
Falak bāl-i-humā ko pal meṁ sonpe hai magas-rānī.  
Nahīn ma‘lūm us ne khāk meṁ kyā kyā milāyā hai,  
Ki cbashm-i-naqsh-i-pā se tā ‘adam nikle na ḥairānī.

Mulk-i-Hindustān, jo Eshiyā meṁ bahut barā wasī‘ jazīrah-numā hai, is ṭaur par wāqī‘ hai, ki us ke shimāl meṁ Koh-i-Himāla (Koh-i-barf), aur junūb meṁ Baḥr-i-Hind, mashriq meṁ Barham-pūtar daryā aur Mulk-i-Barhmā hai, aur maghrib meṁ daryā-i-Sindh, jis ko Aṭak kahte haiṁ, bare zor se bahtā hai. Ṭūl is mulk kā Kashmir se le kar Rās Kumārī tak ek hazār nau sau mīl, aur arz Aṭak ke dahāne se un pabāron tak, jo Barhampūtar ke mashriq kī ṭaraf wāqī‘ haiṁ, ḍerh hazār mīl hai. Aur kull zamīn Hindustān kī bārah lākh murabba‘ mīl hai, aur chaudah karor se ziyādah ādmī is meṁ baste haiṁ.

### QADĀMAT.

‘Is amr meṁ mu‘arrikhon kā ikhtilāf hai, ki sab se awwal bāshinde de Hindustān ke kaun log the. Qaul-i-ghālib yih hai, ki Hindū log zamānah-‘i-qadīm se bāshinde is mulk ke haiṁ. Chunānchi isī wāṣṭe Mulk-i-Hind yā Hindustān is kā nām huā; aur Hindū hī zamānah-‘i-sābiq meṁ bādshāh is mulk ke the, jin kī ṣaḥīḥ aur ṣāf tārikh kisi ke pās maujūd nahīn hai.

Is kī wajh yih hai, ki Mā-warāu-n-Nahr ke bāshinde, ba-rāh-i-Panjāb ā kar qarīb Gangā ke jo base the, wuh kuchh aur hī boli bolte the. Us waqt na Sanskrit zabān thī, na Hindī. Jab un kī nasl pūṭailī aur jānīb-i-shimāl kī ābādī barh ga‘ī, to bare bare bahādur

jangī fauj le kar jānib-i-maghrib se in bāshindagān-i-Hindustān par chhā'ī kar ke ā'e; aur un ko maghlūb kar ke, aisā titar bitar kiyā, ki pahārōn men wuh log jā base. Us waqt na to kisī ko likhnā ātā thā ki ko'ī hāl likhtā, na koī shā'ir thā jo shī'r kahtā. In jangī logōn ke sāth Barahman bhī ā'e; unhoṅ ne yahān ke logōn ko ta'lim-i-zabānī kī. Us waqt tak bhī ko'ī mu'arrikh paidā na huā thā, na kisī ko waqāyī'-nawisi kā shauq thā: hān, shā'ir log albattah paidā ho ga'e the, jinhoṅ ne ba'z ba'z rāja ke gīt banā kar jāri kar diye, jo ki baṭaur kahāwat yā zarbu-l-maṣāl ke kuchh kuchh kisī ko yād rah ga'e. Un ke ba'd jo un kī nasl phailī, to unhoṅ ne yih khayāl kiyā, ki shāyad hazārōn baras kī kahāniyān in gīton men joṛī hū'ī hain, kuchh ma'lūm nahīn hotā ki kis zamāne kā yih hāl hai; is liye wuh ghalaṭī men par ga'e; aur tārīkh-i-mulūk par zulmat chhā ga'ī. Ek zamāne ke ba'd, jab Pandit log Sanskrit men kitāben taṣnif karne lage, to unhoṅ ne bhī kuchh taḥqīq o tadqīq kisī muqaddamah yā hāl yā waqā'ī' kī ka-mā-haqqubū na kī; balki shā'irāna taur par, jis qadr ho sakā, logōn ko ta'ajjub men ḍālne ke wāṣṭe mubālaghe ko kām farmāte rahe, tā-ki kahānī maze kī ho jā'e; aṣl hāl-i-tārīkhī zamāna-'i-qadīm kā kuchh na likhā. Is liye qadīm tārīkh Hindustān kī aisi ma'dūm ho ga'ī, ki us kā kuchh patā aur surāgh nahīn lag saktā. Yih i'tirāz shīr Hindustāniyōn par nahīn hai, balki 'umūman sab mulkōn par ho saktā hai. Khuṣūṣan Chīn aur Barhmā aur Mulk-i-Yūnān ke aṣlī bāshindōn ne bhī isī tarāḥ par apne mulk kī qadīm tārīkh gum kar di hai; aur aisi aisi behūda bāteṅ likh di hain, ki qat' nazar ḥairānī aur sar-gardānī ke, sāmi' yā qārī un nawishton ke darogh hone par zarā bhī shakk o shubhab nahīn kartā. Is liye qadīm tārīkh Hindustān kī banda bhī ka-mā-haqqubū nahīn likh saktā: magar chand mashhūr qadīm rājā'ōn kā hāl, jahān tak muṭābiq 'aql aur imkān ke saḥīḥ milegā mukhtaṣaran awwal ḥiṣṣah men darj karūngā. Is awwal ḥiṣṣah men shurū'-i-ābādiy-i-Hindustān se le kar ibtidā-i-'amal-dāriy-i-Englishiya tak ke ḥalāt likhe jā'enge; aur dūse ḥiṣṣah men Angrezī 'amal-dāri ke shurū' se tamām waqā' Hindustān ke, jo Kampanī kī 'amal-dāri men wāqī' hū'e hain, darj kīe jā'enge. Is liye yih kitāb do ḥiṣṣōn par shāmil hai.

## PAHLĀ HISSAH.

## HINDŪ'Ṇ KĀ RĀJ.

Kahte haiṇ ki Mahārāja Barhmā Jī ke do beṭe the; ek kâ nām Duchh, dūsre kâ, Uttir thā. Duchh se Sūraj paidā huā, jis se Sūraj-bansī Rājā'ṇ kâ khāndān Hindustān meṇ chālā. Aur Uttir se Som, ya'nī Chānd, paidā huā; us kī aulād meṇ jo rāja log paidā hū'e un ko Chandar-bansī kahte haiṇ. Ibtidā-i-ābādī meṇ pahle pahal Hindū'ṇ kâ dāru-s-saltānat Ajodhyā meṇ muqarrar huā thā, jis ko hamāre zamāne meṇ Mulk-i-Awadh kahte haiṇ. Wuh rāja, jo is qit'ah-'i-zamīn par hukūmat karte the, un ko Hindū log Sūraj-bansī, ya'nī Sūraj kī aulād, kahte haiṇ. B'ad-az-ān ek aur dāru-r-riyāsāt Prayāg y'anī Ilāh-ābād meṇ qarār pāyā; wahān ke rājā'ṇ ko Hindū log Chandar-bansī, ya'nī Chānd kī aulād, kahte haiṇ.

Sūraj-bansī khāndān meṇ sab se awwal Rāja Ikshwākū huā thā, jis ne apne nām par Ajodhyāpūrī basā kar apnī rāj-dbānī muqarrar kī. Ikshwākū se le kar Rāja Rām Chandar tak sattāwan rāja Awadh meṇ hukūmat kar chuke the; par in sab meṇ 'azīmu-sh-shān, mashhūr, aur nāmwar Rāja Rām Chandar, Rāja Dasrath ke beṭe, hū'e, jin kī buzurgī aur 'aẓmat aur qudrat aur babāduri kâ hāl Sanskrit kī kâ'ī pushṭakōṇ meṇ, khushūsan Vālmikī Rāmāyan meṇ muḥaṣṣal likhā hai. Rāja Rām Chandar ko Hindū Autār mānte haiṇ, aur un kâ honā Tretā jug meṇ likhte haiṇ. Rāja Rām Chandar Jī kī sauteli mātā, Keka'ī, ne Rāja Dasrath, apne khāwind, se do bāṭōṇ ke pūrā karne kâ bar māng rakhā thā. So jab Rām Chandar Jī ko rāj-tilak, ya'nī ṭikā wali-'ahdī kâ, milne lagā, tab Keka'ī ne Rāja Dasrath se do suwāl kiye: ek yih kī rāj-tilak Bharat Jī, us ke beṭe, ko mile; dūsre, Rām Chandar Jī chaudah baras ban-bās karen. Is bāt ko sun kar Rāja Dasrath bare ḥairān hū'e; na bachan se phirnā, na aise lā'iq bare beṭe ko haqq se mahṛūm rakhnā gawārā huā: kuchh ban na ā'ī, behchh hō ga'e. Is hāl ko dekh kar, Rām Chandar Jī ne apnī mātā ke manshā kī ta'mil aur apne pitā ke iqrār kī takmil apnī sa'adat samjhi, aur chaudah baras kâ ban-bās apne ūpar ikhtiyār

kiyā. Aur Sītā Jī, un kī rānī, aur Lachhman Jī (Lakshman), un ke chhōṭe bhāī, un ke sāth rahe. Isī ban-bās meṁ Lankā (Sīlān) kā rāja, Rāwan, faqīr kā bhes banā kar aur mauqā' pā kar Sītā Jī ko har kar ya'nī ohorā kar le gayā. Wajh is kī yih bayān karte haiṁ, kī Sūrp Nakhā, Rāwan kī bahin, Rāja Rām Chandar se apnā byāh karnā chāhṭī thī; Rām Chandar Jī ko dūsī shādi bargiz manẓūr na thī. Jab wuh bahut ba-jidd hū'ī aur kisi tarāḥ bāz na ā'ī, tab Lachhman Jī ne diqq ho kar us kī nāk kāt ḍālī. Rāja Rām Chandar Sītā Jī kī talāsh meṁ phirte the, kī ittifaqan Hanūmān Mantri, ya'nī muṣhīr Sagreo Rāja Kishkinda Nagar, Mulḱ-i-Dakhan, kā milā, aur phir Rāja Sagreo se mulāqāt hū'ī. Sagreo ko us ke bhāī Bālī ne mulḱ se nikāl diyā thā; donoṁ bhā'iyon meṁ larā'ī hū'ī: Rāja Rām Chandar ke tīr se Bālī mārā gayā, aur Sagreo, apne mulḱ par qābiẓ ho kar, Rām Chandar Jī kā muṭī' aur farmān-bardār ho gayā. Tab Rāja Rām Chandar ne Rāwan par charḥā'ī kī, aur Sagreo aur Hanūmān ba-sar-kardagi apnī fauj ke sāth hū'e. Dakhan se guzar kar us āb-nāe par, jo darmiyān Hindustān aur Lankā ke wāqī' hai, Rāja Rām Chandar ne ek pul bāndhā, aur us se 'ubūr kar ke Rāwan se larā'ī lar ke fath pā'ī. Us ko mārā, aur us kā mulḱ us ke chhōṭe bhāī Bhubeshan ko bakhsh diyā, aur Sītā Jī ko qaid-i-sakht se chhorā kar apne mulḱ ko wāpas ā'e.

Chandar-bansi khāndān kā bānī Jodh thā; us kā parotā, Musam-mā Yayāt, us kā jā-nishīn Ilābābād meṁ huā. Ba'd us kī wafāt ke, us ke pānch beṭe, Yadū, Anū, Tarbasū, Dirbī, aur Pūr bāqī rahe. Pas Yadū kī aulād meṁ Kirishnā aur Bal Rām mashhūr hū'e. Ek aur barā ḥādīsh, jo qadīm tārikh-i-Hind meṁ mashhūr hai aur ab tak Hindū'yon ke zabān-zad hai, aur jo kī Yadū ke khāndān meṁ huā thā, yih hai, kī Yadū se do khāndān mashhūr hū'e, ek Kūrū, dūsra Pāṇḍū. Par Kūrū kā farīq ba-nisbat Pāṇḍū ke ḥukūmat aur sarwat meṁ zabar-dast aur 'ālī-himmat thā. Judhightir, us waqt kā Rāja, Pāṇḍū kī aulād meṁ itnā tāqat-war aur ṣāhib-i-ḥukm huā, kī us ne aṣhwamedh ya'nī ghore kī qurbānī kā irādah kiyā. Yih qurbānī siwā us pādshāh-i-tazīmu-sh-shān ke, jis kā muqābalah ko'ī rāja na kar sake, aur ko'ī nahīn kar saktā.

Duryodhan Rāja ko, jo Kūrū ke khāndān se thā, yih bāt nā-maṭ-bū-i-khātīr hū'i : chunānchi us ne yih khabar pā kar, ki Judhishtīr ko juā khelne kā nibāyat shauq hai, apne dil meṇ is qurbānī ke rokne kā manṣūbah ṭhahra kar Judhishtīr ke pās āyā, aur bāzī bad kar juā khelne lagā. Jab Judhishtīr bāzī hār gayā, tab Duryodhan ne us se kahā, ki "Agar tū apne rāj aur jorū donon par bāzī bade, tab main tere sāth juā kheltā hūn." Us ne aisā hī kiyā ; ittifaq se Judhishtīr wuh bāzī bhī hār gayā. Duryodhan ne furaṇ us kī jorū aur saltanat par qatṣah kar ke bārah baras kī mī'ād par us ko jalā-waṭan kar diyā. Jab bārah baras guzar chuke, tab ḥasb-i-wa'dah Judhishtīr, ma' apne bhā'i-yon, Kirishnā aur Bal Rām Jī, ke, mudda'i saltanat kā ho kar us ke pās āyā ; par Duryodhan ne us ko saltanat na dī. Tab Judhishtīr ne jang kā irādah kiyā ; donon jānib se faujen ārāsta kī ga'in, aur yih tajwiz ṭhahri, ki jo fath pā'e, wuh hukumat le.

Yih laṛā'i Kūrū Chhetar ke maidān meṇ Thānesar ke qarīb, jo Panjāb meṇ wāqī' hai, ba-ṣalāh-i-jānibain qarār pā'i. Aur ba-mūjib kutub-i-Hunūd ke yih ma'lūm hotā hai ki Yadū ke khāndān meṇ se donon ṭaraf chhappan naslen is laṛā'i meṇ shāmil thin : aṭṭharah din tak yih kārzār us maidān meṇ hū'i. Isī laṛā'i kā hāl kitāb Mahā-bhārat meṇ muṣaṣṣal likhā hai. Anjām-kār Pāndū'on kī fath hū'i ; aur Kūrū'on ne hazimat pā'i : Duryodhan ma' aur chand rāja'on ke mārā gayā.

Judhishtīr fath-mand ho kar ma' apne bhā'i-yon, Kirishnā aur Bal Rām Jī ke Dūarkā kī ṭaraf kūch kar gayā, jahān par Sī'i Kirishnā Jī pahunch kar maqtūl hū'e, aur Judhishtīr aur Bal Rām Jī Koh-i-Himāla par jā kar barf meṇ gal ga'e, aur un ke pote Rāja Parekhhit un kī gaddī par baithe. Ba'd thore zamānah ke Hastināpūr, jo un kā dāru-s-saltanat thā, basabab Gangā kī ṭughyānī ke dūb gayā.

#### KHĀNDĀN-I-TAKSHAK.

Takhmīnan chha sau baras peshtar Hazrat 'Isā ke ek aur khāndān ke rāja Mulk-i-Tātār se ā kar Hindustān meṇ dākhl hū'e, jin ko Hindū log Takshak ke khāndān se, ya'nī sānpon kī aulād, batlāte haiṇ. Un ke pādshāh kā nām Shish Nāg thā.

Unhon ne Hindustān-i-shimālī ko fath kar ke apnī saltanat kā nām Magadh Desh kā Rāj muqarrar kiyā. Is saltanat men Shūbah-i-Bihār aur Mamālik-i-shimālī Hindustān ke dākhil the; un kā dārū-s-saltanat Shahr-i-Pāṭliputrā thā, jo qarib Shahr-i-Paṭna ke wāqī' thā.

#### HAMALĀT-I-MAGHRIBĪ.

Dārāb Bin Bahman, Bādshāh-i-Fāras, un bādshāhon men se awwal bādshāh hai, jinhon ne maghrīb kī taraf se Hindustān par charhā'ī kī. Yih bādshāh pāñch sau aṭṭharah baras peshtar San-i-'Isawī ke Kaikhusrāu ke takht par Irān men mutamakkin huā; aur Yūnāu se le kar Daryā-i-Sindh ke kināre tak, jis men ka'ī mulk shāmil the, is ne fath kiye. Itnī barī saltanat par bhī qānū' na ho kar ba-tama'-i-zar Hindustān par charhā'ī kī, aur Daryā-i-Sindh ke qurb-o-jawār kī sab riyāsaten ma' Mulk-i-Panjāb apne qabze men lāyā. Agarchi is kā patā nahīn miltā, ki kitne mulk us ne fath kiye, par itnā tārīkhon se zarūr sābit hai, ki Dārāb ke pās siwā Hindustān ke jis qadr aur mamālik the, un men se itnā mahsūl kisī mulk kā na atā thā, jis qadr kī khirāj Hindustān se atā thā. Kyūn-ki tamām shūbahāt-i-mamālik-i-maftūhah-i-Irān kā khirāj jam' kar ke hisāb kiyā gayā thā, to us sab khirāj kī ek tihā'ī hisse ke barābar Hindustān kā khirāj atā thā; aur aur mulkon se chāndī, aur Hindustān se khālī sonā wahān bhejā jātā thā. Isī tarah par sau baras tak Hindustān Mulk-i-Irān kā ek shūbah aur bāj-guzār aur tābī' o munqād rahā. Jab ki Sikandar-i-A'zam ne Mulk-i-Fāras ko tah-o-balā kiyā, us waqt se Hindustān ne bhī tauq-i-itā'at-i-Shāh-i-Irān apnī gardan se utārā.

Aiyām-i-saltanat-i-Iskandar-i-A'zam men Dārā Ibn-i-Dārāb bādshāh Irān kā thā. Is Dārā ne kabhī Hindustān par ḥamlaḥ nahīn kiyā thā, balki is ke bāp Dārāb Ibn-i-Bahman ne Hindustān ko fath kar ke Magadh Desh waghairah ke sab rājā'on ko bāj-guzār apne mulk kā kar liyā thā.

Aur jab ki Sikandar-i-A'zam ne Hindustān par yūrfish kī, us waqt Rāja Mahānand, ki aulād-i-Takshak se thā, Magadh Des, ya'nī Shūbah-i-Bihār men ḥukm-rān thā, aur Shāh-i-Irān ko na'l-

bandī diyā kartā thā. Is quam ke sab Rāja Budh kī parastish kiyā karte the. Yih Budh pān sau chālīs baras qabl-i-ḡuhūr Ḥaṣrat 'Isā ke Ṣubah-'i-Bihār meṇ paidā huā; Gayā Jī meṇ is kā maqām rahā kartā thā.

Gharaz-ki Sikandar-i-A'ẓam Mulk-i-Irān ko zer-o-zabar kar ke ma' lashkar-i-jarrār Daryā-i-Sindh par pahunchā. Chūn-ki tīn baras tak us kī fauj ne ḥamalāt karne aur larne bhirne meṇ baṛī mihnat uṭhā'ī thī, aur mausim-i-sarmā meṇ barfistānī pāhāron par charḥte charḥte bhī thak ga'ī thī; is liye us ne apnī fauj se wa'dah kiyā, ki Hindustān ko fath kar ke jo māl lūṭ kā mere hāth a'egā, wuh tum ko in'ām meṇ dūngā. Tau'ān wa karḥan us kī fauj ne manẓūr kiyā: chunānchi bīs hazār admī kī fauj le ke Sindh pār huā. Us waqt Sikandar kī 'umr tīs baras kī thī. Yahān ā kar us ne ma'lūm kiyā ki tīn bādshāh Hindustān meṇ rāj kar raho haiṇ. Ek Rāja Mulk-i-Kashmīr aur pahārī bastiyon kā ḥakim thā. Dūsrā Sindh Sāgar kā rāja thā: yih wuh mulk hai, jo Daryā-i-Sindh aur Jhilam ke bēch meṇ waqī' hai. Tisrā Rāja Pūr Hastināpūr kā rāja thā. Yih donoṇ pichhle rāja Chandarbausi khāndān ke the.

Rāja Kashmīr ne yih dānā'ī kī, ki apne bhā'ī ke ham-rāh tuhfajāt kar ke Sikandar ke ḥuẓūr meṇ us ko bilā-tawaqquf-i-mahẓ rawāva kar diyā; aur Rāja Sindh khud ba-ishtiyāq-i-mulāqāt Sikandar-i-A'ẓam ke darbār meṇ ḥāẓir huā, aur Sikandar kī, ma' us kī fauj ke, apne Dārū-r-Riyāsāt meṇ baṛī dhūm dhām se ziyāfat kī. Wahān, Sikandar ne apne thake mānde sipāhiyon ko ārām lene ke wāste chhor diyā; aur kuchh sipāh un kī muḥāfazāt ke wāste muta'aiyan kar ke, khud, ma' chīda jawānān-i-tanomand o jang āzmūda ke, Daryā-i-Jhilam kī ṭaraf kūch kiyā. Par mausim barsāt kā shurū' ho gayā thā, aur Jhilam kā pāt ek mīl tak phailā huā thā, pānī bare zor shor se bahtā thā; aur Rāja Pūr kā lashkar muqābale ke wāste dūsrē kināra-'i-Jhilam par Sikandar kī fauj kā sadd-i-rāh thā; aur jis ṭaraf se wuh utarnā chāhtā thā, usī ṭaraf se muqābalah Rāja Pūr kartā thā. Is liye is daryā se pār utarnā Sikandar ko mushkil ma'lūm huā: kyūnki Rāja Pūr ne hāthiyon kī qatār Daryā-i-Jhilam ke kināre par ārasta kar ke 'ubūr-i-daryā kī rāh har jagah se band kar dī thī.



Sikandar ne apne jasūson se daryāft kar liyā, ki das kos ke fāsilē par is daryā men ek jazīrah hai. Is liye, jab ki rāt andherī hū'ī, aur hawā ke sannāṭe aur menh ke zor aur bādāl kī garaj men sipāh kā kuchh shor-o-ghul sunā'ī na de saktā thā, mauqā' pā kar gyārah hazār purāne sipāhī hamrāh le kar rāton rāt daryā pār ho gayā. Hindū'on ne yih khayāl kiyā, ki thore se sipāhī shāyad ā nikle honge; is liye Rāja Pūr ne apne bete ko thore se admī de kar un ke haṭāne ke liye rawāna kiyā. Rāja Pūr kā larkā jāte hī kām āyā, aur fauj ne shikast pā'ī. Tab Rāja Pūr ke kām khare hū'e aur samjhā ki khud Sikandar 'ubūr kar āyā hai. Faurān chār hazār sawār aur tīs hazār piyāde aur bahut se rath aur bāthī ham-rāh le kar Sikandar ke muqābalah par saff-ārā huā. Rāja Pūr kī sipāh ne barī bahāduri dikhā'ī, par Sikandar ke sawāron ke āge kuchh pesh-raft na gā'ī. Do pahar par do baje ke ba'd Hindū bhāgne lage, par shīr Pūr ek bāthī par sawār ho kar khud lartā rahā. Sikandar ne us kī bahāduri dekh kar raḥm khā kar chāhā ki us kī jān bachā de; is wāste us ne Rāja Pūr se kahlā bhejā, ki "Agar hamāre pās chālā ā'egā, to us kī 'izzat aur ḥurmat men kuchh farq na hogā." Rāja Pūr rāzī ho gayā; Sikandar ke pās be-khauf chālā gayā. Us waqt Sikandar ne us se pūchhā, ki "Ab kyā sulūk tum se karnā chāhiye?" Us ne jawāb diyā, ki "Jo sulūk bādshāh kiyā karte hain, wuh karnā chāhiye." Sikandar bahut khush huā, aur us ko phir us kā mulk bakhsh kar apnī taraf se aur mulk bhī us ko diyā. Rāja Pūr yih faiyāzī us kī dekh kar muddat tak us kā wafā-dār khair-khwāh rahā.

Sikandar ba-khayāl is ke, ki is daryā kī rāh mere qabze men rahe, ḥukm diyā ki donoṅ taraf is daryā ke ek ek shahr ta'mīr kiyā jā'e; aur Do-āba, ya'nī wuh qit'ah mulk kā, jo darmiyān Jhilam aur Chanāb ke wāqī' hai, Rāja Pūr ko 'atā kiyā; aur khud Chanāb pār ho kar āge ko rawāna huā. Jab Daryā-i-Rāwī se 'ubūr kiā, to Sikandar ko khābar pahunchī, ki ek barā giroh muḥsidin kā bar-sar-i-parkhāsh hai: shāyad yih log qaum-i-Tātār se honge, jo Hindustān men ā base the. Maqām Sanglā par in se larā'ī hū'ī; solah hazār admī un men se Sikandar ne qatl kiye, aur sattar hazār muqaiyd hū'e, baqī-mānda pahār kī jāniḥ bhāg g'n'e.

Rāja Chandar Gupt, walad-i-Rāja Mahānand, jo nā'in ke peṭ se thā, Sikandar ke milne ko Magadh Des se kūch kar ke Panjāb men āyā thā; aur mulāqāt ke waqt Shahr-i-Pāṭliputr kī ta'rif o tausīf, jo dāru-r-riyāsāt Magadh Des kā thā, Shāh Sikandar ke rū-bā-rū bayān kī. Is sabab se Sikandar ne irādah kiyā, ki aise bare shahr men apnā jhandā garūngā; par afsos ! ki us kī fauj ne zarā bhī qadam āge Satlaj ke na baṛhāyā. Sikan-dār ne fauj ko dhamkāyā, aur kabhī khushāmad un kī kī aur kabhī ṭama' lūt aur bakhshish kī dī, par hargiz kisī ne iqrār āge chalne kā na kiyā. Is liye 'ājiz ho kar dil men yih bāt ṭhān lī, ki "Waṭan men pahunch kar, phir aur na'ī fauj bhartī kar ke Hindustān par phir charhā'ī karūngā, aur Šūbah-i-Bihār ko zarūr fath karūngā." Afsos ! ki Bābil kī daldal ke pās pahunch kar maut kī daldal men phans gayā, bukhār ayā, aur battīs baras kī 'umr men ki 'ain ālam shabāb kā thā, rāhiy-i-mulk-i-baqā huā. Gharaz, miṣra'—

Jī kī jī hī men rahī bāt, na hone pā'ī.

Jab Sikandar Hindustān men āyā, to Rāja Mahānand, Magadh Des kā ḥukm-farmā, bis hazār sawār aur do lākh piyāde aur bāthī wa-ghairah be-ghumār le ke us ke muqābale ko musta'idd huā thā. Magar Sikandar basabab apnī fauj kī sarkashī ke Satlaj pār na ho sakā; nāchār usī jagah se us ko ultā phirnā parā. Ba'd az-ān Rāja Mahānand ko us ke Wazīr, Musammā Chānak, ne marwā dālā. Us ke ba'd us ke āṭh beṭon ne ba-ittifāq bārah baras tak, ya'nī 315 baras qabl san-i-'Isawī tak, saltanat kī. In men se ek beṭā, Musammā Chandar Gupt, bahut lā'iq thā: magar us ke bhā'ī, basabab is ke ki wuh nā'in ke peṭ se thā, us ko ḥaqir jānte the; yā ba-mujib qaul ba'z mu'arrikhin ke, us ko Pāṭliputr se sautele bhā'iyon ne nikalwā diyā thā. Bahar taqdīr, Chandar Gupt ne apne bāp ke wazīr, Musammā Chānak, se sāzish kar ke un sāton shah-zādon ko qatl karwā dālā; aur khud mustaqill Magadh Des kā Rāja ho kar chaubīs baras tak rāj kiyā; aur do sau bānwē baras qabl san-i-'Isawī ke is dunyā se kūch kiyā. Chandar Gupt ke ba'd jitne rāja takht-nishīn hū'e, wuh acheinhe khāndan ke aur sāhib-i-'ilm the. Unhon ne sarḥon banā'in,

saudāgarī ko raunaq dī, 'ilm kī taraqqī men sa'y kī; khushūsan us zamāne men Sanskrit zabān kī barī taraqqī hū'ī.

Takhmīnan do sau baras peshtar san-i-'Isawī ke ek aur khāndān ne Hindustān par hukūmat hāsil kī, jis ko Agnī Kul kahte haiṃ. Is qaum ke ham-rāh Barahman log ho ga'e the; isī wāste Barahmanon ko wuh iqtidār hāsil huā, ki āj tak un kī qadr Hindustān men roz-afzūn hai. Is khāndān ke rājā'on ne Bodh kī parastish Hindustān se uthā dī, aur jo log ki is mazhab ke the, un ko jalā-waṭan kar diyā; chunānchi Jazīrah-i-Lankā aur Mulk-i-Barhmā men inhon ne sukūnat ikhṭiyār kī. Aur Hindustān men Barahmanon ne nayā mazhab banā kar phailā diyā, aur Bodh kā mānnā lilkull chhorā diyā.

Is Agnī Kul khāndān ke chār firqe the; jin men se Parī, ya'nī Pawān firqe, ne barī tāqat aur sarwat hāsil kī. Un kī hukūmat Narbadā nadi ke us pār tak thī, aur Wast-i-Hind aur Mamālik-i-Maghribī ke sab shahr un ke zer-i-hukūmat the. Is khāndān kā dāru-s-saltanat Shahr-i-Ujain thā, jo Ṣubah-i-Mālwa men wāqī' hai.

Parī Mārā khāndān men Rāja Bikarmājī barā mashhūr Rāja guzrā hai, jo chhappan baras qabl san-i-'Isawī ke takht-nishīn huā thā. Yih Rāja apne zamāne men barā nek-nām rahā; shulh aur jang donon men shuhrah-i-āfāq huā. Isī Rāja ne Sanskrit zabān ko bahut taraqqī dī, aur tamām Hindustān se achehhe achehhe Pandit talāsh kar ke apnī kachahri men bharti kiye. Kālī Dās shā'ir kā isī Rāja ke waqt men farogh huā. Yih Rāja buddhā ho kar Rāja Sālbāhan se shikast khā kar larā'ī men mārā gayā.

Jis zamāne men ki Parī Mārā khāndān ke Rāja Ujain men hukūmat karte the, Indrā kī aulād Magadh Des par qābiṣ aur mutasarrif thī. Is khāndān ke rājā'on kā bānī Sadrikā hai, jis ko Kārnā Deo yā Pāmbā Karnā kahte haiṃ. Ba'd us kī wafāt ke chha Rāja barābar Magadh ke takht par baithē; un sab ko laqab-i-bāniy-i-saltanat Sanskrit men diyā hai. Par donon khāndān, Parī Mārā aur Indrā, thorē zamāne men barbad ho ga'e, aur Hindustān men ek barā tahlukah mach gayā; ki is aspā men Musalmānon ne Hindustān par charhā'ī kī.

MUSALMĀNOṆ KĪ HUKŪMAT.

MusalmānoṆ ke 'ahd-i-hukūmat kā tazkirah ḥasb-i-tafṣīl-i-zail hai:—

*Bāb-i-Awwal*—Hukūmat Khulafā kī, jo san 861 'Īsawī tak khatm ho ga'ī.

*Bāb-i-Doum*—Is meṇ Khāndān-i-Ghaznī kā bayān hai, jo san 997 'Īsawī meṇ shurū' huā, aur san 1186 'Īsawī meṇ khatm huā.

*Bāb-i-Soum*—Saltanat-i-Ghorīyān, ibtidā-i-san 1186 'Īsawī se san 1206 'Īsawī tak.

*Bāb-i-Chahārūm*—Saltanat-i-Ghulāmān, san 1206 'Īsawī se le kar san 1288 'Īsawī tak.

*Bāb-i-Panjum*—Saltanat-i-Khiljīyān, san 1288 se san 1321 'Īsawī tak.

*Bāb-i-Shaṣṭum*—Saltanat-i-Khāndān-i-Tughlaq, san 1321 'Īsawī se san 1414 'Īsawī tak.

*Bāb-i-Haftum*—Saltanat-i-Sādāt, san 1414 'Īsawī se san 1450 'Īsawī tak.

*Bāb-i-Haṣṭum*—Saltanat-i-Khāndān-i-Lodhī, san 1450 'Īsawī se san 1526 'Īsawī tak.

*Bāb-i-Nahum*—Saltanat-i-Mughaliyah, Khāndān-i-Timūrī, san 1526 'Īsawī se. Is meṇ Khāndān-i-Sūrī wa-ghairah kā bhī bayān hai. Khāndān-i-Sūrī ne, san 1540 'Īsawī se san 1556 'Īsawī tak hukūmat kī, phir Khāndān-i-Mughaliyah ne san 1556 'Īsawī se san 1857 'Īsawī tak.

BĀB-I-AWWAL.

HUKŪMAT-I-KHULAFĀ, JO SAN 861 'ĪSAWĪ MEṆ KHATM HŪ'Ī.

MusalmānoṆ meṇ sab se awwal Hindustān par Khalifah Walid Ibn-i-Abdu-l-Malik ke lashkar ne ḥamlah kiya, aur Sindh se le kar Daryā-i-Gangā tak ke mulk us ke Sipah-Sālār Muḥammad Bin Qasim ne maftūḥ kiye. San 705 'Īsawī meṇ wuh Hindustān par chārḥ kar āyā. Hāl is kā yūṇ hai, ki Muḥammad

Ibn-i-Qāsim, birādar-zāda-'i-Ḥajjāj Bin Yūsuf Ṣāqafī, Ḥākim-i-Baṣrah, bīs baras kī 'umr meṇ (6,000) chha hazār ādmī le kar Sindh par āyā, aur Rāja Dābir se, jo us waqt meṇ Gujrāt kā ḥākim thā, ka'ī larā'iyān larīn. Rāja mazkūr shikast pā kar māwā gayā. Tab Muḥammad Ibn-i-Qāsim ne Chittor par lashkar-kashī kī; us waqt Dihli ke takht par Khāndān-i-Tūār kā ek rāja, Pāṇḍū kī aulād se, ḥukūmat kartā thā. Us kī nasl se ikkīs rāja Dihli ke takht par Anand Pāl ke 'ahd tak julūs-farmā hū'e. Phir Anand Pāl ne apne nawāso, Pirthī Rāj ko, jo kī Dihli ke Hindū rājā'ōn meṇ sab se picḥhlā rāja thā, god liyā; jis ke marne ke ba'd ahl-i-Islām kā jhaṇḍa Dihli meṇ pān sau baras tak barī mazbūfī se qā'im rahā.

Khalifah Walid kī fauj jab Hindustān par charḥ kar ā'ī thī us waqt Hindustān meṇ baqī khal-balī machī hū'ī thī. Kyūnki Parī Mārā khāndān ke rāja za'if ho ga'e the; Tūār kā khāndān Dihli par qabiz ho gayā thā; Gujrāt kā ḥākim khud-mukhtār ho gayā thā; Chittor meṇ qabzāh Ghaloṭōn kā ho gayā thā; aur Shahr-i-Qannauj thoṛe zamāne ke ba'd Kūrū'ōn ke qabze meṇ ā gayā thā. Shimālī Hindustān kī šurat aur hī kuchh badal ga'ī thī; Ujain kā rāja mafqūd ho gayā thā, na'ī na'ī saltanaten paidā ho ga'ī thīn. Musalmānōn kī futūḥāt se kuchh aur hī tarāḥ kā intizām is mulk kā ho gayā thā; aksar rāja bāj-guzār Khalifah-i-Walid ke ho ga'e the. Us zamāne meṇ Daryā-i-Ibro ke kināre se le kar, jo Yūrap meṇ Mulk-i-Hispāniya kī ek nadī hai, Daryā-Gang tak, jo Hindustān kā maṣḥūr daryā hai, tamām mulk Musalmānōn ke zer-i-ḥukm ho ga'e the. Khalifah Walid tak ḥukūmat Musalmānōn kī bare auj par rahī. Khalifah Walid ke intiqāl ke ba'd Khalifah Māmūn Ibn-i-Hārūn Rashīd ne Hindustān par charḥā'ī kī, par Rājputōn ne us ko shikast di. Us waqt se ḥukūmat Khalifōn kī sust aur za'if hone lagi; yabān tak kī derh sau baras tak Musalmānōn ne Hindustān par ko'ī aur ḥamlah na kiya. Khalifah Hārūn Rashīd, jo pāṇchwaṇ Khalifah Khulafā-i-'Abbāsīyah se guzrā hai, us kī wafāt ke ba'd taqat Khulafā kī aisi ghaṭ ga'ī, kī har ek sūbah kā ḥākim bāghiy-o-munḥarif ho kar mustaqill badshāh ban gayā: aur Khalifah ke taht širf shahr-i-Baḡhlād ma' us ke muzāfāt ke rah gayā thā.

ISMĀ'IL-I-SĀMĀNĪ.

Un Sūbah-dāron men se, jo Khalifah-i-Baghdād se munharif ho kar ba-jā-i-khud mustaqill hākim ho ga'e the, ek shakhs, Ismā'il-i-Sāmānī, Mā-warā'u-n-Nahr aur Khurāsān kā sūbah-dār thā. Yih shakhs san 279 Hijri, mutābiq-i-san 862 'Isawī men bādshāh se bāghī ho kar khud Bukhārā kā bādshāh ho gayā. Us ke mā-taht Kābul, Qandahār, aur Zābulistān ke sūbe the. Us ne Bukhārā ko apnā dāru-l-khilāfat muqarrar kiya. Chār bādshāh us ke khāndān ke nawwe baras tak takht-i-Bukhārā par hukm-rān rahe. Chauthē bādshāh ne apnī wafāt ke waqt apne betē Manşūr ko apnā walī-'ahd muqarrar kiya. Magar is bādshāh ke marne ke ba'd arākin-i-saltanat men is bāt par tanāzu' huā, ki āyā is kam-sin larke ko pādshāh banā'en, yā bādshāh-i-mutawaffā ke chachā ko. Ākhirash bi-l-ittifāq sab ne is bāt kā faisalah Alaptagīn, Hākim-i-Khurāsān, ki rāe daryāft karne par munhasar rakhā, jis kā dāru-l-hukūmat Ghaznīn thā. Alaptagīn, Hākim-i-Ghaznīn, ne bhī yihī rāe dī, ki, shāh-i-marhūm kā chachā bādshāh muqarrar kiya jā'e: par qabl is rāe ke pahunchne ke, Bukhārā men umarā-i-saltanat ne muttaliq-r-rāe ho kar Manşūr ko bādshāh banā liya thā. Jab Manşūr ne yih rāe apne bar-khilāf sunī, khafā ho kar us ko Bukhārā men talab kiya. Wuh ba-khauf-i-jān wahān na gayā. Aur chūnki ab siwāe khud-sar hone ke aur ko'ī panāh us ko dikhlā'ī na detī thī, is liye us ne chāhā ki merī hukūmat mustaqill ho jā'e; aur wuh Ghaznīn kā khud-sar bādshāh ho gayā; aur Kābul o Qandahār ko apne mā-taht kar ke Ghaznīn ko dāru-saltanat muqarrar kiya. Agarebi Shāh Manşūr ne ka'ī sipah-salār Alaptagīn ke muqābale ko bārī bārī rawāna kiye; par wuh un ke fareb men na āyā. Pandrah baras tak yih shakhs Ghaznīn men hukūmat kartā rahā; aur san 365 Hijri men, mutābiq san 975 'Isawī ke faut huā.

ISHĀQ IBN-I-ALAPTAGĪN.

Alaptagīn kī wafāt ke ba'd us kā betā, Ishāq Ibn-i-Alaptagīn, apne bāp ke takht par san 365 Hijri, mutābiq-i-san 975 'Isawī men ijlas-farmā huā. Magar chūnki us ko hameshā Bādshāh

Manşūr ki taraf se khadshah lagā rahā thā, kyaun ki Manşūr us ke bāp ko bāghī aur ghāshib samajhtā thā; is wāste Ishāq ne apne Sipah-Sālār-i-ghujā' Sabaktagin ko apne ham-rāh le kar Shāh Manşūr par hamlah kiyā aur fath pā'ī; aur Shāh Manşūr se is bāt kā iqrār-nāma likhwā liyā, ki Ishāq Khurāsān kā bilā-shubhah musataqill bādshāh hai, tā-ki phir kisī taraf kā da'wā Manşūr kā Khurāsān par na rahe; aur phir bi-l-istiqlāl saltanat karne lagā. Do baras hukumat kar ke san 367 Hijrī, muṭābiq-i-san 977 'Isawī mein Ishāq rāhiy-i-mulk-i-baqā huā.

#### SABAKTAGIN.

Ishāq ki wafāt ke ba'd siwā Sabaktagin ke ko'ī shakhs lā'iq-i-takht-nishīnī na rahā thā. Sabaktagin aśl mein ek shah-zāda Irān kā thā, jo ittifaq-i-zamānah se hālat-i-iftlās mein Alaptagin, bādshāh-i-sābiq-i-Ghaznī ki khidmat mein hāzīr huā thā, aur Alaptagin ne bonehār dekh kar kharid liyā thā aur darjah ba-darjah taraqqī de kar sipah-sālārī ke rutbe tak us ko pahunchā diyā thā. Ab us ne Pādshāh Alaptagin ki larkī se apnā nikāh kar ke Bādshāh kā dāmād ban kar takht par julūs farmāyā; aur apne julūs ke awwal hī sāl mein, ya'nī san 977 'Isawī mein, us ne Hindustān par charhā'ī ki. Us waqt Rāja Jaipāl Lāhor kā rāja thā. Sabaktagin ne Multān fath kiyā, aur aur ka'ī qil'ē fath kar ke bahut sā māl lūṭ kar phir apne dāru-l-khilāfat Ghaznī ko murāja'at farmā'ī. Jaipāl ne yih samajh kar ki Musalmān phir mere mulk par hamlah-āwar na hon, khud Sindh pār ho kar Musalmānon ke mulk par hamlah kiyā, par kām-yāb na huā; balki pakṛā gayā, aur khud us ko muṭī' honā parā; aur har sāl kā khirāj denā manzūr kar liyā. Shāh Sabaktagin ne hukm diyā; ki "Is sāl kā khirāj isī waqt adā karo." Magar chūnki wabān kull khirāj kā rūpiya sar-anjām na kar sakā, is liye us ne darkhwāst ki, ki "Bādshāh apne mu'tamadon ko bande ke ham-rāh kar de; Lāhor mein pahunch kar bāqī rūpiya adā kar dūngā." Yih darkhwāst manzūr hū'ī. Jab Lāhor mein āyā, to darbār kiyā; dāhni taraf takht ke jo Barahman log khare the, un se salāh pūchhi. Barahmanon ne 'arṣ ki, ki "Mabarāja! ab ḥakim-i-Ghaznī kā kuchh andesha ḥuzūr ko na rahā; hamāre nazdik

rūpiya denā maḥz be-fā'idah hai." Bā'in ṭaraf jo Chhatrī log us ke sipah-sālār aur afsar-i-fauj the, un se pūchhā to unhon ne yih rāe dī, ki "Rāja ko lāzim hai ki jo iqrār rūpiya dene kā kiyā hai, us ko pūrā kare; wa-illā Musalmān chāḥ ā'enḡe, aur phir laṛā'i hogī. Jang meṇ ra'āyā barbād hogī, aur ṣadbā āfāt meṇ muṭtalā ho jā'egī. In sab qabāhaton kī nisbat rūpiya kā denā āsān bāt hai. Jo ḥuṣūr ne wa'dah kiyā hai, be-shakk us ko pūrā kijiye." Rāja ne yih sun kar nāk bhaṇ chāḥā'i, aur bargiz na mānā, Barahmanon kī rāe mān lī, aur mu'tamad-i-shāhī ko qaid kar liyā. Sabaktagīn ko jab yih khabar bad-'ahdī kī pahunchī, to āḡ ho gayā, miṣl tūfān ke maghrib se āyā. Tamām rāja shimālī Hindustān ke, aur Rāja-'i-Dihlī, aur Rāja-'i-Ajmer, aur Rāja-'i-Kāliujar, aur Rāja-'i-Qannauj ek lākh admī kī fauj le kar Rāja Jaipāl ki madad ko ā'e; aur Hindū aur Musalmānon kā muqābalah Lamghān ke kināre par huā. Yih laṛā'i Sindh daryā ke pachchhim kī ṭaraf hū'i thī; us zamāne meṇ Hindū'on ko Daryā-i-Aṭak ke pār jāne se iḥtirāz na thā. Ākhir ko Hindū'on ne shikast khā'i, aur Nil-āb ke kināre tak un kā ta'āqub huā. Is laṛā'i ke ba'd niyām-i-salṭanat-i-Sabaktagīn meṇ, jo ki bis baras tak rahī, Hindū'on se aur ko'ī laṛā'i nahīn hū'i. Sabaktagīn ne bis baras salṭanat kar ke san 997 'Isawī meṇ wufāt pā'i. Us ke ba'd us kā ehṥotā betā Ismā'il bādshāh huā: magar do chār mahīne ke ba'd us ke bare bhā'i Maḥmūd ne, jo ḥaqīqat meṇ wāriṣ-i-tāj o-takht thā, salṭanat par qabḡah pāyā, aur san 997 'Isawī meṇ takht-nishīn huā.

## BĀB-I-DOUM.

*Is meṇ hukūmat-i-Khāndān-i-Ghaznī kā bayān hai, jo san 997 'Isawī meṇ shurū' hū'i aur san 1186 'Isawī meṇ khatm hū'i.*

### SULTĀN MAḤMŪD GHĀZNĀWĪ.

Yih bādshāh jumlaḥ shāhān-i-sābiq se 'aẓīmu-sh-shān aur dīn-dār mashhūr hai. Us ne takht par baiṭh kar pahle to Mā-warā'u-n-Nahr ko apnī salṭanat meṇ shāmil kiyā, jo mulk kī Bahīrah-'i-Akhḡar se le kar Daryā-i-Aṭak tak thā; ba'd az-ān



‘inān-i-tawajjuh Mulk-i-Hind kī taraf pherī, jo mulk kī ab tak Musalmānoṃ kī takht o tārāj se bachā huā thā. Is mulk par us ne bārah hamle kiye, aur har hamle meṃ muẓaffar aur maṃṣūr ho kar bahut daulat aur māl le kar murāja‘at kī.

*Pahlā Hamlah.*

5wīn Agust, san 1001 ‘Isawī meṃ Sultān Maḥmūd Rāja Jaipāl Wāliy-i-Lāhor se Peshāwar meṃ larā, aur use shikast de kar qaid kar liyā; aur phir shahr Bhaṭindā tak, jo bi-l-fi‘l Rāja Paṭyāla kī ‘amal-dāri meṃ wāqī‘ hai, pahunch kar us shahr ko lūṭā; aur sab māl o asbāb wahān kā le kar Ghaznī ko murāja‘at kī. Wabān pahunch kar Rāja Jaipāl aur us ke ham-rāhiyoṃ ko, jo muqaiyad the, ba-shart-i-zar-i-fidyah rihā‘ī dī; aur un Afghānoṃ ko, jinhoṃ ne un se sāzish kī thī, qatl kiyā. Jaipāl ne qaid se rihā‘ī pā kar is be-‘izzatī se jinā manzūr na kiyā; aur ḥukūmat-i-Lāhor se dast-bardār ho kar ek chatā banwāyā, aur us meṃ zinda jal kar mar gayā. Us kī jagah Anandpāl, us kā beṭā, Lāhor ke takht par baithā, aur Sultān-i-Ghaznī kā bāj-guzār huā.

*Dūsra Hamlah.*

San 1004 ‘Isawī meṃ yih hamlah bādshāh ne is wāṣṭe kiyā thā, kī Rāja Bhaṭindā ne khirāj apne mulk kā Sultān Maḥmūd Ghaznavī ko adā nahīn kiyā thā. (Yih ek qil‘ah bajānib-i-shimāl-i-Bikānir o junūb-i-Multān wāqī‘ hai). Jab Sultān āyā, to Rāja ne morehoṃ par, jin kī chār taraf khā‘ī thī, shikast khā‘ī; aur phir qil‘ah meṃ jā chhupā. Tīn din qil‘ah kā muḥāsarah rahā; ākhirash Maḥmūd kī fath hū‘ī. Rāja ne apne ta‘īn āp mār dālā, aur Sultān Maḥmūd muẓaffar o maṃṣūr ho kar bahut sā māl le kar Ghaznī ko chālā gayā.

*Tīsra Hamlah.*

San 1005 ‘Isawī meṃ yih hamlah is wāṣṭe huā, kī Abu-l-Fath Lodi, Sūbah-dār-i-Multān, ne, bā-wujūd Musalmān hone ke Anandpāl se sāzish kar lī thī, aur Sultān kī itā‘at se inḥirāf kar ke baghawāt ikhtiyār kī thī. Is liye Sultān ne charḥā‘ī kī; Peshāwar

men Rāja Anandpāl, Wāliy-i-Lāhor se muqābalah huā; Rāja ne shikast khā'i, aur bhāg kar Sūdahra men gayā, jo qarīb Wazīr-ābād ke wāqī hai. Sultān ne us kā ta'āqub kiyā, yahan tak ki Rāja mazkūr Kashmīr ko bhāg gayā. Sultān Maḥmūd Muṭtān men pahunch kar sāt din qil'ah kā muḥāṣarah kiye rahā; akhirash Abu-l-Faṭḥ Lodī ne itā'at manzūr kī, aur jo khirāj pahle diyā kartā thā, us se dūgnā manzūr kiyā. Ba'd az-ān Sultān mu-zaffar o manṣūr Ghaznī ko chalā gayā.

### *Chauthā Hamlah.*

Chūnki Sultān Maḥmūd Ghaznawī Ilak Khān, Wāliy-i-Tātār se larā'i men marshghul rahā, is wāste Anandpāl, Rāja-i-Lāhor, se us kī shararat ke intiqām lene se thore 'arṣe tak be-khabar rahā. Ab muhimin-i-Tātār kī farāghat ke ba'd shāh-i-mazkūr ne barī fauj jam' kī, aur mausim-i-bahār, san 1008, mutābiq-i-san 399 Hijrī men Hindustān kī taraf kūch kiyā. Anandpāl bhī be-fikr na thā; balki us ko khūb ma'lūm thā, ki mujh par wuh charḥā'i karegā: is liye Rāja mazkūr ne apne qāsid tamām Hindustān ke rājā'on kī khidmat men rawāna kiye, aur kahlā bhojā, ki "Musalmānon ko, jahān tak ho sake, is Hindustān se nikāl denā wājib hai. Agar ham muttāfiq ho kar Maḥmūd kā muqābalah karen to Mazhab-i-Islām Hindustān men na phailne pā'egā; aur us kā roknā bahut zarūr hai." Chūnki sab rājā'on ke dil men Musalmānon kī taraf se ranj to pahle hī se thā, in qāsidon ke jāne se aur ziyādah āsar ho gayā. Is liye Māldah aur Ujain aur Gwālyār aur Kālinjar aur Dihlī aur Ajmer, tamām jaghon ke rāja muttāfiq ho gu'e, aur apnī apnī faujen le kar Panjāb ko ā'e. Aisi fauj-i-kaṣīr kabhī zamānah-i-sābiq men jam' na hū'i thī. Maḥmūd ne jab ki itnī fauj-i-kaṣīr dekhī, jis kī us ko kuchh tawaqqu' na thī, ghabrā gayā; aur bar-khilāf apnī 'adat-i-mustamirrah ke ghanīm kī fauj par daur nahīn mārī, balki qarīb Peshāwar ke dushman kī fauj ke muqābil faro-kash huā. Us ke der karne men yih huā, ki dushman kā lashkar sab ā kar jam' ho gayā. Kahte hain is larā'i men Hindū'on ne barā ittifāq kiyā thā, yahan tak ki Hindū 'auraton ne jawābirāt farokht kar ke aur

apne gahne pāte galā kar chāṇdī aur sonā banā kar is kām ke wāste rūpiyā jam' kiyā aur Hindū'on ke lashkar meṁ kharch ke wāste dūr dūr se rawāna kiyā thā. Aur sab rāja ba-jān-o-dil laṛne aur marne par taiyār the, ki Musalmānon ko hargiz ek qadam āge na barhne deṅge; aur Kakkhar aur pabārī jāngī qaumeṁ sab muttafiq ho kar, Maḥmūd kī chār taraf ā paṛiṁ. Is liye Maḥmūd ne apne lashkar kī chāron taraf kḥandaq khudwā'ī. Bā-wujūd itnī kaṣīr fauj aur aise muṣammam-'azm dushman ke agarchi kuchh thoṛī sī be-intizāmī hū'ī, magar Maḥmūd kī dilerī aur shujā'at meṁ zarā farq na āyā. Chālīs roz tak donoṁ faujēṁ āmne sāmne paṛī rahīṁ. Maḥmūd ne yih chāhā kī sāmne se ḥamlah ho; is liye ek barjasta fauj tīr-andāzon kī ḥamlah karne ke wāste us ne rawāna kī, tā-ki Hindū log us par charḥ kar ā'eṁ. Magar us kā natījah bar-'aks us kī tawaquq' ke yih huā, ki Kakkharon ne Maḥmūd kī fauj kā ta'āqub nange pair aur nange sar baṛī tāqat aur zor se kar ke lashkar par charḥ daure, aur talwāron aur pesh-qabzeṁ khīñch kar ghore aur sawār qatl karne shurū' kiye; yabān tak kī qarīb 4,000 ke Musalmān māre ga'e. Laṛā'ī laḥḥah ba-laḥḥah barḥtī jāti thī. Isī aṣnā meṁ Maḥmūd ko yih lāt ma'lūm hū'ī, kī us kā dushman jis hāthī par sawār thā, us hāthī ke mātḥe par ek aīsā tīr lagā, kī wuh hāthī ḍar kar ultā pīchhe ko bhāg gayā aur laṛā'ī ke kḥauf ke māre maidān meṁ kharā na rahā. Hindū'on ne jo dekhā, kī un kā sipah-sālār maidān-i-jang meṁ nahīn hai, wuh bhī ḍhīle ho ga'e; ākḥir ko titar bitar ho ke bhāge aur maidān Maḥmūd ke hāth āyā. Un ke ta'āqub meṁ das hazār muntakhab fauj rawāna kī; aur jis qadr kī Musalmān maqtūl hū'e the, un se dūgne Hindū bhāgte hū'e qatl kiye ga'e. Ba'd is ke Sulṭān Maḥmūd ne phīr kabḥī Hindū'on ko fauj jam' karne kā mauqa' na diyā. Panjāb tak us ne un kā ta'āqub kiya; aur yabān ā kar us ko ma'lūm huā, kī wuh aise muntashar aur pareshān-ḥāl ho ga'e haiṁ, kī jis shahr ko ab main bā-raunaq pā'ūngā, us ko ba-kḥubī lūt lūngā. Wuh Nagar Koṭ ke lūṭne ko chalā. Yih ma'bad Hindū kā Hīmāla pahār ke nīche wāqī' thā. Hindū is jagah ko ka'ī shurū'on ke zamin se nikalne ke sabab se buzurg aur pāk samajhte the, aur tamām rūpiya khairāt aur charbhā'we wa-ghairah kā is jagah ikatṭhā kar ke rakhā karte the. Aur is

maqām par is qadr jawāhirāt aur chāndī aur sonā jam' thā ki kisi rāja ke khazāne meṇ na thā; kyaunki maqām-i-mutabarrak o mahfūz samajh kar har ek rāja kā khazānah wahāṇ jam' rahtā thā. Aur ba-sabab is ke ki Sultān Maḥmūd par ṣab rāja'ṇ ne mil kar charhā'i kī thī, wahāṇ fauj na thī; sirf pujārī log nigah-bān us khazānah-'i-beshumār ke the, jinhōṇ ne' Maḥmūd kī shakl dekhte hī itā'at qubūl kī, aur darwāze khol diye. Bādshāh ne apne chand umarā ke ham-rāh us mandir meṇ dākhil ho kar khazānah dekhte hī jald qabẓah kar liyā. Sāth lākh dinār-i-ṭilā'ī, aur sāt sau man sone aur chāndī kī inṭeṇ, aur do sau man sonā khālīṣ, aur do hazār man chāndī ghair-khālīṣ, aur bīs man jawāhirāt, jin meṇ motī, mūngā, hīrā, la'l mile hū'e the, aur Rāja Bhīm ke waqt ke jam' kiye hū'e the, yih sab māl Sultān Maḥmūd ke hāth lag gayā; aur sab daulat le kar Ghaznīn ko murāja'at kī. Dūsre baras barā jashn kiyā, aur tamām ra'ūyā-i-Ghaznīn ko Hindustān kī lūṭ kā māl dikhlāyā. Yih jashn, jo ek barē wasī' maidān meṇ kiyā thā, tin roz tak rahā: aur kuchh māl mulla'ṇ aur mustaḥaqṇ ko taṣadduq diyā.

#### *Pānchwāṇ Ḥamlah.*

San 1010 'Isawī, muṭābiq-i-san 401 Hijrī meṇ wuh phir kisi zurūrat ke bā'is Hindustān meṇ āyā; aur Multān ko fath kar ke, us jagah ke Ḥākim Abu-l-Fath Lodī ko qaid kar ke Ghaznīn ko le gayā.

#### *Chhathā Ḥamlah.*

Sāl-i-doum meṇ Sultān Maḥmūd ne shahr Thānesar par, jo Panjāb meṇ wāqī' hai, ḥamlah kiyā, aur us mandir ko, jo Hindū'ṇ ke nazdik bahut pāk aur muqāddas thā, lūṭ liyā aur shahr ko phūṅk diyā, aur be-shumār Hindū qaid kar ke Ghaznīn ko 'le gayā; aur yih sab kām Hindū'ṇ ke jam' hone aur muqābalah ko taiyār hone se pahle hī kar guzrā.

*Sātwān aur Āṭhwān Hamlah.*

Tin baras ke b'ad do daf'ah us ne Kashmīr par hamlah ziyā. Bar-waqt bāz-gasht ke fauj rāh bhūl g'āi, aur jāre kā mauṣim ho gayā thā; is liye bahut ādmī talaf ho ga'e, magar kuchh ziyādah nuqsān nahīn huā.

*Nawān Hamlah.*

Is hamle mein Sultān Maḥmūd Wast-i-Hind kā irādah kar ke Gangā tak gayā. Tārīkh-i-Firishta mein likhā hai, ki is daf'ah Maḥmūd ne ek lākh sawār aur bis hazār piyāde ham-rāh liye; aur jo mulk ki na'e fath kiye the, wahān kī sipāh un mulkon mein is wāṣṭe na chhorī, ki shāyad kuchh fasād na kare, aur hikmat-i-'amālī se lūṭ kī ṭama' par un ko bhī sāth le kar Hindustān par charhā'i kī. Sau 1017 'Īsawī, muṭābiq-i-san 408 Hījri mein tin mahīne tak us ne safar kiya. Sāt daryā pār utar kar aise mulk mein āyā jo us ne kabhī na dekhā thā, par apnī waqifiyat aur 'aql se us ne yih safar kiya. Peshāwar se chal kar Kashmīr ke qarīb jā kar pahār ke niche niche, jahān sab daryā pūyāb hain, guzrā; aur Jamūā pār ho kar Qannauj mein ā pahunchā. Un aiyām mein Shahr-i-Qannauj barī raunaq par thā; aur agarchi qurb o jiwār ke dāru-s-saltanatōn mein bahut barā na thā, magar daulat mein bahut ziyādah thā. Chūnki wahān kā rāja is muhim se be-khabar thā, apne ta'īn be madad samajh kar ma' apne 'ayāl o alfāl ke shahr ke bāhar niklā, aur Sultān Maḥmūd ko apne ta'īn sapurd kar diya. Maḥmūd ne yih ḥāl dekh kar raḥm kiya, aur ba'd tin roz ke Shahr-i-Qannauj us ko de diya, aur kuchh us kā nuqsān na kiya. Aur Sultān aur Rāja se yih 'ahd ho gayā, ki "Jab ko'i dushman tum par hamlah karegā, to main tumhārī aur tumhāre wārison kī madad karūngā." Ba'd az-ān Maḥmūd Maṭhrā mein āyā, jo ki jā-i-wilādat Kirishn kī mashhūr hai, aur Hindū'ōn kā barā ma'bad hai. Yih shahr Sultān ne lūṭā, aur but toṛ dāle, aur but-khāne muḥadim kar diye, aur 53,000 bāshinde is shahr ke qaid kiye.

*Daswān Hamlah.*

San 1022 'Īsawī, muṭābiq-i-san 413 Hijrī meṇ Sultān Maḥmūd ne Rāja Nandā par, jo ek rāja Shahr Kālinjar, Muḥk Bundel Khand, kā thā, charhā'ī kī. Wajh us kī yih hū'ī, kī chūnki Rāja Qannauj ne Sultān kī itā'at qubūl kar lī thī, is bāt se Rāja Nandā, Kālinjar kā gaddī-nishīn khafā ho gayā, aur apne qurb o jiwār ke rājā'on ko ham-rāh le kar Qannauj par us ne charhā'ī kī. Chūnki Maḥmūd Ghaznawī aur Rāja'-i-Qannauj meṇ nawen ḥamle meṇ ittifāq ho chukā thā, kī "Jab ko'ī tum par charhā'ī karegā, to main madad karūngā," is liye Sultān Maḥmūd yih khabar sun kar us kī madad ko āyā. Magar Maḥmūd ke pahunchne ke qabl Qannauj kā Rāja mārā gayā thā : phir Kālinjar ke Rāja par charhā'ī kī, magar kuchh achehā tadārūk us kā na kar sakā.

*Gyārhwān Hamlah.*

San 1023 'Īsawī, muṭābiq-i-san 414 Hijrī meṇ Sultān Maḥmūd ne Rāja Jaipāl Doum ke muqābale par charhā'ī kī. Yih rāja, Rāja Anandpāl kā gaddī-nishīn thā ; us ne Sultān Maḥmūd se baghawāt kī thī. Is ḥamle se Lāhor Mamālik-i-maftūḥah'-i-Ghaznī meṇ dākhil ho gayā, aur usī waqt se Musalmanon kī chhāoni Hindustān meṇ qā'im hū'ī. Is se pahle Ahl-i-Islām kī fauj yahān mustaqill ho kar na rahī thī.

*Bārhwān Hamlah.*

Sab se picḥhlā aur sab se barā ḥamlaḥ Sultān Maḥmūd ne Somnāt par kiya. Is mandir ko Hindū nibāyat muqaddas jānte the ; aur yih Jazīrah-numā-i-Gujrāt ke junūb meṇ ek ṭile par wāqī' thā. Māh Sitambar san 1024 'Īsawī meṇ, muṭābiq san 415 Hijrī ke, lashkar le kar Sultān Ghaznī se chālā, aur Māh Aktūbar meṇ Multān ko pahunchā ; aur bis hazār ūṇṭ par zād-i-rāh o khorāk kā asbāb lād kar, us ne ba-rāh-i-registān Somnāt kī taraf kūch kiya. Aṣnā-i-rāh meṇ Ajmer ko lūṭā, aur sīdhā Somnāt par jā pahunchā. Wahān jā kar us ne dekhā kī yih mandir ek jazirah-numā meṇ wāqī' hai, aur jo khāk-nāe us ko barr-i-a'ẓam se milātī hai, wahān par fauj us ke 'ubūr se māni

hai; har ek kone par sipāh-i-jangī muta'aiyan hai. Isī aṣṇā meṇ ek harkāra Hindū'ōṇ ne us ke pās bhejā : wuh yih paighām lāyā, ki "Ab bhī apnī jān bachānī hai to is be-adabī se bāz ā, nabīṇ to hamārā deotā tujh ko tabāh kar degā." Maḥmūd ne tīr-andāzon ko ḥukm diyā ki āge barheṇ, aur tīr barsānā shurū' karen. Chunnānchī thoṛī der meṇ Hunūd kī fauj, jo diwāroṇ par muḥāṣiṣ thī, māri ga'ī. Yih ḥāl dekh kar Hindū bahut hī be-ḥawāss ho ga'e, aur butoṇ ke āge barī girya-'o-zāri se ro kar sijdah karne lage. Par jab Musalmān sīḥī lagā kar us mundir kī diwār par chaḥne lage, us waqt Hindū'ōṇ ne aisī bahāduri se un kā muqā-balah kiyā, ki ḥamlah-āwarān-i-Islām barā nuqṣān uṭhā kar pas-pā hū'e. Dūsre roz phir ḥamlah kiyā, magar kuchh fa'idah na huā. Tisre roz qurb-o-jiwār ke rāja log Somnāt kā mandir bachāne ko ā'e; barī ma'rikah kī larā'ī hū'ī, aur fath kisī kī bhī na ma'lūm hū'ī. Aur Hindū'ōṇ kī tā'id ko Sardār Bairām Deo aur Sardār Dabshālim, jo kī mashhūr amīr Gujrat ke the, pahunch ga'e. Us waqt Sulṭān Maḥmūd ne khayāl kiyā ki Hindustān meṇ ṣīrf ab kī hī da'f'ah goyā mujhe shikast hū'ī hai; is liye us ne apnī fauj kī ḥarārat-i-mazḥabī is tarāḥ afrokhṭa kiyā, kī zamīn par us ne Khudā ke sāmne sijdah kiyā aur madad kā khwābān huā, aur apnī fauj ke sardāroṇ ko bulā kar kahā, ki "Ab yā to fath ho ga'ī yā shahādat se sar-farāz hū'e." Tamām fauj yih bāt sun kar jān dene ko taiyār ho ga'ī; aur aisī josh meṇ ā kar larī, kī us ne fath pā'ī. Yih ḥāl dekh kar wuh sipāh, jo muḥāṣiṣ mandir kī thī, māre khauf ke mandir ko khālī kar ke bhāg ga'ī. Sulṭān Maḥmūd mandir meṇ dākḥil huā. Us ke andar sone ke but rakhe the; un sab meṇ Somnāt kī mūrāt pāñch gaz ūnchī thī, do gaz zamīn meṇ garī thī aur tīn gaz ūpar thī. Sulṭān Maḥmūd ne apne hāth se ek tīr mār kar us kī nāk torī, aur ḥukm dyā kī us but ko tor kar ṭukre ṭukre kar ḍāleṇ. Barahmanoṇ ne jama' ho kar Maḥmūd ke rū-ba-rū apne ta'īn zamīn par ḍāl diyā, aur iltijā kī, kī, "Hamārā deotā na torā jā'e; ham se is ke 'iwāz bahut ṣā rūpiya bādshāh le le." Magar Maḥmūd ne hargiz na mānā : agarchī us kā wazīr mā'il ho gayā thā kī is qadr zar-i-kaṣīr le liyā jā'e, par Maḥmūd ne farmāyā, kī "Qiyāmat ke roz main but-farosh apnā nām rakhwānā nahīṇ

chāhtā, balki but-shikan apnā nām chāhtā hūn.” Kahte hain ki jis waqt wuh but torā gayā, to is qadr jawāhirāt aur motī aur hīre aur la’l us ke peṭh meṭh se nikle, ki jis qadr wuh rūpiya dete the, us se ka’ī ḥiṣṣah qīmat meṭh ziyādah kā māl thā. Yih sab māl le kar jab wuh Ghaznī ko chālā, to rāh meṭh registān ke darmiyān Multān ke qarib Jāṭon ne ka’ī ḥamle us par kiye, jis ke sabab se us ne dūsre sāl san 1025 ‘Īsawī meṭh ek aur ḥamlaḥ kar ke Jāṭon ki khūb gosh-mālī kī, aur goyā unheṭh nest-o-nābūd kar diyā.

Ba’d az-āṅ us ne Khurāsān ko maftūḥ kiyā, aur Ghaznī meṭh jā kar bimār huā, aur 29 Aprail san 1030 ‘Īsawī meṭh rahīy-i-mulk-i-baqā huā. Kisi shā’ir ne us kī tārikh-i-riḥlat yon likhī hai—

*Qit’ah-i-Tārikh-i-Wafāt-i-Sultān Maḥmūd-i-Ghaznawī,*

Chal basā is jābān se ākhir,

Haif, Maḥmūd Ghaznawī Sultān.

Mujh ko tārikh kī hū’ī jab fikr,

Dil yih bolā, ki “Shāh-bāz-i-Jinān.”

420 Hijrī.

Maḥmūd ke khaṣā’il meṭh mu’arrikhīn kā ikhtilāf hai. Ba’z kahte hain ki wuh la’iq bādshāh aur barā munṣif o ‘ādil aur Khudā-parast apne zamānah kā thā. Ba’z mu’arrikh kahte hain ki wuh barā ḡalīm o ḥariṣ aur luṭerā thā. Hāsil yih hai, ki us kī ṭabī’at kī ‘ājib kaifiyat thī, ki mākhaz-i-ausāf-i-muta-zādd thī. Us ke waqt meṭh Mamālik-i-Sharqīyah meṭh Ghaznīn ‘ilm o faḡl kā ma’dan ho gayā thā. Us ke ‘ahd meṭh yih log bahut barē mashhūr muṣannif hū’e hain : (1) Firdausī, jis ne Shāh Nāma taṣnīf kiyā ; (2) ‘Unṣurī, jo mashhūr falsafī aur shā’ir hai ; (3) Abū Raiḥān, Munajjim, jis ko Baghdād se Māmūn Rashīd ne us ke pās bhej diyā thā, aur wuh us Bādshāh kī rifāqat meṭh rahṭā thā.

SULTĀN MAḤ’UD.

Sultān Maḥmūd Ghaznawī ke ba’d us ke do larke rahe, jo tauam the. Barē beṭe kā nām Sultān Muḥammad thā ; wuh



rahm-dil aur khaliq thā, aur us ko bādshāh pyār ziyādah kartā thā. Dūsra us kā bhā'i Mas'ūd thā; yih larkā misl apne bāp ke ghuṣṣah-war aur ulu-l-'azm thā. Chūnki Maḥmūd ne pahle hī se ma'lūm kar liyā thā, ki mere ba'd in donoṃ bhā'iyōṃ meṃ takht ke wāṣṭe jhagrā hogā, is liye us ne apnī ḥayāt meṃ Mā-warā'u-n-Nahr ki ḥukūmat, jis kā dāru-l-khilāfat Jurjān thā, Sultān Muḥammad ko de dī thī, aur Mas'ūd ko apne qalamrau kī ḥadd-i-mashriqī par ḥākim kar diyā thā. Sultān Maḥmūd kī wafāt ke ba'd Sultān Muḥammad, us kā barā betā, wāriṣ-i-tāj-o-takht huā. Us ke takht par baithte hī Mas'ūd ne us ko likhā, ki "Mujh ko saltanat kī khwāhish nahīn hai; par mujh ko ṣirf yih ārzū hai ki tīn ṣūbe, jin ko main ne ba-zor-i-sham-shir fath kiyā hai, mere hī qabḡe meṃ raheṃ, aur mere nām kā khutbah un meṃ parhā jā'e." Is bāt ko Muḥammad ne manzūr na kiyā; is liye Mas'ūd ne ek fauj farāham kī, aur Ghaznīn par charḥā'i kar ke fath pā'i, aur Muḥammad ko pakar kar us kī āṅkheṃ nikalwā dālī. Yih sab ma'rikah usī sāl meṃ huā, jis san meṃ Sultān Maḥmūd ne wafāt pā'i thī, aur Mas'ūd bhī usī sāl takht-nishīn huā. Par jo us ko tawaqqu' thī wuh zuḥūr meṃ na ā'i, balki us kī saltanat roz ba-roz tanazzul pāne lagī. Qaum-i-Saljūq ne pachehhim ke ṣūboṃ par zor pakrā, aur wuh log hamesha ḥamlah-āwar rahe, tā-waqte-ki un ko thorā sā mulk Ghaznīn se na diyā gayā. San 1033 'Isawī meṃ Shāh Mas'ūd Hindustān par ḥamlah-āwar huā, aur Kashmīr ko us ne muḥī' kiyā; aur dūgre sāl Qaum-i-Saljūq ko pachehhim kī taraf ḥaṭāne meṃ maṣrūf huā, aur un kī sar-kobī ke wāṣṭe Jai Singh ko, jo Hindustānī fauj kā sipah-sālār thā, rawāna kiyā. Is se zāhir hai ki Hindū log us waqt meṃ Daryā-i-Aṭak ke pār hone ko burā na jānte the, aur Hindū'ōṃ ko Musalmān bādshāh apnī fauj meṃ bare 'uhde par naukar rakhte the.

San 1056 'Isawī meṃ Mas'ūd ne Hindustān par phir ḥamlah kiyā, aur Hānsī ke qil'ce ko muḥāṣarah kar ke fath kiyā, aur wahān ke sab maṇdir qhā kar tamām māl zabṭ kiyā. Yahān se phirte waqt us ne apne bete ko Multān kā ṣubah-dār muqarrar kiyā. Jis zamāne meṃ ki Mas'ūd Hindustān meṃ thā, us ke dushmaṇōṃ ne tāqat pā kar Mā-warā'u-n-Nahr meṃ barī shorish

machā rakhī thī. Is wāṣṭe, jab wuh Ghaznīn ko gayā, to 'ain mausim-i-sarmā meṇ un dushmanon kā muqābalah karne ke wāṣṭe Mā-warā'u-n-Nahr ko use jānā parā, aur wahān larā'ī kī, aur ākhīr ko shikast khā'ī. Tughral Beg Turkmān ne us kā ta'āqub Ghazuīn tak kiyā : chunānchi Tughral ne Ghaznīn meṇ pahunch kar bādshāhī iṣṭabal tārāj kiyā, aur thorā sā shahr bhī ghārat kiyā, aur us shahr par qābīz ho gayā. Is liye Mas'ūd Shāh ne un Turkmānon ke ḥamalāt se bachne ke wāṣṭe ek maqām us ke rahne ko apne mulk meṇ denā qubūl kiyā, jis par wuh Turkmān bhī rāzī ho ga'e. Magar qābū pā kar phir unhon ne Mas'ūd par ḥamlah shurū' kiyā. Mas'ūd ne apne ta'īn un ke muqābale ke lā'iq na pā kar irādah kiyā, ki Hindustān meṇ jā kar fauj jam' kare. Badīn-khayāl us ne sab rūpiya aur daulat qil'ah se nikāl kar ūṇṭon par lādī, aur Lāhor kī jānīb rawāna huā Is tabāhī ke waqt meṇ apne andhe bhā'ī, musammā Muḥammad ko bhī sāth liyā, jis ko nau baras peshtar us ne khud andhā kar diyā thā. Jab kī Daryā-i-Sindh ke kināre par pahunchā, us kī fauj bāghī ho ga'ī, aur tamām māl o daulat, jo ūṇṭon par lādā thā, lūṭnā shurū' kar diyā ; aur is khauf se, kī bādshāh ghuṣse meṇ ā kar ham ko sazā-i-sakht na de, us ke andhe bhā'ī Muḥammad Shāh ko bādshāh banā liyā. Chunānchi Muḥammad Shāh qaid-khāne se nikal kar takht par baiṭhā, aur Mas'ūd Shāh ko takht se utār kar qaid kiyā. Muḥammad nā-binā'ī ke bā'is kār-o-bār-i-saltanat anjām dene ke qābil na thā ; is liye us ne saltanat apne larke, Aḥmad, ke ḥawāle kī. Aḥmad ne takht par baiṭhte hī Mas'ūd ko zinda garwā diyā. Gharaṣ, ek dīn wuh thā kī Mas'ūd ne apne bhā'ī kī āṅkhen nikalwā'ī thīn, ab us kī pādāsh meṇ us ko apne bhatije ke hāthon us se bhī barh kar roz-i-bad dekhnā naṣīb huā. Kisī shā'ir ne kyā khūb kahā hai—

Rubā'ī—

Ai yār ! kisī ko tū jo kalpāwegā,  
Yih yād rahe, tū bhī na kal pāwegā.  
Is dār-i-mukāfat meṇ, sun ai ghāfil,  
Bedād karegā āj, kal pāwegā.

## SULTĀN MAUDŪD IBN-I-MAS'ŪD.

Jab ki Maudūd Ibn-i-Mas'ūd ne, jo ki Sūbah-dār-i-Balkh thā, apne bāp ke qatl hone ki khabar sunī, fauraṇ Ghaznīn ko kūch kar ke āyā; aur wabān ke logon ne us ko san 1040 'Īsawī meṇ takht par biṭhā diyā. Ba-maqām Laghūmān Muḥammad aur Aḥmad se muqābalah huā, jahān ki un donon ne shikast pā'ī, aur Maudūd ke hāth se māre ga'e. Ab shīr ek dushman, us kā bhā'ī, rah gayā thā, jo ki talwār ke zor se da'wā bādshāh banne kā rakhtā thā. Us se bhī larā aur fath pā'ī, aur us kā bhā'ī chand roz ke ba'd apnī khwāb-gāh se marā huā niklā. In khāngī jhagron aur pachehim meṇ Turkmanon ki sar-kashī se Hindū'on ke dil meṇ phir ulu-l-'azmī paidā hū'ī. Chūnānchi Dihlī ke Rāja ne barī fauj jam' kī; Thānesar aur Hāps aur Nagar Koṭ aur ka'ī shahr aur apne qabze meṇ kar liye. Mandir do bāra ta'mīr kar liye; aur Musalmānon ne jo mūraten toṛ dālī thin, un ke 'iwaz aur mūraten rakhī ga'in, aur isī tarah un buton ki pūjā phir jāri hū'ī: hazāron ādmī pūjā ke wāste jam' hū'e; rājā'on ne nazren charhā'in; aur mandiron meṇ phir usī qadr daulat jam' ho ga'ī, jitnī ki Musalmānon ki lūṭ se pahle rahā kartī thī. Aur is qadr himmat Hindū'on ki barhī, ki Lāhor ko, jo dāru-l-khilāfat Musalmānon kā thā, gher liyā. Agarchi Musalmānon ne nikal kar Hindū'on ko bbagā diyā, magar wuh mulk, jo Hindū'on ne le liye the, Sultān Maudūd ke 'ahd meṇ unhīn ke qabze meṇ rahe. Sultān Maudūd ki saltanat nau baras tak rahī, aur san 1049 'Īsawī meṇ khatm hū'ī. Maudūd ke marne ke ba'd nau baras ke 'arṣe meṇ chār bādshāh mutawātir san 1058 'Īsawī tak takht-i-Ghaznīn par julūs-farmā hū'e, jin kā zikr karnā taṭwil-i-lā-ṭā'il hai.

## SULTĀN IBRĀHĪM.

San 1058 'Īsawī meṇ Sultān Ibrāhīm takht-i-Ghaznīn par mutamakkin huā. Kahte haiṇ ki wuh barā parhezgār aur ṣāhib-i-'ilm aur mutasharri' bādshāh thā. Us ne ka'ī Qurān Sharif kāmīl apne hāth se likhe, aur Makkah-o-Madinah meṇ rakhwā'e. Turkmanon ne us ke 'ahd meṇ bhī sakht ḥamle kiye; par us ne wuh

tamām mulk, jo ki Turkmānon ne fath kiye the, is shart par ‘ala-d-dawām ke wāste unhe likh diye, ki wuh log āyinda ko dast-darāzi na karen. Chunānchi unhon ne yih shart mān li, aur us par qā’im rabe. Is tarah par us ne maghribi dushmanon se ribā’i pā kar Hindū’on ke ‘azm ke rokne ke wāste pūrab ko fauj-kaghī karne ki taiyārī ki. Kahte haiṅ ki wuh Hindustān meṅ itnī dūr tak gayā, ki us waqt tak us ke buzurgon meṅ se ko’i bādshāh na gayā thā ; aur ek lākh Hindū qaid kar ke Ghaznī ko le gayā. Chālīs baras tak is bādshāh ne saltanat ki, aur san 1058 Īsawī meṅ us ki saltanat khatm hū’i.

#### SULTĀN MAS‘UD IBN-I-IBRĀHĪM.

Ibrāhīm ke ba’d us kā beṭā, Mas‘ud, jo bahut rahīm-dil aur nek sirat thā, bādshāh huā. Us ke aiyām-i-saltanat meṅ barā amn aur chain rahā : na to ko’i khāngī jhagrā huā, aur na ko’i ḥamlah bāhar se huā. Solah baras saltanat kar ke wuh is dār-i-na-pāedār se sidhārā.

#### SULTĀN ARSALĀN.

Mas‘ud ke ba’d us kā beṭā, Arsalān, takht par baiṭhā, jis ne bādshāh hote hī apne bhā’iyon ko qaid karnā shurū’ kiya. Magar Bahrām apne māmūn, Sanjar Turkmān, ke pās bhāg gayā aur us ki himāyat chāhī. Us ne us ki madad ki : chunānchi Turkmānon ki ek fauj Ghaznī par charh ā’i, aur wahān pahunch kar Arsalān ko nikāl diyā. Magar Arsalān phir ā kar larā, aur phir us ne takht le liyā. Ākhir-kār chār baras saltanat kar ke maqtul huā.

#### SULTĀN BAHRĀM.

Bahrām ab be-tanāzu’ wāriṣ-i-tāj thahrā. Us ne barī dānā’i aur dirāyat se saltanat ki, aur ahl-i-‘ilm ki us ne bahut qadr ki. Pāñtis baras tak us ne bādshāhat ki, aur ākhir-i-aiyām-i-saltanat meṅ Khāndān-i-Ghori ke jhagron meṅ giriftār huā, jis khāndān ne thoṛī muddat ke ba’d Khāndān-i-Ghaznī kā chirāgh bujhā kar apni bādshāhat ko farogh diyā.

## BĀB-I-SOUM—SALTĀNAT-I-KHĀNDĀN-I-GHOR.

(Ibtidā-i-san 1186 Īsawī se san 1206 'Īsawī tak.)

## ● MUHAMMAD QUTUBU-D-DĪN GHORĪ.

Ghor ek maqām kā nām hai, jo Qandahār se sāt āth mil ke fāsile par wāqī' hai. Wahān ke ek sardār, A'azzu-d-Dīn Husain, ne Sultān Mas'ūd Shāh Ibn-i-Mahmūd Ghaznawī ke darbār meṇ barā' i'zāz aur rusūkh hāsīl kiyā thā. Yahān tak us kā pāya baland huā, ki Sultān Mas'ūd ne apnī larkī kī shādī us ke sāth kar dī, aur 'ilāqah-'i-Ghor kī ḥukūmat us ke nām-zad kī. Us se sāt larke paidā hū'e: unheṇ Sab'ah Saiyārah kā khitāb diyā. Un meṇ se ek kā nām Qutubu-d-Dīn thā; us kī shādī Sultān Bahrām kī beṭī se hū'ī. Magar ba-sabab ka'ī khatā'on ke Sultān Bahrām ne apne dāmād, ya'nī Qutubu-d-Dīn, ko qatl karwā dālā.

## SAIFU-D-DĪN.

Saifu-d-Dīn, us kā bhā'ī, us ke khūn kā badlā lene chalā; aur us ne Bahrām ko nikāl kar Ghaznīn par qabḥah kar liyā. Magar ra'āyā us se rāzī na rah sakī; ra'iyat chāhtī thī ki Bahrām hī bād-shāh ho. Yih hāl dekh kar Bahrām yakāyak Ghaznīn meṇ āyā aur Saifu-d-Dīn ko giriftār kar ke us kā muṇh kalā kar ke tamām shahr meṇ tashbīr kiyā, aur phīr us kā sar kāt dālā.

## 'ALĀ'U-D-DĪN.

Saifu-d-Dīn ke bhā'ī, 'Alā'u-d-Dīn, ne yih hāl sun kar ek barī fauj taiyār kī, aur apne bhā'ī ke khūn kā 'iwāz lene ko Ghaznīn par charḥā'ī kī; aur barī bhārī larā'ī hū'ī. Bahrām ne shikast pā'ī, aur Hindustān kī taraf bhāgā, aur wahān bahut maṣā'ib uṭhā kar san 1152 Īsawī meṇ jān-ba-Haqq-taslīm huā.

Is tarāḥ par Khāndān-i-Ghaznīn kī ḥukūmat Daryā-i-Sindh ke mamālik-i-Maghribiyah se khārij hū'ī. 'Alā'u-d-Dīn Ghaznīn ko tārāj kar ke apne Dāru-s-Saltānat ko ba-maqām-i-Firoz Koh phīr gayā. Sultān Sanjar Turkmān ne phīr Ghaznīn par charḥā'ī kī:

‘Alā’u-d-Dīn se muqābalaḥ kiyā, aur us ko shikast dī. Magar Khurāsān ke fasād ki khabar sun wuh use faro karne ke wāṣṭe us ṭaraf jāne ko majbūr huā, aur yahān ‘Alā’u-d-Dīn ko takht Ghaznīn kā de gayā. San 1156 ‘Isawī meṇ ‘Alā’u-d-Dīn ne intiqāl kiyā: us ke ba’d us kā larkā bādshāh huā, lekin usī sāl meṇ use ek amīr ne mār ḍalā. Ba’d us ke us kā chachā-zād bhā’ī takht-i-Ghaznīn par qābiḷ huā; aur Shahābu-d-Dīn, ma’rūf ba Muḥammad Ghorī, apne ḥaqīqī bhā’ī, ko ba-ṭaur apne nā’ib ke muqarrar kiyā. Muḥammad Ghorī agarchi har ek mulk par fath-yāb o maṇṣūr o muḡaffar rahā, aur ḥaqīqat meṇ istiḥkām aur raunaq ḥukūmat-i-Ghor kī faḡaṭ isī shakḥ kī wajh se hū’ī, magar untis baras tak tā dam-i-zīst apne bhā’ī se us ne sar-tābī na kī aur usī kā tābī’dār banā rahā.

#### KHUSRAU SHĀH.

Bahrām kā beṭā, Khusrāu, Lāhor meṇ āyā, aur us shahr ko us ne apnā dāru-l-khilāfat banāyā. Sulṭān Maḥmūd Ghaznawī marḥūm ke mulkon meṇ se us kī aulād ke pās shīrf Hindustān ke ṣūbon meṇ se Lāhor hī bāqī rah gayā. Khusrāu sāt baras tak salṭanat kar ke mar gayā.

#### KHUSRAU MALIK.

Us ke ba’d us kā beṭā, Khusrāu Malik, takht-i-Lāhor par bai-ṭhā; aur us ne Hindustān ke tamām un ṣūbon par qabḷah kiyā, jo kisī zamāne meṇ us ke buzurgon ke qabḷe meṇ ā ga’e the. Magar san 1180 ‘Isawī meṇ Sulṭān Muḥammad Ghorī ne ba’d tasalluṭ Ghaznīn ke Hindustān par charḥā’ī kī, aur Lāhor kā muḥāṣarah kiyā, magar fath na kar sakā, aur ba-majbūrī Khusrāu Malik se ṣulḥ kar lī. Chār baras ke ba’d yih ‘ahd ṭuṭ gayā; aur Muḥammad Ghorī ne dūsri bār Lāhor ko gherā, lekin is daf’ah bhī māyūs rahā. Thorē ‘arṣe ke ba’d is ne tīsra hamlah kiyā, aur fath pā’ī. Magar yih fath bare fareb se ḥāṣil hū’ī; kyaunki pahle us ne Khusrāu Malik ke pās ṣulḥ kā paighām bhejā, aur apnī rāsti jītāne ke wāṣṭe Khusrāu ke beṭe ko, jis ko us ne ba-ṭariq yar-ghamāl, ya’nī ol ke, ṣulḥ hone par liyā thā, us ke pās bhej diyā. Wuh sin-rasida Bādshāh apne beṭe se milne ko shahr se tāhar

chalā; aur Muḥammad Ghori ne bis hazār sawār le kar daff'atān Khusrau Malik ke maḥall ko gher liyā. Khusrau Malik ne bachne ki ko'ī sūrat na dekh kar apne duṣhman se iltijā ki. Muḥammad Ghori ne yih suwāl kiyā, ki "Lahor mere ḥawālah kar do." Khusrau ne jald shahr khālī kar diyā. Is tarāḥ par san 1186 'Isawī men saltanat Khāndān-i-Ghaznī ki Hindustān se bhī bil-kull ma'dūm ho ga'ī.

17973.

#### SULTĀN MUHAMMAD GHORĪ.

Sultān Muḥammad Ghori ke zikr ke qabl yih bayān karnā bhī zarūr hai, ki Sultān Maḥmūd Ghaznawī ke waqt se le kar ab tak ko'ī bādshāh takht-i-Dihlī par jam kar na baiṭhā thā, balki shīf Multān aur Lāhor Ghaznawiyon ke tasarruf men rahā kiye. Jab kabhī fauj-i-shahī āge barh ātī thī, Hindū log rūpiya de kar tāl diyā karte the, aur Hindū Rāja ba-dastūr apnī apnī rāj-dhānī men birājā karte the. Aur jis qadr Khāndān-i-Ghaznī ki tāqat kam hotī jātī thī, Hindū rājā'on ki qūwat barhtī jātī thī. Magar ab ek aisā balā kā jhonkā āyā, ki Hindustānī rājā'on ko un ke takhton se urā le gayā, aur Musalmān bādshāh takht-i-Dihlī par musallat hū'e. San 1191 'Isawī men, jab ki Muḥammad Ghori ne Shahr Bhaṭīndā ko fath kar ke apne mulk-i-maurūsī ko murāja'at ki, Rāja Pirthī Rāj, Dihlī ke Rāja, ne tamām apnī fauj aur madad-gār, jo qarīb do lākh admī ke the, jam' kar ke Shahr Bhaṭīndā ke ehborāne ke wāṣṭe kūch kiyā. Muḥammad Ghori ne jab yih khabar pā'ī, wuh us shahr ko bachāne chālā. Ba-maqām-i-Tirāori, jo Thānesar se chaudah mīl ke fāṣile par wāqī' hai, donoṃ men muqābalah huā; larā'ī hone lagī. Muḥammad Ghori ne bahut shujā'at zāhir ki, par ākhir ko us ki fauj bhāg niklī. Lāchār, 'ājiz ho kar Ghor men āyā; aur sab sar-dāron ko, jin ki nāmardī se wuh larā'ī hārā thā, saza-i-sakht di, aur barkhast kar diyā. Bhaṭīndā Hindū'on ne phir le liyā.

Is fath ke sabab se Rāja Pirthī Rāj ko barā fakhr ḥāṣil huā; magar phir us ne apne ta'īn aisā kāhil banāyā, ki rāt din 'auraton men parā rahtā aur 'aish kiyā kartā thā. Aur Muḥammad Ghori ko aisī sharmin-dagi ḥāṣil hū'ī, ki ab us ko rāt din yihī fikr thī,

ki "Kisī tarāḥ Hindustān meṇ jā ke fath ḥaṣil karūṇ." Chhunān-chi khwāb o khur us par ḥarām ho gayā. Ākhir ko bis hazār sawār Tātārī muṭṭakhab le kar Daryā-i-Sindh ke pāru trā. Awwal us ne Pirthī Rāj ko kahlā bhejā, ki "Mazhab-i-Islām qubūl kar, nahīn to inkār kā anjām achchhā na hogā." Pirthī Rāj to 'aish meṇ mashghūl thā; us ne ghurūr se yih jawāb diyā, ki "Apnā bhalā chāhtā hai to phir jā." Dihlī ke Rāja ke ham-rāḥ ḍerḥ sau sardār jam the, aur tīn lākh sawār aur piyāde se bhī ziyādah the, aur tīn hazār bāthī. Yih fauj-i-'aẓīm Muḥammad Ghori ke muqābale par ā'ī. Donoṇ lashkar ke darmiyān Ghāgrā daryā ḥā'il thā; ek tarāf Rāja Pirthī Rāj parā thā, aur ek tarāf Musalmānoṇ kā lashkar. Muḥammad Ghori ne jab wuh ghurūr-amez jawāb sunā, to kahlā bhejā, ki "Main apne bhā'ī kā tābī'dār hūṇ; un se daryāft karūngā." Hindū'oṇ ne yih jawāb sun kar •jānā ki dar gayā; rāt ko sab 'aish o 'ishrat meṇ be-andeṣha maṣrūf hū'e. Muḥammad Ghori ne un ko ghāfil pā kar rāton rāt daryā pār utar ke 'ala-s-sabāḥ un par ḥamlah kiyā. Do pabar din chāḥe tak khūb larā'ī hū'ī; Hindū shikast khā kar bbāge. Chittor kā Rāja Rājputoṇ ko le kar khūb larā, aur usī larā'ī meṇ mārā gayā. Pirthī Rāj ko Musalmānoṇ ne pakaṛ liyā, aur bahut daulat Musalmānoṇ ke hāth ā'ī. Is shikast kī khabar sun kar baḥe shahroṇ ke rāja Musalmānoṇ ke tābī'dār ho ga'e. Muḥammad Ghori ne Chittor par lashkar-kashī kar ke us ko fath kiyā, aur wahāṇ ke hazārḥā bāshindoṇ ko mār ḍālā. Ba'd az-āṇ Dihlī par āyā: Rāja Pirthī Rāj ke betē ne, jo bajāe apne bāp ke takht par baiṭh gayā thā, fauran tābī'dārī ikhtiyār ki: is sabab se Shahr-i-Dihlī lūṭ se bāch gayā. Muḥammad Ghori ne Quṭubu-d-Dīn Aibak ko, jo us kā barā pyārā ghulām thā, shā'ista fauj de kar Dihlī ke mutṭaṣil chhor kar Ghazniṇ •ko murāja'at kī. Quṭubu-d-Dīn ne, jo miṣl Muḥammad Ghori ke ulu-l-'azm aur zī-liyāqat thā, jald tar Mīrath ko fath kar ke Dihlī ko apne qabze meṇ lā kar us ko apnā dāru-s-salṭanat banāyā. Usī din se Hindū'oṇ kī salṭanat nest-o-nābūd hū'ī. Muḥammad Ghori thoḥe 'arṣe ke ba'd phir Ghazniṇ se phir kar āyā aur na'ī fauj bhartī kar ke wahāṇ se lāyā, aur Rāja Jai Chand Wāliy-i-Qannauj, par chāḥḥā'ī kī. Qannauj kā Rāja Quṭubu-d-



Dīn ke tīr se mārā gayā, aur bahut Hindū maqtūl hū'e. Sāt sau hāthiyon men se, jo Musalmānon ke muqabāle men ā'e the, nawwe hāthī Musalmānon ke hāth ā'e: ek un men supaid hāthī thā. Bād-az-ān Banāras ko gayā, aur ek hazār mandir mismār kiye, aur phir Ghaznīn ko murāja'at kī. Dūsre sāl Gujrāt par Qutubu-d-Dīn ne hamlah kiya; aur sab māl o daulat le kar us ko musakhkhar kiya. Thore arse ke bād Muḥammad Ghori ne apne bhā'i ke marne kī khabar sunī, is liye wuh Ghaznīn ko gayā; chunānchi hasb-i-dastūr Muḥammad Ghori ke sar par tāj-i-shāhī rakhā gayā. Ek daf'ah phir wuh Hindustān men āyā; aur Dihli se lūṭ le kar Ghaznīn ko jātā thā ki qarib Lāhor ke Khakkaron ke hāth se is taur par mārā gayā, ki rāt ko chand admī khanjar le kar us ke ghar ke andar ghus ga'e aur use sotā huā pā kar 2-Sha'bān, san 602 Hijrī, mutābiq-i-san 1206 'Isawī ko khanjaron se mār dālā. Qutubu-d-Dīn bhī us waqt ham-rāh thā. Isī shakhs ke bātis Khāndān-i-Ghori kī taraqqī hū'i thī, aur isī par us khāndān kā khātimah ho gayā. Is ne sab 9 hamle Hindustān par miṣl Maḥmūd Ghaznawī ke kiye. Muḥammad Ghori ne battis baras salṭanat kī; az-ān-jumlaḥ untis baras tak apne bhā'i kī niyābat men rahā, aur tīn baras tak mustaqill bādshāh rahā. Isī Bādshāh kī salṭanat men Changez Khān ne salṭanat-i-Mughaliyah kī bunyād qā'im kī thī, jis kī wus'at Bahīrah'-i-Khazra' se Chīn aur Saibiriyā tak thī.

## BĀB-I-CHAHĀRUM—SALTĀNAT-I-GHULĀMĀN.

(San 1206 'Isawī se san 1288 'Isawī tak.)

- (1) Qutubu-d-Dīn; (2) Altamsh; (3) Razīyah Begam; (4) Naṣīru-d-Dīn Maḥmūd; (5) Ghiyāsu-d-Dīn Balban; (6) Kaiqubād.

### QUTUBU-D-DĪN AIBAK.

Salṭanat-i-Ghulāmān men awwal bādshāh Ahl-i-Islām kā Hindustān men Qutubu-d-Dīn Aibak huā hai; yih shakhs Sulṭān Muḥammad Ghori kā ghulām thā. Jis waqt ki Muḥammad Ghori ne intiqāl kiya, to chūnki wuh be-aulād thā, is liye us kī

jagah bādshāh hone kā jhagrā huā. Quṭubu-d-Dīn, Hākim-i-Dihlī, us kī salṭanat men ba-nisbat aur hukām ke ziyādah tāqatwar thā. Is liye Muḥammad Ghori ke ba'd us kī salṭanat kā intizām is taur par huā, ki Maḥmūd Shāh ne, jo Muḥammad Ghori kā bhatijā thā, Mulk-i-Ghor ko apne qabḷe men kar liyā; aur Alzar Ṣubah-dār ne Kābul aur Qandahār par qabḷah kiyā; aur Quṭubu-d-Dīn ne Hindustān kī Salṭanat kā da'wā kiyā. Lekin Alzar ne Quṭubu-d-Dīn se muqābalah kar ke shikast pā'ī; aur Quṭubu-d-Dīn ne Ghaznī men jā kar tāj-i-shāhi ḥasil kiyā. Magar mustaqill bādshāh hone ke ba'd Quṭubu-d-Dīn ne 'aiyāshī aur āram ikhtiyār kiyā; is wāste Alzar ne us ko sust pā kar Ghaznī kī salṭanat us se chhīn lī, aur Hindustān kī taraf us ko bhagā diyā. Us ne Hindustān men pahunch ke chār baras tak bādshāhat kī, aur san 1210 'Isawī men mar gayā. Is Bādshāh ko mu'arrikhon ne 'ādil aur bahādur aur la'īq aur faiyāz likhā hai.

#### SHAMSU-D-DIN-ALTAMSH.

Quṭubu-d-Dīn kī wafāt ke ba'd Ārām, Ibn-i-Quṭubu-d-Dīn, takht par baithā. Magar chūnki abhī tak us ke bāp ne apnī salṭanat aisī mustahkam na kī thī, ki us kā betā, Ārām, be khatke hukumat kar saktā, is liye ek baras ke 'arṣah men Shamsu-d-Dīn Altamsh ne Ārām ko qābil na pā ke takht se utār diyā. Altamsh agarchi 'ālī khāndān se thā, par bachpan men wuh Quṭubu-d-Dīn ke bāth farokht kiyā gayā thā. Bādshāh ne us ko honhār dekh kar tarbiyat kiyā, aur apnī betī se us kī shādi kar ke bare rutbe par us ko jald pahunchā diyā. San 1211 'Isawī men wuh bādshāh huā, aur us ne pachchīs baras tak salṭanat kī. Altamsh ke julūs ke duswen baras Jalālu-d-Dīn, Shāh-i-Khwārazm, Hindustān men āyā: Altamsh kī fauj ne us se muqābalah kiyā. Altamsh aksar un Musalmān ṣubah-dāron ke zēr karne men masrūf rahā thā, jo irādah khud-sar hone kā rakhte the: aur chūnki Bangālā kā ṣubah-dār aisā khud-sar ho gayā thā, ki muddat se us ne kharāj na diyā thā, is liye Altamsh ne wabān khud charhā'ī kī, aur apne betē, Naṣīru-d-Dīn, ko wabān kā ṣubah-dār banā kar āyā. Us bādshāh ne Hindū'on par ka'ī daf'ah fauj-kashī kar ke un ko

muṭī' kiyā. Ek baras ke muḥāṣarah meṇ Gwālyār us ne fath kiyā; aur phir Mālwa kī ṭaraf gayā aur Ujain fath kiyā. Wahān jā kar Mandir Mahā-Kāl ko, jo bārah sau baras peshtar kā banāyā huā Bikarmājīt kā thā, torā aur ghārat kiyā. Bikarmājīt kī mūrāt ma' Debī kī mūrāt ke Dibli meṇ lāyā, aur Jāmi' Masjid ke darwāze par donoṇ mūrātēn rakhwā kar torwā dālīn. Faqat isī bādshāh ne Eldikāz, Shāh-i-Ghaznīn ko shikast di, aur us ko qaid kar liyā; aur apnī saltanat ko babut dūr tak phailāyā. Shūbah-i-Bangāl, Shūbah-i-Bihār, Gwālyār, Mālwa, yih sab shūbe fath kiye. Gharaṣ ki yih bādshāh 'aql-mand aur nek-niyat thā. Is bādshāh ne san 1211 'Īsawī se le kar san 1236 'Īsawī tak ḥukūmat kī.

#### RAẪYAH BEGAM.

Altamsh ke ba'd us kā betā, Ruknu-d-Dīn Fīroz, takht par baiṭhā; magar 'aiyāshī aur ḥarām-kārī ke sabab se chha mahīne ke ba'd umarā ne us ko takht se utār diyā, aur bādshāh-zādī, RaẪyah Begam, us kī bahan ko takht par biṭhāyā. Yih awwal bādshāh-zādī Musalmānoṇ meṇ hai, jis ne takht par baiṭh kar ḥukūmat kī hai. Yih 'aurat bahut zī-liyāqat aur barī 'aqlmand thī; apne bāp ke waqt meṇ bhī kār-o-bār-i-mulk meṇ maṣrūf rahā kartī thī; is ko ḥukūmat kā ṭaur khūb ātā thā. Magar chūnki ek Habshī ghulām par 'āshiq ho kar us par barī mihrbānī karne lagī thī, is liye umarā us se nārāz hu'e, aur sab ne mashwarah kar ke us ko takht se utārne ke liye fauj jam' kī. Ākhir ko RaẪyah Begam pakrī ga'i, aur Bhaṭīndē ke qil'ah meṇ qaid kī ga'i. Phir wahān bhī us ne Qil'ah-i-Bhaṭīndā ke ḥākim se muwāfaqat kar ke us ke sāth ghādī kar lī; aur usī ke zer-i-ḥukm fauj jam' kar ke takht ke wāste do larā'iyan sakht larī, magar kām-yāb na hu'i; balki dūserī larā'i meṇ ma' apne shauhar ke dushmanoṇ ke hāth-ā'i, aur unhoṇ ne us ko qatl kiyā. Kull tīn baras chha mahīne, san 1236 'Īsawī se san 1239 'Īsawī tak, is bādshāh-zādī ne saltanat kī. Is bādshāh-zādī ke māre jāne ke ba'd us ke bhā'i, Mu'izzu-d-Dīn Bāhrām, aur 'Alā'u-d-Dīn Mas'ūd, khalaf-i-Rukn-u-d-Dīn ne, jo us ke ba'd bādshāh hu'e, kull chha baras tak

salṭanat kī, ya'nī san 1239 'Isawī se san 1246 'Isawī tak. Un ke ba'd Naṣīru-d-Dīn Maḥmūd Ibn-i-Altamsh ne Dihli ke takht par julūs kiyā.

NAṢĪRU-D-DĪN MAḤMŪD IBN-I-ALTAMSH.

Yih shakhs san 1246 'Isawī meṇ Dihlī kā bādshāh huā; yih pahlē shūbah-dār-i-Pangāla thā. Chūṅki us kī sauteli mān ne bachpan se us ko barī taklīf meṇ rakhā thā, hattā kī ek qaid-khāne meṇ dāl diyā thā, jabān wuh apne bāth se likh kar shīf us kī mazdūrī par guzārā kiyā kartā thā; is sabab se us ke mizāj meṇ bahut mulāyamat ā ga'ī thī. Jab wuh takht-nishīn huā, to us ne ahl-i-'ilm aur shu'arā aur fuṣalā kī barī qadr kī, aur apne balnō'ī Balban ko wazīr banāyā. Balban barā dānā aur 'aqlmand shakhs thā; us ne salṭanat kā intizām 'umdaḥ tarāḥ par kiyā, aur jo rāja khud-sar ho ga'e the, sab ko us ne dabāyā. Magar chūṅki Mughlōn ne Ghaznīn aur Qandahār aur Kābul aur Balkh aur Hirāt meṇ zor pakrā thā, aur un kā khauf bahut lagā rahitā thā, is liye Sher Khān, biādar-zāda-'i-Balban, wazīr muqarrar kiyā gayā. Is shakhs ne Panjāb aur Multān ko Mughlōn se bachā liyā; balki tarbiyat-yāfta aur bahādur sawār bhartī kar ke Ghaznīn se Mughlōn ko nikāl diyā, aur Ghaznīn ko salṭanat-i-Dihlī meṇ shāmil kar liyā. Is Bādshāh ke waqt meṇ, san 1258 'Isawī meṇ, Halākū Shāh, Changez Khān ke pote, kī taraf se ek elchī Dihlī meṇ āyā thā; lekin yā to is kī salṭanat kī shaukat aur 'azmat ne Mughlōn ke dilōn meṇ kuchh ru'b paidā kar diyā, yā yih kī unḥōn ne kuchh mauqa' ḥamlah karne kā na pāyā hogā: gharāz us waqt wuh Dihlī par ḥamlah karne se tāz rahe. Bīs baras tak us ne nihāyat 'adl o inṣāf se salṭanat kī, aur ra'āyā ko bahut khush rakhā; us ke 'ahd meṇ kisī ne kisī par ta'addī na kī. Yih bādshāh barā khush-naṣīb thā; jo larā'ī larā, us meṇ us ne fath pā'ī; par jis qadr us ke darbār meṇ tajammul-i-shāhāna thā, usī qadr us kā khalwat-kada takalluf se khālī thā. Khānā be āb o namak khātā thā; aur bā-wujūd bādshāh hone ke kitābat par guzrān kartā thā. Is bādshāh kī shīf ek biwī thī; dūsrī 'aurat us ne hargiz na kī. Tamām umūr khāna-dārī ke wuh biwī inṣirām kartī thī. Ek roz us ne 'arz kī, kī "Ai Shāh-i-wālā-jāh, main khānā pakāne se tang ā'ī

hān, aur merī ungliyon men phaphole par ga'e haiḥ : agar ek kanīz wāste khānā pakāne ke 'ināyat ho, to 'ain karam hai." Bādshāh yih bāt sun kar ranjīda huā, aur bolā, ki "Yih mulk Khudā-i-Ta'ālā kī wadī'at hai, 'aish o 'ishrat ke wāste nahīn hai : agar is men tasarruf-i-bejā karūn, to Qiyāmat ke din Khudā ko kyā jawāb dūngā ? Tum ko chāhiye ki ba-dastūr apne kār-o-bār men masrūf raho." Naql hai ki ek roz ek amir is bādshāh kī mulāzamat ko āyā, aur is ke hāth ke likhe hū'e Qurān ko dekhne lagā. Us men ek lafz, *fī*. mukarrar likhā huā thā ; use dekh kar bādshāh kī taraf ishārah kiyā, ki "Yih ghalat hai." Bādshāh ne usī waqt ek ḥalqah siyāhī kā us ke gird khīnch diyā ; ḥāl-ān-kī wuh lafz ghalat na thā. Jab wuh amir rukhsat ho kar chālā gayā, us dā'ire ko wahān se chhīl dālā. Kisī amir-i-gustākḥ ne 'arḥ ki, ki "Ḥuḥūr ne pahlē is ke gird ḥalqah khīnchā, aur ab chhīl dālā. Is kā kyā bā'is hai ? " Bādshāh ne jawāb diyā, ki "Main jāntā thā ki ḥaqīqat men yih lafz saḥīḥ hai ; lekin us ke rū-ba-rū jo aisā na kartā, to wuh ranjīda-khātīr hotā." Is bādshāh ne san 1266 'Isawī men ek muddat saltanat kar ke kisī 'arīze se wafāt pā'ī ; aur is ḥadisah-i-'aẓīm se sab naukār aur arākīn-i-saltanat nihāyat maghmūm hū'e. Is bādshāh kī nekiyān aur bhalā'iyān Hindustān men yādgār haiḥ.

#### GHİYĀSU-D-DĪN BALBAN.

Shāh Naṣīru-d-Dīn Maḥmūd ke intiqāl ke ba'd us kā wazīr, Balban, bādshāh huā, jis kī munṣifī aur dānā'ī kī shuhrat ne Irān aur Tātār ke bādshāhon ke dilon men bhī ārzū-i-wifāq paidā kī. Magar yih ilzām mu'arrikhon kā is par hai, ki bā-wujūd is fahm o kayāsāt ke is ne apne bhatīje, Sher Khān Bahādur ko, jo riyāsāt kā barā rukn thā, kisī tadbīr se marwā dālā. Is bādshāh ne sab ru'asā aur sardāron ke mizāj se jald āgālī paidā kar ke, jin ko chālāk aur musta'idd pāyā, unhīn ko barē barē 'uhde diye. Aur us ne yih qā'idah muqarrar kiyā thā ki barā 'ubdah kisī Hindū ko na detā thā. Us waqt men saltanat-i-Dihli kī barī 'izzat aur shaukat thī, aur barē barē fāzil is jagah jam' the. Jis qadr ki Ghīyāsu-d-Dīn Balban kī sawārī men shān o shaukat hotī thī

sābiq meṇ kisi bādshāh kī sawāri is ṭaur se na nikaltī thī; aur na aisī kaṣrat aur ‘aṣmat se makāwāt ta‘mīr hote the, jaise is kī ‘amal-dāri meṇ bū’e. Aur ta‘mīl-i-ā‘īq meṇ wuh bahut iḥtiyāt rakhtā thā, aur apne ḥukkām-i-mā-taht kī ta‘mīl-i-qānūn\* kā nigarān rahtā thā.

San 1279 ‘Isāwī meṇ Tughral Khān ne, jis ko Bangāla kī ḥukūmat sapurd kī ga‘ī thī, sar-kashī kī. Bādshāh ne us par do bār fauj bheji, magar donoṇ daf‘ah shikast khā‘ī. Ākhir ko khud ma‘rikah-ārā‘ī kā irādah kiyā. Tughral Khān apnī fauj le kar Uraisā ko gayā; aur agarchi wahān fauj-i-shāhī ne us kā ta‘āqub kiyā, magar us kā kuchh patā na milā. Ek roz kā zikr hai, ki Malik Muḥiyu-d-Dīn nāmī ek sardār-i-shāhī chālīs sawāron ke ham-rāh chālā jātā thā. Ittifāqan us ne Tughral Khān kī fauj dekhi: unhīn chālīs ādmīyon ko le kar qalb-i-lashkar meṇ Tughral Khān ke ‘ain khimē ke muqābil jā kar lalkārā, ki “Shāh Balban kī fatḥ hū‘ī, aur jo shakhṣ sāmne āyā us ko qatl karne lagā. Tughral Khān ne khayāl kiyā, ki shāyad tamām fauj-i-shāhī mujh par ā pahunchī: tan-i-tanhā ḥawāss-bākhṭa ho kar ek ghore par charḥ kar Mahānādī kī ṭaraf bhāgā, tā ki nadī pār ho kar jān-bar ho jā’e. Malik Muḥiyu-d-Dīn ne us kā ta‘āqub kiyā, aur daryā meṇ tairte hū’e us ko ek tīr mārā, aur pānī meṇ kūd kar us kā sar kāṭ layā. Balban ne us ko aisī be-iḥtiyā‘ī se dhāwā karne kī bābat bahut sar-zanish kī, lekin in‘ām bahāduri kā bhī bahut kuchh diyā. Aur Tughral Khān mufsid ke khāndān ke ek ek ādmī ko qatl kiyā; yahān tak ki be-gunāh ‘auraton aur bachchon ko, bhī na chhorā. Aur apne beṭe, Qarā Khān, ke nām Sūbah-dāri Bangāla kī muqarrar kī, aur tīn baras ke ba‘d Dihlī ko āyā. Is aṣnā meṇ Mughlon ne Sindh se utar kar Multān par qabṣah kar liyā. Bādshāh Balban ke beṭe, Muḥammad, Ibn-i-Balban, ne Mughlon ko phir nikāl diyā: magar basabab is ke ki dushmanon kā ta‘āqub us ne ḥadd se ziyādah kiyā thā, is liye wuh ek jangal meṇ jā kar do hazār sawār meṇ ghīr gayā, jo ki pahle se us kī kamīn meṇ baithe the; aur basabab ziyādatiy-i-lashkar-i-a‘dā ke mārā gayā. Shāh Balban kī ‘umr us waqt assī baras kī thī: aise lā‘īq aur fa‘īq beṭe ke māre jāne kī khabar sun kar bahut muṣmahill ho gayā; yahān tak ki isī ghamm se pazḥmurda ho kar san 1286 ‘Isāwī meṇ jān-ba-Ḥaqq-taslīm huā.

## KAIQUBĀD.

Shāh Balban ke marne ke ba'd san 1286 'Tsawī meṇ ru'asā-i-Dihlī ne Kaiqubād Ibn-i-Qarā Khān ko takht par biṭhā diyā. Kaiqubād ne bādshāh hote hī 'aiyāshī par kamar bāndhī, aur kār-o-bār saltanat kā Nizāmu-d-Dīn, Wazīr, ke sapurd kiyā. Yih wazīr-i-namak-harām dil meṇ yih maṇṣūbah kiye hū'e thā, ki is be-shu'ūr aur nau-'umr bādshāh se 'awāmu-n-rās ko mutanassir karwā de, aur āp bādshāh ho jā'e. Qarā Khān Ibn-i-Balban ne yih sab khabar darbār-i-shāhī kī pā kar apne is be-tamiz bete ko ka'ī bār likhā; magar us kā aṣar kuchh na huā. Tab lāchār ho kar us ne fauj ham-rāh lī, aur Dihlī ko kūch kiyā. Is nā-'āqibut-andesh Kaiqubād Ibn-i-Qarā Khān ne apne bāp se larne ke wāste bhī hasb-i-fahmā'ish apne wazīr ke fauj jam' kī; aur ba-irādah-'i-jang-donoṇ faujon kā muqābalah Ghāgrā Daryā par huā. Qarā Khān ne jānā kī larā'ī hogī; is liye ek muḥabbat-āmez khatt is nā-khalaf bete ke nām likhā, aur us meṇ yih mazmūn darj kiyā, ki "Larā'ī se pahle ek daf'ah mulāqāt kā honā zarūr hai." Wuh khatt parh kar Kaiqubād ke dil par aṣar huā, aur chāhā kī bāp se milūn; magar us wazīr kī shārārat se yih paighām bhejā, ki "Mujh ko Bādshāh-i-Hind samajh kar awwal mulāqāt meṇ khud ā kar ḥāzīr hō." Qarā Khān ne, yih samajh kar kī mauqa' mulāqāt kā hāth se na jā'e, maṇṣūr kiyā. Chunāwchi Kaiqubād takht par baithā, aur hukm huā kī Qarā Khān tin daf'ah ādāt-i-shāhī bajā lā'e; aur naqīb ne ba-āwāz-i-baland pukār kar kahā, ki "Qarā Khān Jahān-panāh ke ḥuṣūr meṇ iltijā lo kar ḥāzīr huā hai." Yih be-'izzatī dekh kar Qarā Khān āpsū bhar lāyā: Kaiqubād bhī ba-miṣḍāq-i-miṣra'ah—

Jab ankhen chār botī haiṇ, murūwat ā hī jāti hai.

yih hālat na dekh sakā; takht se utar kar bāp se baghal-gīr ho kar milā, aur bāp ko takht par biṭhā kar us ke sāmne mujrā kiyā. Phir bāp aur bete meṇ ṣafā'ī ho ga'ī: bīs roz tak mutawātir ba-khu-shī mulāqāt rahī. Qarā Khān ne apne is farzand-i-nā-arjumand ko bar waqt-i-rukhsat bahut naṣihat kī. Magar wuh 'aql kā dushman jab Dihlī meṇ āyā, phir sab naṣihat bāp kī bhūl gayā, aur 'aish o 'ishrat meṇ maṣrūf huā, aur anjām-i-kār us ko fālij ho gayā.

Us waqt darbār meṇ ka'ī fariq ho ga'e: Mughal to ṭaraf-dār Kaiqubād ke the, aur qaum-i-Khiljī apnī qaum se kisi ādmī ko bādshāh banāne kā irādah rakhtī thī. Is liye donoṇ firqoṇ kī faujeṇ muqābil hū'īn: Khiljiyōṇ ne Mughloṇ ko haṭā kar Jalālu-d-Dīn Fīroz ko bādshāh banā liyā, aur chand ādmiyōṇ ko mahall meṇ bhejā. Unhoṇ ne wahāṇ jā kar Kaiqubād Bādshāh ko sonṭoṇ se mār kar us kā bhejā nikāl dālā; aur us kī lāsh khirkī kī rāh Daryā-i-Jamnā meṇ dāl dī. Us ke marne par Khāndān-i-Ghorī tamām huā. Yih bādshāh san 1288 'Isawī meṇ mārā gayā.

## BĀB-I-PANJUM—SALTANAT-I-KHILJIYĀN.

(San 1288 'Isawī se san 1321 'Isawī tak.)

### JALĀLU-D-DĪN FĪROZ.

Sattar baras kī 'umr meṇ Jalālu-d-Dīn Fīroz Khiljī takht-i-Hind par san 1288 'Isawī meṇ mutamakkin huā. Yih shakhs Khāndān-i-Khiljī kā awwal bādshāh hai. Jab ki takht-i-saltanat par jalwa-afroz huā, usī waqt us ne Kaiqubād ke beṭe ko, jo abhī tak ṣaghīr-sinn thā, qatl karwā dālā. Širf yihī ek khūn-i-nā-ḥaqq is ne apnī zindagi meṇ kiyā, phir kisi ko nahīṇ mārā, aur nihāyat raḥm aur inṣāf aur shafaqat se ra'ayā ke sāth is ne sulūk kiyā. San 1294 'Isawī meṇ is ne Dakhan ko fath kiyā. Aur Alā'u-d-Dīn ne, jo is bādshāh kā bhatijā thā, ijāzāt-i-ghāhī ḥāsil kar ke junūb ke rājā'oṇ par charbā'ī kī; aur Qarā meṇ pahunḥ kar fauj-i-barjasta taiyār kī; aur Daryā-i-Narbadā ke pār ho kar Deo Gadḥ, ya'nī Daulatābād, ke rāja se muqābalaḥ kiyā. Rāja do mil shahr ke bahar ā kar jang-āzmā huā: Alā'u-d-Dīn kī fath hū'ī, rāja ne shikast pā'ī. Shahr meṇ Alā'u-d-Dīn kī fauj ne ghus kar tamām shahr ko lūṭ liyā. Kahte haiṇ ki bārah man se ziyādah motī, almās, la'ī, zamurrad, yāqūt, aur chāṇḍī sonā Alā'u-d-Dīn ke, hāth lagā. Yih sab daulat le kar us ne apne ghar ko murāja'at kī. Jalālu-d-Dīn Fīroz ko jab yih khabar pahunḥī, ki us



ke bhatije, Alā'u-d-Dīn, ne Deo Gadh ko fath kar liyā, aur wahān se wuh is qadr māl o daulat lāyā hai, ki kisi bādshāh-i-sābiq ke pās bhī is qadr daulat na thī, ṭama' ne is bāt par us ko āmāda kiyā, ki Alā'u-d-Dīn se wuh daulat le le. Mushīrān-i-shāhī ke mashwarah ke ba'd yih ṣalāh ṭhahri, ki jab tak Alā'u-d-Dīn sar-kashī na kare, tab tak khāmosh rahnā munāsib hai. Alā'u-d-Dīn ko ba-khūbī ma'lūm thā, ki us ke dushman darbār men bahut hai; is liye us ne irādah kiyā, ki kisi tarah bādshāh ko qaid karūn. Is liye apne bhā'i Almās Beg ko bādshāh kī khidmat men bhejā, ki wuh jā kar bādshāh ko fareb de, aur maqām-i-Qarā par kisi tarah le ā'e. Chhunānchi us ne jā kar 'arz ki "Agar Huzūr wuh daulat, jo Alā'u-d-Dīn lūṭ kar lāyā hai, lenā chāhte hai, to maqām-i-Qarā par us se mulāqāt karen." Jab bādshāh ma' fauj-i-shāhī maqām-i-muqarrarah par pahunchā, to Alā'u-d-Dīn us ke istiqbāl ke wāste shahr ke bāhar niklā, aur bhā'i se kahā "Bādshāh ko samjhā de ki mulāqāt ke waqt is qadr hujūm aur bhīr bhār ādmīyon kī apne ham-rāh na lā'en." Chhunānchi bādshāh ne aisā hī kiyā. Alā'u-d-Dīn ke lashkar ne bādshāh ko fauran gher kar qatl kar dālā, aur us kā sar kaṭ kar ek barehī par rakh kar sarī fauj men phirāyā. San 1295 'Isawī men yih wāq'ah huā; aur kull sāt baras Jalālu-d-Dīn ne bādshāhat kī.

#### 'Alā'u-d-Dīn.

'Alā'u-d-Dīn apne chachā, Fīroz, ko qatl kar ke Dihlī kī taraf gayā, aur shāh-i-maqtūl ke larke ko khārij kar ke san 1295 'Isawī men takht-i-saltanat par julūs-farmā huā. Umarā aur ra'āyā ke dil se is gunāh ke bhulāne ke wāste ra'āyā ko sair aur tamāshe se bahlāyā, aur umarā ke darje barhā'e. Yih shakhs apne waqt men maghrib kī taraf Mughlon se aur Dakhan kī taraf rājā'on se hamesha laṭā rahā. Gujrāt fath kiyā, Ajmer ko lūṭā, Somnāt ke barābar ek Masjid banā'i, Budh kī mūrāt phikwā di, aur aṣli bāshindon kī kitāben jalā dālīn. Wahān ke rāja kī rānī, Kamlā Dewi, jo ki us waqt husn men be-naẓir thī, aur ek ghulām khūb-ṣūrat, Musammā Kāfur, donon 'Alā'u-d-Dīn ke haṭh ā'e. Kamlā Dewi ko ghar men dākhil kiyā, aur Kāfur ko barā 'uhdah

diyā. Is bādshāh ke ‘ahd meṇ Mughlōn se ek nihāyat sakht larā’i hū’i, jinḥōn ne Sindh se le kar Dīhli tak ke mulk ghārat kar ke Dīhli ko ā kar muḥāṣarah kar liyā thā. Is larā’i meṇ us ne fath pa’i. Agarchi ‘Alā’u-d-Dīn ek nā-khwānda bādshāh thā, aur us ko likhnā parḥnā kuchh na ātā thā ; magar bā-wujūd is jahālat ke us ne irādah kiyā thā, ki ek nayā mazhab Hindustān meṇ aisā qā’im kare, jis meṇ Hindū aur Musalmān donoṇ sharik ho kar ‘ibādat kar sakeṇ. Lekin is ide se us ke wazīroṇ aur qāziy-i-shahr ne us ko bāz rakhā. Dūsre yih khayāl us ke damāgh meṇ samāyā thā, ki Hindustān meṇ ek nā’ib-i-salṭanat muqarrar kar ke āp dunyā ke aur mulkoṇ ko fath karne ko jā’e. Yih bāt bhī us ke dil se is taur par daf’ ki ga’i, ki “Abhī tak salaṭnat-i-Hind meṇ futūr barpā hai ; tamām qit’at Hind ke maftūh nahīn ho sake haiṇ. Jis mulk par qabḥah hai, usī ko qābū meṇ rakhnā bahut hai.” Us ne thoṛī hī muddat meṇ isti’dād-i-‘ilmī paidā ki, aur likhnā parḥnā khūb sikhā ; yahān tak ki mushkil kitāben parḥ letā thā, aur ma’nā achebhī tarah bayān kar saktā thā. Ek roz us ne wuzarā ko jam’ kar ke mulk ki be-intizāmī ki wajh pūchhī. Unḥōn ne ‘arḥ ki, ki “Bādshāh ki shārāb-khwāri se, aur umarā ki āpas meṇ shādī karne se, aur fauj ko tankhwāh ziyādah milne se, aur nirkh ghalle kā yaksān na hone ke sabab se yih futūr barpā ho rahe haiṇ.” Us roz se us ne shārāb kā pinā chhor diyā, aur hukm diyā ki ko’i amīr shārāb na piye. Chunānchi sab ne shārāb ki botaleṇ galiyon meṇ phenk diṇ ; har ek gali se nadī shārāb ki bahne lagī. Aur hukm kiyā ki bidūn hukm-i-shāhī ke umarā āpas meṇ shādī na karne pā’eṇ. Aur māl barābar karne ki fikr meṇ us ne irādah kiyā, ki tamām ra’iyat ko muflis kar de ; aur ghalle kā nirkh apnī marḥi ke muwāfiq muqarrar kar diyā. Us waqt us ki fauj meṇ chār lākh pachhattar hazār sawār the.

San 1303 ‘Isawī meṇ us ne ba-rāh-i-Bangāla Tilangāna par fauj-kashī ki, magar Chittor par khud ḥamlah-āwar huā ; aur yih dūsra ḥamlah Chittor par thā. Pahlī daf’ah ek ḥamlah Padmanī ke wāṣṭe kiyā thā, jo Bhīm, Rāja-i-Chittor ki bibī nihāyat ḥasīn aur ṣāhib-i-jamāl thī. Chunānchi us ne shahr kā muḥāṣarah kiyā, aur rāja ko paighām diyā, ki “Agar apnī bibī ko de de to muḥāṣarah nḥ jā’e.” Magar us ne yih darkhwāst manḡūr na ki

Tab us ne yih dārkhwāst kī, kī “Şīrf ek daf’ah us kā jamāl mujh ko dikhā de.” Us ko rāja ne taslīm kiyā. Chunānchī aīsā hī huā, kī ‘Alā’u-d-Dīn ne ma’ chand ādmīyon ke shahr men ghus kar ek ā’ina ke ‘aks men us kī şūrat dekhī, aur rāja ko apne ham-rāh letā āyā, aur daghā kar ke rāja ko pakaṛ liyā; aur hukm diyā, kī “Agar tū Padmanī ko na degā, to rihā’i na hogī.” Us kī bibī ne yih khabar pā kar bādshāh ko likhā, kī “Main is shart se tumhāre pās āti hūn, kī merī saheliyon ~~me~~ sat sau doliyan mere ham-rāh a’engī.” Us na-‘aqibat-andesh ‘āshiq ne manzur kiyā. Us ne sipāhī doliyon men biṭhlā kar shāhī lashkar men bhej diye. Sipāhiyon ne ā kar rāja ko ek doli men biṭhlā kar lashkar se bāhar nikāl diyā; aur rāja tez-rau ghore par sawār ho ke Chittor men jā pahunchā. Yahan sipāhiyon ne kushṭ o khūn shurū’ kiyā. ‘Alā’u-d-Dīn ne phir jā kar Chittor ko gher liyā, lekin fath na kar sakā, nākām phir āyā.

San 1308 ‘Isawī men phir Chittor kā muhāsarāh bādshāh ne kiyā. Is hamle men tamām beṭe rāja ke kām a’e: şīrf ek beṭā, jis ko rāja ne khud hukm diyā thā, kī wuh bhāg jā’e, tā kī us se us kī nasl qā’im rahe, bach gayā. Jab ko’ī şūrat bachne kī na rahī, tab shahr ke ‘ālī khāndān kī ‘auraton ne lakṛiyan jam’ kar ke āg lagā di, aur us men ma’ Padmanī ke gir ke jal ga’iṇ. Rāja ma’ chand babāduron ke darwāze ke bāhar nikal kar larā, aur dād-i-mardānagī de kar mārā gayā. Bādshāh ne shahr men ghus kar wuh chatā dekh kar, jis men Padmanī jal kar marī thi, afsos kiyā, aur ‘imārāt-i-baland aur maṇḍir sab munhadim karā ke mismār kar diye. Isī aṣnā men khabar ā’ī, kī Mughlon ne mulk-i-Panjāb ko lūṭ kar Dihlī tak tākht o tārāj kar diyā. Wahan se ā kar san 1306 ‘Isawī men Mughlon ko shikast de kar Daryā-i-Sindh ke pār gayā; aur jis qadr qaidī pakre the, un ke sar kāṭ kar un kī khopriyon ke minār Dihlī men banā’e; aur ‘auraton aur larṛkiyon ko farokht kar dālā. Aur chūnki Deo Gadḥ, ya’nī Daulatābād, ke rāja ne khirāj ke dene men der kī thi, is wāste us par fauj rawāna kī. Us fauj kā sardār Malik Kāfūr thā. Us ne Dewal Dēvī ko, jo Kamālā Devī kī beṭī awwal Hindū khāwind se thi, pakaṛ liyā. Yih larṛkī ab jawān ho ga’ī thi aur khūb-şūratī men apnī mān ke barābar thi. Jab wuh Dihlī

men ā'i, bādshāh ke betē ne us se shādī kī. Kāfūr rāja ko pakar lāyā, aur ba-iqrār-i-īṭā'at us ko mulk 'aṭā kiyā. Kāfūr ne Tilangāna bhī fath kiyā, aur lūṭ kā bahut sā māl le kar Dihlī ko murāja'at kī. Bādshāh ne Kāfūr ko phir Dakhan kī taraf rawāna kiyā, tā ki salṭanat-i-Islām ko phailā'e. Chunānchi wuh samundar ke kināre tak gayā, aur rāh men Karnāṭik ke mulk ko ghārat kiyā, aur mandiron men se tamām sone kī mūraten lūṭ liṇ. Samundar ke kināre us ne ek masjid banā'i, aur bahut khazānah lūṭ kar Dihlī men lāyā. Bādshāh ne yih rūpiya 'alimon aur sardāron aur masākin ko taqsim kar diyā; aur pachās hazār se ziyādah Mughlon ko, jo Musalmān the, qatl karāyā. Bā-wujūd aisī ta'addī aur zulm ke, is bādshāh ke waqt men mulk aisā ābād thā, ki pahle kabhī na huā thā; aur tamām qalam-raw, khusūsan Dihlī, men nibāyat 'ālī-shān mahall, masjidon, hammām, qil'ā, aur madrase bante chale jāte the.

Jab ki Alā'u-d-Dīn ko auj ḥāṣil huā, to 'aiyāsh ho gayā. Aur Kāfūr kī niyat men fasād ā gayā, aur us ne chahā kī mulk le le. Wuh sab sardāron men mumtāz sardār thā. Jab ki bādshāh kam-zor huā, mulk men jā-bajā sarkashī hū'i; is fikr se us kī bimāri barhtī ga'i. Chunānchi san 1316 'Isawī men bis baras salṭanat kar ke mar gayā. Ba'ze yih kahte haiṇ ki Kāfūr ne us ko zahr de kar mār dālā. Yih bādshāh sab Musalmān bādshāhon men, jo is se pable guzre the, barā zor-āwar aur himmat-war aur ulu-l-'azm thā. Sikandar-i-sānī, jo us ne apnā laqab sikke men rakhā thā, be-wajh na thā.

#### MUBĀRAK SHĀH.

Kāfūr ne Sulṭān Alā'u-d-Dīn ke intiqāl ke ba'd us ke do bare beton kī ānkhon nikalwā dālīn; aur sab se chhoṭe betē, Musammā ba 'Umar ko, jo saghīr-sinn thā, is khayāl se takht par biṭhāyā, ki wuh larkā barāe nām pādshāh rabe, aur Kāfūr khud ḥukumat kare. Magar paintīs din ke andar hī amīron ne us ko qatl kar dālā; aur Mubarak Khiljī ko, jo Alā'u-d-Dīn kā ek hī betā thā, san 1317 'Isawī men takht par biṭhāyā. Is nā-mubarak bādshāh ne takht par baithte hī unhīn sardāron ko, jinhon ne us ko takht par biṭhāyā thā, qatl karnā shurū' kiyā; aur nibāyat nā-lā'iq

aur kaminon ko 'uhde aur darje dene lagā; aur ba'ze sakht qānūn, jo us ke bāp ke muqarrar kiye hū'e the, mansūkh kar diye; aur ba'z achchhe ā'in bhī radd kar dāle. Gujrāt ko do-bāra us ne tābi' kiyā, aur Dakhan men hamle kiye aur fath pā'i; Malebār ko us ne fath kiyā. Kam-bakhti jo ā'i, to us ne Malik Khusrau ko, jo dil men irādah khud bādshāh hone kā rakhtā thā, apnā muṣāhib aur mushīr banāyā. Us ne bādshāh ko lahv o la'ib aur 'aiyāshī aur harām-kārī men bahut mashghūl kiyā, yahān tak ki wuh bad-nām ho gayā. Us waqt Malik Khusrau ne bādshāh ko marwā dālā, aur khāndān-i-Khiljī kā khātimah kar diyā. San 1321 'Īsawī men Mubārak marā gayā: kull chār baras ke qarib us ne bādshāhat ki.

### BĀB-I-SHASHUM—KHĀNDĀN-I-TUGHLAQ.

(San 1321 *Īsawī* se san 1412 *Īsawī* tak.)

#### GHİYĀSU-D-DĪN TUGHLAQ.

Malik Khusrau jab Shāh Mubārak ko mār kar takht par baith gayā, to umarā aur ra'iyat us ke zulm se nārāz hū'e. Abhī us ko ek sāl bhī na guzrā thā, ki Ghāzī Beg Tughlaq, jo Sūbah-dār-i-Multān thā, ek barī fauj le kar Dīhlī par āyā; aur Khusrau ko qatl kar ke takht-i-Dīhlī par umarā ki rizā-mandi se julūs-farmā huā. Tughlaq aśl men Balban kā ek ghulām thā; taraqqī pā kar Multān kā Sūbah-dār ho gayā thā. Is ne saltanat ke kār-o-bār ko bahut 'aql o intizām se anjām diyā. San 1321 'Īsawī men wuh bādshāh huā, aur apnā khitāb Ghīyāsu-d-Dīn Tughlaq muqarrar kiyā, aur apne beṭe Alaf Khān ko apnā walī-'ahd ṭhahrāyā. Is bādshāh ne saudāgarī ko taqwiyaat di; ahl-i-'ilm ko apne darbār men jam' kiyā. Alaf Khān ne us ke hukum se Tilangāna par fauj-kashī kī, aur Wāranagol ko fath kiyā, aur hazārā Hindū'on ko qatl kiyā, aur wahān ke rāja ko ma' us ke qabile ke pakar kar Dīhlī ko rawāna kiyā. Aur Ghīyāsu-d-Dīn ne Bangāle ke sūbah ko zer kiyā. Magar bar-waqt bāz-gasht ke Afghānpūr men apne farzand, Alaf Khān, se milā: us ne apne bāp ki mulāqāt ke wāste tīn din ke 'arṣe men ek chobī mahall taiyār kiyā. Bāp ne beṭe se usī mahall men mulāqāt kī, lekin da'wat na khā'i. Jis waqt us mahall

se beṭā rukhsat ho gayā, wuh maḥall sauran bādshāh par gir parā, aur bādshāh ma' apne rufaḳā ke dab kar san 1225 'Isawī meṇ mar gayā. Is wāridāt se ba'ze mu'arikh gumān karte haiṇ, ki Alaf Khān ne is fareb se apne wālid ko āp mārā thā. Us ne sirf ḡhar baras saltanat kī.

SULTĀN MUḤAMMAD, 'URF, ALAF, YĀ ALAḠH KHĀN.

Ghiyāsu-d-Dīn Tughlaq ke marne ke ba'd us kā beṭā, Sultān Muḥammad san 1325 'Isawī meṇ takht-nishīn huā. Is meṇ mukhtalif shifateṇ jam' thīṇ; magar un sab par dīwana-pan ḡhalīb thā. Wuh 'ilm bhī parhā huā thā aur 'ilm kī taraqqī bahut chāhtā thā, aur shujā'at meṇ bhī ḥadd se ziyādah thā; mā-siwā is ke apne buzurgoṇ se ziyādah wāḥmī aur ḡalīm aur be-raḥm bhī thā. Is ke waqt meṇ har ek hafte meṇ ek do amīr māre jāte the. Akṣar ṣūboṇ par, jo us kī be-intizāmī aur ḡulm se munḥarif ho ga'e the, fath-yāb huā; magar ṭama' ke sabab se us kā mulk sar-sabz na huā. Jab kī Narbadā aur Kirishnā kā mulk fath kar chukā, lākh sawār Koh-i-Himāla kī rāh se Chīn par is hawas se us ne rawāna kiye, kī wabān daulat bahut hai. Magar us kā yih natijah huā kī eḥand ādmī phir kar ā'e, aur bāqī sab pahār meṇ māre ga'e; aur jo log phir kar ā'e the, un ko bādshāh ne mār dālā. Jab aisi behūda muhimmoṇ meṇ zar-i-khaṭīr sarf ho gayā, tab kharāj kī taufīr meṇ koshish kī. Is sabab se tamām rā'āyā tang ā'ī, aur sab rāja aur ṣūbe bigar ga'e. Deo Gadḥ, jis kā nām us ne Daulatābād rakhā thā, us ko pasand āyā; aur us ne chāḥā kī Dihli ko wirān kar ke us ko basā'ūṇ. Is liye us ne ḥukm diyā kī sukanā-i-Dihli Daulatābād meṇ jā kar baseṇ. Chunānchī log jabraṇ wāḥān basā'e ga'e, aur Dihli wirān kī ga'ī. Hazāroṇ ādmī qahṭ aur muṣliṣī ke bā'is se us ke 'ahd meṇ halāk hū'e. Us ne ḥukm diyā ke bare bare darakht jar samet uṭhā kar Daulatābād kī sarak par lagā'e jā'eṇ. Ek daf'ah us ne Qannauj par ḥamlah kiya, aur shahr ke ās pās ke logoṇ ko be-quṣūr qatl kar dālā. Ek daf'ah us kā ek dānt ṭuṭ gayā thā; us ko ba-tajammul-i-shahāna ek jagah dafn karwāyā, aur ek 'umdah qabr us dānt kī banwā di. Multān aur Tilangāna aur Bangāla aur

Shūbah-i-Awadh ko, ki us se munharif the, aur Panjāb kī qaum Ghaggar ko us ne maghlūb kiya; magar mulk men ghadr aur be-amnī aur be-intizāmī ba-kaṣrat thī. Isī asnā men kisī ‘arīzah men muḩtalā ho kar san 1351 ‘Īsawī men sattā’is baras saltanat kar ke mulk-i-‘adam ko sidhārā.

#### FĪROZ SHĀH.

Sultān Muḩammad Shāh ke intiqāl ke ba’d us kā bhatijā, Fīroz Shāh, san 1351 ‘Īsawī men bādshāh huā. Agarchi yih bādshāh ‘āqil aur ‘ādil thā, lekin is qadr qābiliyat is men na thī, ki Muḩammad Shāh ke ‘ahd men jo pareshānī aur abtarī ho ga’i thī, us kā intizām kartā, aur saltanat ko mustahkam kar ke raunaq detā; yā un mulkon ko, jo us ke qabṣe se nikal ga’e the, phir az-sar-i-nau muṭī’ kar letā. Chunānchi Mulk-i-Dakan men ek shakhs, ḩasan nāmī, khud-sar ho kar bādshāh ban gayā, aur ka’i sau baras tak us ke khāndan men ‘alā-l-ittisāl saltanat qā’im rahi: aur Mulk-i-Bangālā bhī Fīroz Shāh ke bāth se nikal gayā. Magar jis qadr shūbahāt us ke mā-taht rahe, un kā intizām us ne khūb kiya; aur itne hī mulk ko us ne raunaq bakhshī. Bahut qism ke mahṣūl, jo khālī az zulm na the, us ne mu’af kiye; aur kharāj men bhī takhṭif kī. ‘Alāwah az-in taraqqiy-i-zirā‘at aur fa’idah-i-‘awāmm ke wāṣṭe 30 nahren, aur 100 pul, aur 40 masjiden, aur 30 madrase waghairah ta’mīr kiye. Yih bādshāh Dihli ke bare nek-nām bādshāhon men shumār kiya jāta hai. Akhīr-i-san 1388 ‘Īsawī men sinn-rasīda ho kar apnī qazā se us ne intiqāl kiya, aur artīs baras saltanat kī.

#### SULTĀN MAḩMŪD.

Fīroz Shāh ke intiqāl ke ba’d takht-nishīnī kī bābat barā fasād huā: chār bādshāh pai-dar-pai takht par baithe. Chunānchi Sultān Muḩammad Ghiyāṣ-u-d-Dīn Tughlaq-i-Sānī san 1388 ‘Īsawī men, aur Abū Bakr san 1389 ‘Īsawī men, aur Nāṣiru-d-Dīn Muḩammad Tughlaq-i-Sālīs san 1391 ‘Īsawī men, aur Humayūn san 1394 ‘Īsawī men bādshāh hū’e. Chūnki in sab ke aiyām-i-saltanat men siwāe fasād-i-mulkī aur tanāzu-i-saltanat aur be-intizāmīy-i-ra’ayā

ke aur ko'ī barā ḥādīṣah yād rakhne ke lā'iq nahīn hai, is liye in sab ko ehhoṛ kar Sulṭān Maḥmūd kā zikr likhtā hūn, jo ki in sab ke ba'd san 1394 'Isawī meṇ takht par baiṭhā. Is bādshāh ke san-i-julūs se tīs baras peshtar Iqlim-i-Fāras meṇ aisī abtarī wāqī' hū'ī thī, ki wahān kā har ek ṣūbah munḥarif ho gayā thā; aur Samarqand, aur Mā-Warā'u-n-Nahr aur Khurāsān, aur Kābul, aur Qandahār ke akṣar ḥākim bāham nizā' karte chale āte the. Us waqt Mulk-i-Tātār aur Chīn kī bādshāhat bhī za'if ho ga'ī thī, aur qarib thā ki Salṭanat-i-Hind bhī tabāh ho jā'e. Ghuraz ki Eshiyā ke tamām mulkon meṇ ghadr machā huā thā; usī zamāne meṇ Amīr Timūr ne bhī Hindustān par charḥā'ī kī.

#### TIMŪR.

Timūr, jo Eshiyā meṇ barā nāmī bādshāh huā hai, agarchi kisī ṭarah kā haqq yā da'wā Hindustān par na rakhtā thā; magar chūnki is mulk ke fath karne kī us ko khwābīsh thī, aur Hindustān kī be-intizāmī ke sabab se us ko yaqīn thā, ki main kām-yāb hūngā, is liye apnī rawānagī ke qabl us ne apne pote, Pīr Muḥammad, ko ma' fauj ke Hindustān ko rawāna kiyā, aur khud san 1398 'Isawī meṇ Samarqand se kūch kar ke Daryā-i-Sindh par āyā. Jis jagah se Sikandar utrā thā, usī jagah se wuh bhī daryā-i-mazkūr par pāyāb utar kar Multān ko, jabān us kā potā, Pīr Muḥammad qābiṣ o mutaṣarrif ho chukā thā, pahunchā; aur wahān se us kī fauj ham-rāh le kar us ne barā ghalbah pāyā. Timūr das hazār sawār-i-āzmūda-kār le kar Bhatnīr kī ṭaraf, jo bayābān ke kināre par wāqī' hai, rawāna huā, aur shahr ke darwāze par pahunch gayā. Shahr ke andar jo fauj thī, us ne dekhā, ki Timūr ke sāth lashkar qalīl hai, is liye dilerāna shahr ke bāhar nikal kar larī; lekin tāb ḥamlah-'i-Mughliyah kī na lā kar pas-pā hū'ī, aur shahr ko bhāgī. Timūr kī fauj ne bhī barābar dhāwā kar ke shahr meṇ ghus kar apnā dakhil kar liyā; magar qil'ah par abhī tak qabḥah na huā thā. Timūr ne ḥukm diyā, ki "Wuh pān sau ādmī, jo hamāre pote, Pīr Muḥammad, se 'inād rakhte haiṅ, qatl kiye jā'eṅ." Yih ḥāl dekh kar wuh Hindū, jo Qil'ah-i-Bhatnīr par qābiṣ the, āp se bāhar ho ga'e, aur shahr ko āg lagā



dī, aur apne zan o farzand ko apne hāth se āp qatl kar ke fauj-i-Mughal par ā paṛe. Agarchi unhoṇ ne Tīmūr ke ka'ī bazār ādmī qatl kiye, magar un meṇ se bhī ek na bachā. Is nuqṣān ko dekh kar Tīmūr kī ātish-i-ghaṣab bharak ga'ī; ḥukm diyā ki tamām shahr meṇ qatl-i-'āmm kiyā jā'e. Ba'd az-ān Tīmūr tamām mulk ko wirān kartā huā san 1398 'Isāwī meṇ Dihlī ko āyā. Chūṅki us ke sāth qaidī bahut the, us ko khauf huā ki kahīṇ fauj par ḥamlah na karen, is liye un ko qatl kar dālā. Chunānchi ek lākh qaidī us jagah maqtūl hū'e. Sulṭān Maḥmūd, Bādshāh-i-Dihlī, ne chālīs hazār piyāde aur das hazār sawār ham-rāh le kar darwāze shahr ke band kar liye, aur maḥṣūr ho gayā. Amīr Tīmūr ne yih khayāl kiyā, ki "Agar is mustahkam-i-asās shahr kā muḥāṣarah karūṇ, to bahut 'arṣah hogā," is liye wuh yih chāl chālā ki us ne ḥukm diyā, ki thore thore sipāhī shahr ke muqābil raheṇ, aur siwāe is ke aur 'alāmaten apnī kam-zorī kī dānista Maḥmūd ko dikhlā'īṇ. Chunānchi wuh fareb meṇ ā gayā, aur yak-bārgī tamām fauj le kar aur be-shumār bāthiyon kī saff bāndh kar shahr ke bāhar ā kar larne ko taiyār huā. Chūṅki Amīr Tīmūr kī fauj azmūda-kār thī, is liye us ne fath pa'ī, aur nā-tajribah-kār ghul machāne wālī jamā'at ko ek lamḥe meṇ parāganda kar diyā. Shāh Maḥmūd māyūs ho kar Gujrat kī taraf apne ahl-o-'ayāl le kar bhāg gayā; aur shahr wālon ne Tīmūr kī iṭā'at qubūl kī. Tārīkh-i-Firishta meṇ likhā hai, ki Tīmūr kī sipāh meṇ se kisī ne shahr ke bāshindon par dast-darāzī kī thī, is liye bāshindon ne jam' ho kar chand sipāhī qatl kar dāle. Is par Amīr Tīmūr ne us shahr ke lūṭne kā ḥukm diyā, aur niṣf se ziyādah shahr phūṅk diyā. Hindū māre ghai-rat ke sirī ho ga'e, aur apne hāth se apnī bibiyon ko qatl kar ke dushmanon par ḥamlah karne lage. Lekin Mughlon se kuchh pesh-raft na ga'ī, tamām kūchon meṇ klūn bahtā thā: aur thore 'arṣe ke ba'd ṣadhā bāshinde shahr ke jalā-waṭan kiye ga'e. Tīmūr ne takht-i-Dihlī par julūs farmāyā; aur apne ta'īṇ Bādshāh-i-Hind maḥbūr kar ke pandrah roz Dihlī meṇ rah kar Gangā kī taraf kūch kiyā, aur Harduār pahunchā; aur wahāṇ se Himāliya pahār ke niche niche wahāṇ ke bāshindon se lartā huā Lāhor meṇ āyā. Yahāṇ jo fasād ho rahā thā, us ko faro kar ke Sindh pāṇ ho kar Salṭanat-i-Rūm par chaḥā'i kī, aur Bukhārā ko fath kiyā; aur

muddat tak wuh mulk ūs kā muṭī' rahā. Lekin Hindustān se Timūr ke jāne ke ba'd us kī ḥukūmat Hindustān meṇ kuchh yon hī sī barāe nām rah ga'ī. Sikkah us ke nām kā be-shakk jāri thā, magar rāja barāe nām us ke muṭī' the : har ek ṣubah chand roz ke ba'd khud-sar ho gayā. Shahr-i-Dihlī, jo wirān ho gayā thā, pbr ābād hone lagā ; aur dast ba-dast ek ke qabṛe se dūsre ke qabṛe meṇ āyā. Maḥmūd Shāh kā yih hāl thā, ki kabhī hawas-i-bādshāhat se dast-kash ho kar tāriku-d-dunyā bantā thā, kabhī laqab-i-shāhī bahāl rakhne meṇ sā'ī aur sar-gārm-i-ḥukūmat hotā thā ; yahan tak ki san 1414 'Īsawī meṇ bis baras barāe nām saltanat kar ke wafāt pā'ī. Aur Khizr Khān, Wāliy-i-Multān, ne Dihlī kā takht ba-taur niyābat-i-Timūr ke ḥaṣil kiya : us waqt Dihlī meṇ āsāyish kī ṣurat dikhla'ī dī.

## BĀB-I-HAFTUM—KHĀNDĀN-I-SADĀT.

### KHIZR KHĀN.

Saiyidon ke khāndān ne Dihlī ke takht par ṣirf chhattis baras, ya'nī san 1414 'Īsawī se san 1450 'Īsawī tak saltanat kī. Is khāndān meṇ se Dihlī kā pahlā bādshāh Saiyid Khizr Khān thā. Us ne Maḥmūd Shāh Tughlaq kī wafāt ke ba'd, jis par Tughlaqī Khāndān khtm huā, Shāh Rukh Ibn-i-Timūr ke waqt meṇ sāth hazār sawār le kar Dihlī par ḥamlah kiya, aur us ko qabṛe meṇ lā kar san 1414 'Īsawī meṇ takht-i-Dihlī par julūs kiya. Is ḥākim ne ba-tamām-i-istiqlāl-o-dānū'ī saltanat aur ḥukūmat kī. Us ne bādshāh apnā laqab nahīn muqarrar kiya ; balki Nā'ib-i-Timūr kahlā'e jāne par qanā'at kī, aur Shāh Rukh kā sikkah aur khuṭbah jāri rakhā. Qurb-o-jiwār ke chhoṭe chhoṭe sardāron par, jinhon ne itā'at tark kar dī thī, lashkar-kashī kī, aur ba'zon ko muṭī' kiya ; magar bare bare bāghī ba-dastūr khud-mukhtār rahe. Agarchi us ke zamāne meṇ Bangāla aur Gujrāt aur Dakhan kī taskhīr kā ḥaṣalah nahīn rahā thā ; magar Dihlī, Āgra, Multān, aur Lāhor us ke zer-i-ḥukm the. Yih bādshāh san 1421 'Īsawī meṇ sāt baras bādshāhat kar ke rah-girā-i-'Ālam-i-baqā huā.

## SAIYID MUBĀRAK SHĀH.

Mubārak, us kā beṭā, san 1421 'Īsawī meṇ takht par baiṭhā. Us ne chaudah baras saltanat kī, magar miṣl apne wālid ke dushmanon ke muqābale se furṣat na pā'ī. Yih shakhṣ tadbir-i-jang aur intizām-i-mamlikat meṇ hoshyār thā. Is sabab se bahut se bāghī ṣubon ko us ne zer kiyā, aur us ke 'adl se ra'iyat ne āram pāyā. San 1435 'Īsawī meṇ apne namak-harām Wazīr, Sarwaru-l-Mulk, kī sāzish se nāgahān ek masjid meṇ namāz parṭhe meṇ Hindū'on ke bāth se, jin ko us ne kabhī kuchh bhī izā na dī thī, maqtūl huā.

## SAIYID MUHAMMAD SHĀH.

Sarwaru-l-Mulk, Wazīr-i-Aẓam-i-namak-harām, ne bādshāh Mubārak ke beṭe, Muḥammad, ko takht par biṭhāyā, aur ap us kā Wazīr-i-Aẓam huā; aur un Hindū'on ko, jo us ke, dost the, us wazīr ne barī barī khidmaton bakhshīn aur Kāle Khān ko apnā nā'ib muqarrar kiyā. Jab ki sarkashon ne zor pakrā, aur Kāle Khān un kī tambih ke wāste māmūr ho kar un ke muṭī' karne ko gayā, to wuh khud un se mil kar Dihlī par ma' bāghiyon ke charḥ āyā. Bāghiyon ne Wazīr-i-Aẓam ke marwā dālne kī darkhwāst kī: chunānchi Wazīr-i-Aẓam, Sarwaru-l-Mulk, ḥasbu-l-hukm Muḥammad Shāh ke mārā gayā. Bādshāh ne goyā apne bāp, Mubārak, kā qisās liyā, aur sar-kashon kī ātish-i-īnād bujh gā'i: aur Kāle Khān kī ban ā'ī, ki wuh Wazīr-i-Aẓam muqarrar kiyā gayā. Magar bādshāh ne apne ta'īn aise 'aish o āram meṇ dāl diyā thā, ki roz ba-roz saltanat meṇ zu'f ātā gayā; yahān tak ki ek shakhṣ, musammā Buhlūl Lodhī ne, jo Sarhind kā bāshinda thā aur bādshāh kī ṭaraf se Multān kā ṣubah-dār ho gayā thā, saltanat kā da'wā kiyā. Aur us kā bayān yih hai, ki jab Mālwa kā bādshāh fauj le kar Dihli se do mil ke fāṣile par ā pahunchā, to bādshāh ne Buhlūl odhī se i'ānat chāhī, aur Buhlūl ke āne par us ḥamlab-āwar se ṣulḥ ho g'āi. Magar Buhlūl ne ṣulḥ na mānī, aur bādshāh kī marzī ke barkhilāf, Mālwe kī fauj par charḥā'ī kī aur us ko shikast dī. Bādshāh ne is kār-i-numāyān ke bā'is Buhlūl Lodhī ko nayā khitāb de kar Multān kī ḥukumat par

mustaqill kar diyā. Us ne is bahāne se, ki “Main Hāsrat Khān Panjābī luṭere par ḥamlah karūngā,” Multān meṇ fauj jam‘ kar ke Dihlī par kūch kiyā; aur chār mahīne tak Dihlī kā muḥāsarah kiye parā rahā, magar fath na kar sakā. Ākhir ko Multān kī ṭaraf murāja‘at kī. Saiyid Muḥammad Shāh das baras tak saltanat kar ke san 1443 ‘Isawī meṇ faut huā; aur us kī jagah Alā’u-d-Dīn, us kā beṭā, bādshāh huā.

### SAIYID ALĀ’U-D-DĪN SHĀH.

Saiyid Alā-u-d-Dīn Ibn-i-Saiyid Muḥammad Shāh apne wālid kī wafāt ke ba’d san 1445 ‘Isawī meṇ takht-i-Dihlī par mutamakkin huā. Yih shakhs khatm kuninda-‘i-Khāndān-i-Sādāt aur barbad kuninda-‘i-saltanat-i-Dihlī aur barā kam-ḥaṣalah aur apne bāp se bhī ziyādah ‘aiyāsh thā. Is ke waqt meṇ saltanat-i-shāhī ko yahān tak zawāl āyā, ki bādshāh kā ḥukm sirf Dihlī se chand hī mil ird gird tak rah gayā, aur tamām śubajāt khud-sar ho ga’e; terah ādmī is saltanat meṇ khud-mukhtār ho kar ḥukm-rān ho baiṭhe. Aur bādshāh ne Shahr-i-Badāyūn meṇ ek baḡh banāyā thā; us kī ārastagī aur zebā’ish meṇ maṣrūf rahṭā thā. Jab chār ṭaraf se ḡhadr hone lagā, aur bādshāhat ke kār-o-bār meṇ khalal par gayā; tab bādshāh ne wazīron ko jam‘ kar ke tadbīr pūchhī. Unhon ne apnī bad-zātī se yih ṣalāḥ di, ki “Wazīr-i-A‘zam, Hamīd, ko ḥuzūr mauqūf kar deṇ. Yih sārī qabāḥat usī kī ḡālī hū’ī hai.” Bādshāh ne fareb khā kar Hamīd Khān, Wazīr-i-A‘zam, ko qaid kiyā; aur us kā yih irādah thā ki wazīr ko jald marwā ḡāle. Magar wazīr ne yih ebālākī kī, ki Badāyūn se Dihlī ko bhāḡ gayā; aur wabān jā kar tamām māl o asbāb-i-shāhī par qabḡah kar ke bādshāh ke ‘ayāl ko nikāl diyā, aur un se kahā, ki “Tum Badāyūn chalo jāo;” aur Buhlūl Lodhī ko likh bhejā, ki “Maidān khālī hai; āp jald tashrif lā’iye aur bādshāh Dihlī ke ban jā’iye. Ghanīm khetī meṇ maṣrūf hai; āp us kā phal khā’iye.” Us zī-ḥaṣalah aur baland-naḡar sardār ne fauraṇ kūch kar ke Dihlī meṇ pahunch kar tāj-i-shāhī sar par rakhā, aur san 1450 ‘Isawī meṇ takht par julūs farmāyā. Ab Saiyidon kā khātimah huā, aur Afghānon kā khāndān qā’im huā. ‘Alā’u-d-Dīn past-

himmat ne kuchh tankh̄wāh apnī muqarrar karwā lī; aur aṭṭhā'is baras tak apnī snir-gāh aur bāgh̄ meṇ, jo Badāyūn meṇ banwāyā thā, maze se zindagī kar ke san 1478 'Isawī meṇ wafāt pā'ī.

## BĀB-I-HASHTUM—KHĀNDĀN-I-LODHĪ.

(San 1450 'Isawī se san 1526 'Isawī tak.)

### SHĀH BUHLŪL KHĀN LODHĪ.

San 1450 'Isawī meṇ Buhlul Khān, Sūbah-dār-i-Multān-o-Panjāb, ne takht-i-shāhī hāsil kiya; aur Bādshāh Saiyid Alā'u-d-Dīn kī kuchh tankh̄wāh muqarrar kar ke Badāyūn meṇ us ko biṭhlā diyā. Isī shakh̄s se Afghān ke khāndān kī bādshāhat Hind meṇ shurū' hū'ī. Yih log bāshinde Daryā-i-Aṭak ke pachchhim kināre ke the. Sābiq meṇ Hind aur Irān meṇ saudāgarī kiya karte the. Fīroz Shāh kī hukūmat tak in logon kī kuchh qadr-o-manzilat na thī; magar us ke zamāne meṇ in ko kuchh haṣalah paidā huā thā. Kyaunki is Buhlul ke dādā, musammā ba Ibrāhīm, ne Fīroz Shāh ke darbār se aisā iftikhār pāyā thā, kī Multān kī hukūmat us ko mil ga'ī thī, jo ba-haqq-i-wirāsat Buhlul tak pahunchī thī. Aur roz ba-roz us ko taraqqī hoti ga'ī, aur saltanat-i-Dihlī ko zawāl ātā gayā; yabān tak kī Hamīd Khān, Wazīr-i-Azam, ke sabab se wuh bādshāh ho gayā. Magar Buhlul ne dekhā kī wazīr kī ṭāqat aur ikhtiyār bahut hai; is sabab se us ne mustaqill bādshāh ho kar pahle us wazīr bī ko barkhāst kiya; phir un sūbon ko, jo saltanat-i-Dihlī se munḥarif the, muṭī' karne par kamar bāndhī. Chunānchī chhoṭe chhoṭe ṣūbe sab muṭī' kiye. Magar Jawanpūr kā sūbah ṭāqat-war thā: garchi us se do daṭ'ah Buhlul Shāh larā, magar kuch fa'idah na huā. Thorē 'arṣe meṇ Mahmūd Shāh, Wāliy-i-Jawanpūr, ne wafāt pā'ī, aur us kī jagah bādshāh hone kī bābat tanāzu' huā. Buhlul ne phir ḥamlah kiya; magar Ḥusain Khān se, jo us kī jagah takht-nishīn ho chukā thā, chār baras ke wāste ṣulh ho ga'ī. Us waqt Buhlul Lodhī Panjāb kī sar-kashī faro karne āyā thā, kī Ḥusain Khān ne yakāyak Dihlī par fauj-kashī kī. Buhlul bahut jald wahān gayā, aur ka'ī larā'iyān hū'īn, magar kuchh fa'idah na huā. Phir kuchh muddat ke wāste ṣulh ho ga'ī. Shāh Buhlul

ke julūs se at̤thā'is baras tak Jawanpūr ki tāqat qā'im rahī; āk̤hīr-kār chand larā'iyon aur fareb aur bad-'ahdiyon ke ba'd Buhlul ghālib āyā. Husain Shāh apnā dārū-s-saltanat chher kar bhāg gayā, aur Buhlul Shāh us meṇ dāk̤hil huā. Us ne āsī baras ke ba'd is shūbe ko takht-i-Dihli ke tābi' kiyā. Buhlul ne sinṇ-rasīda ho kar apne ḥīn-i-ḥayāt tamām saltanat apne beṭon ko taqsim kar dī; aur yih amr aisā wāqī' huā, ki goyā khud us ne bunyād fasād ki dāli. Sikandar Lodhī ko, jo us kā barā beṭā thā, wali-'ahd Dihli kā muqarar kiyā; aur apne ehboṭe beṭon aur bhatijon ko ek ek shūbah ḥisṣe meṇ diyā. Āk̤hīrash san 1488 'Īsawī meṇ yih bādshāh artīs baras saltanat kar ke faut huā. Kahte haiṇ ki yih Bādshāh parbezgār aur mulkī tadābir meṇ hoshyār thā, aur ahl-i-'ilm se bahut mahabbat rakhtā thā.

#### SHĀH SIKANDAR LODHĪ.

Buhlul Lodhī ke marne ke waqt umarā ne chāhā ki Sikandar Lodhī ko takht par na biṭhā'on, kyūṇki wuh ek sunāran ke shikam se thā; magar un ke irāde ke bar-khilāf wuh takht par baiṭh gayā, aur untīs baras tak us ne bādshāhat ki. Us ne tamām shūbāt apne bhā'iyon se le kar saltanat-i-Dihli meṇ dāk̤hil kar liye; magar apne ek bhā'i Bārbak par, jis ko us ke bāp ne Jawanpūr kā mulk diyā thā, fauj-kashī ki; aur phir us kā mulk de diyā, is khauf se ki mahādā Husain Shāh, Wāliy-i-sābiq-i-Jawanpūr, jis ne Shūbah-'i-Binār par apnā qabẓah kar liyā hai, aur apnā maṣrūṣī mulk lene ki fikr kar rahā hai, is mulk ko bhī le le. Husain Shāh kā ta'āqub sipāh-i-shāhī ne, jo ek lākh thī, Bihār meṇ kiyā, aur us ko bhagā kar Bangālē ki sarḥadd tak pahun-chā diyā: wahāṇ jā kar wuh gum-nām mar-gayā. Sikandar Lodhī ne agarchi tamām 'umr lashar-kashī meṇ sharf ki, par sirf Chanderī ko fath kiyā aur kō'i shūbah us ke qabẓe meṇ na āyā. Us ki larā'iyon se mulk talāh huā, par saltanat ki zarā bhī ḥadd na barhī. Mathrā meṇ us ne masjidēn aur bāzār ta'mīr kiye, Hindū'on ko but-parastī se mumāna'at ki. San 1517 'Īsawī meṇ us ne intiqāl kiyā, aur us ki jagah us kā barā beṭā, Ibrāhīm Lodhī, bādshāh huā.

## IBRĀHĪM SHĀH LODHĪ.

San 1517 'Isawī men Ibrāhīm Shāh Lodhī, Sikandar Shāh Lodhī kā beṭā, takht-i-salṭanat par julūs-farmā huā. Yih bādshāh aisā maghrūr aur sar-kash thā, ki umarā ne us ke nakhwat aur ghurūr ke sabab se us kā sāth chhoṛ diyā, balki us ke khānlān ke tabāh karne ke dar-pae hū'e; chunānchi us ke bhā'i, Jalāl Khān, ko Jawanpūr kī hukūmat kā da'wī-dār muqarrar kiyā. Is amr men barā jhagrā aur fasād barpā rahā; yahān tak ki Jalāl Khān ne Jawanpūr par qabṣah kar liyā, aur Pādshāh ne fauj-kashī kar ke us ko bhagā diyā. Phir jab ki wuh giriftār ho kar āyā, to us ko Hānsī men qaid karne kā hukm diyā, aur muhāfizon se kahā, ki "Rāh men us ko qatl kar dālnā." Phir is Pādshāh ko apne ṣūbon par aisā shakk ho gayā, ki ka'ī ṣūbe us se khauf kar ke phir ga'e. Islām Khān ne chālis hazār sawār jam' kar ke Pādshāh par hamlah kiyā, jis men Islām Khān mārā gayā, aur us kī fauj ne shikast khā'i. Pādshāh ne tab darbār ke amīron par ziyādahat kar khafagī karnī shurū' kī; aur Bahādur Khān, Iḥakim-i-Bihār, ne bādshāhī khitāb khud ba-khud ikhtiyār kar ke ek lākh fauj jam' kī, aur ka'ī da'ah pādshāhī fauj ko shikast di. Is 'arṣe men Daulat Khān, Sūbah-dār-i-Multān, ne jab dekhā, ki is bādshāh ke waqt men kisī ṣūrat se aman nahīn hotā, aur Hindustān men tahlukah parā hai, aur bachāo kī ṣūrat naẓar nahīn ātī; to Shāh Bābar ko, jo Kābul men Mughlon kā pādshāh thā, yih likhā, ki "Hindustān men ā kar is mulk ko apne qabṣe men lā'o, aur Ibrāhīm Lodhī, pādshāh-i-zālim, ke panje se dunyā ko chhoṛā kar rahāt pahunchā'o." Chunānchi us ke likhne ke muwāfiq Shāh-i-Kābul Mulk-i-Panjāb ko lūṭtā aur tārāj kartā huā Dihli ko rawāna huā. Jab ki Pānipat pahunchā, to Sultān Ibrāhīm ne ba-zāt-i-khud muqābalaḥ kiyā, aur wahān Ibrāhīm Lodhī ke lashkar ko shikast hū'i aur wuh khud mārā gayā. San 1526 'Isawī men Khāndān-i-Mughaliyah ke hāth Hindustān āyā, aur Khāndān-i-Lodhī kā khātimah ho gayā. Is khāndān men tin pādshāh hū'e, jinhon ne chhahattar baras tak salṭanat kī.

BĀB-I-NAHUM—KHĀNDĀN-I-MUGHALIYAH.

BĀBAR BĀDShĀH.

Muḥammad Zahiru-d-Dīn Bābar, parotā Amīr Timūr kā, barā shūjā' aur bahādur bādshāh Mulk-i-Eshhiyā meṇ guzrā hai. Yih pādshāh san 1483 'Isawī meṇ paidā huā; aur is kā silsilah, māṇ kī ṭaraf se Changez Khān tak, aur bāp kī ṭaraf se Amīr Timūr tak, pahunchtā hai. Is ke bāp ne, jo Indjān aur Farghāna kā wālī thā, is laṛke ko honehār dekh kar bārah baras kī 'umr meṇ Indjān kā nāzim kiyā; aur wuh apne bāp ke intiqāl ke ba'd takht-i-khilāfat par baiṭhā. Is pādshāh kī 'ajib sarguzasht hai. Kabhī to wuh shahanshāh ho jātā thā, aur kabhī sau ādmī bhī us ke ham-rāh na hote the. Kabhī to wuh mālīk ek bare mulk kā thā, aur ek dam meṇ ek jhoprā bhī panāh lene ko us ke pās na rahtā thā. Jab kī wuh apne mulk-i-maurūṣī se nikālā gayā, to us ne sirf do san chālis ādmī jam' kar ke Samarqand par, jahān ek barī fauj maujūd thi, ḥamlah kiyā; aur yib tadbīr kī kī qarīb ādhī rāt ke shahr ke nazdik jā kar faṣīl par charḥ kar shahr ke andar dākhl ho gayā, aur wahān kuchh us ke ṭaraf-dār bhī sāth hū'e; phir yak-bārgī fath kā ghul machā diyā. Yih shor sun kar Samarqand kā pādshāh apnā dāru-l-khilāfat chhor kar bhāg gayā: Bābar fauran wahān kā pādshāh ho gayā. Thore dinon ke ba'd Samarqand ma' us ke muṣāfat ke us ke hāth se nikal gayā. Us ne Kābul par ḥamlah kiyā; wahān ke bāshindon ne be-intizāmiy-i-mulk ke bā'is se us kā ānā ghanimat jānā. Phir Qandahariyon ne bhī us ko tulāyā: wahān ā kar apne mukhālifon se aisā larā, kī chand amīr apne hāth se us ne qatl kiye. Is liye dushman kī tamām fauj us kī shujā'at dekh kar mutahaiyir ho ga'ī, aur sab ne us kī itā'at qubūl kar li.

Ba'd az-ān Bābar ne un azlā' par, jo Sindh ke qurb o jiwār meṇ wāqī' haiṇ, ka'ī ḥamle kiye; aur phir ek muddat ke ba'd Hindustān kā da'wā kiyā. Chunānchi terah hazār sawār le kar Dihli ko āyā; aur Ibrāhīm Shāh ek lākh sawār aur ek hazār hāthī le kar Pānīpat par ā kar ṣaff-ārā huā. Ibrāhīm ko fann-i-jang na ātā thā; tamām fauj ek jagah ṣaff bāndh kar kharī kar dī, jis ko



Bābar kī fauj ne ek ḥamlaḥ meṇ parāganda kar diyā. Magar Ibrāhim ne is par bhī dushman kī fauj ke qalb par ḥamlaḥ kiyā, aur wahān donon pādshāhon meṇ larā'ī hū'ī. Ibrāhim mārā gayā aur us kī fauj bhāg ga'ī; aur Bābar ne san 1526 'Isawī meṇ Dihlī ke takht par julūs kiyā.

Bābar ke waqt se Paṭhānon kī saltanat ko zawāl āyā. Ibtidā meṇ Bābar kī saltanat ko istiqlāl naṣīb na huā; kyūnki Paṭhānon ke sardār, jo mukhtalif azlā' meṇ ḥākim the, Bābar ko ghāṣib samajhte the; aur Rājput, jo qaum-i-Hunūd meṇ baṛe shujā' aur man-chale the, Afghānon ke taraf-dār the. Algharaz ek lakh ādmī ba-sar-kardagiy-i-Mahmūd, jo shāh-i-mutawaffā kā bhā'ī thā, Hindustān ke maghrib kī taraf jam' hū'e. Is waqt meṇ Bābar chāron taraf se dushmanon ke narghe meṇ ā gayā; magar wuh aīsā shujā' thā, ki us ne isamr se zarā lhī na khauf kiyā. Har-chand us ke sardāron ne ṣalāḥ dī, ki "Āp Daryā-i-Sindh par tashrif le chaleṇ;" par us 'ālī-himmat pādshāh ne itnī baṛī saltanat kā chhor denā munāsib na jānā, aur un ko yih jawāb diyā, ki "Muqtaṣā-i-ghairat yih hai ki lar lijiye. Dunyā meṇ ek da'fah marnā hai: pas yih bāt sab se bihtar hai ki lar kar mareṇ." Aur Shāh Nāmah ke maṣmūn-i-shujā'at-mashhūn ke aṣh'ār parḥ kar logon ko sunā'e. Aur chūnki us ke dushmanon meṇ akṣar Hindū the, us ne apnī fauj ke logon se kahā, ki "Yih log kāfir haiṇ; in se jihād karnā zarūr hai." Us kī fauj ne, is bā'is se ki wuh sharāb pitā thā, us ko imām banāne se iukār kiyā. Is liye us ne jhaṭ-ṭaṭ taubah kar li, aur sharāb pine se parhez kiyā; aur jis qadr sone kī piyāliyān mai-noshī ke wāṣṭe banī hū'ī thiṇ, sab ko galā kar fuqarā aur masākīn ko lillāh diyā. Yih dekh kar tamām fauj ne Qurān Sharif uṭhā liyā, ki "Ham tere sāth khūb lareṅge aur jān denge." Is iqrār se Bābar ko ḥaṇṣalah huā; aur baṛā bharosā us kā bandūqchiyon aur top-khāna par thā; kyūnki Bābar ke zamāne se pahle top-khāna aur piyādon kī fauj Hindustān meṇ kam larī thi. Chunānchi bar-waqt muqābalah ke topon āge lagā'ī ga'īṇ, aur topon ke piche piyāde the, aur bā'īn taraf topon ke sawār the. 'Ala-ṣ-ṣabāḥ fauj Paṭhānon kī āge barhi, aur yamīn o yasār se Bābar ke lashkar ko gher liyā; lekin top-khāne kī madad se us ne fauj-i-mukhalif ko piche haṭā diyā.

Jab Bābar ne dekhā ki ghanīm kī fauj do chār hamle kar ke ab thak ga'ī, us waqt do daste fauj-i-muntakhab ke le kar dushman par dhāwā kiyā. Mukhālīf tāb muqābalah kī na lā ke bbāge, aur bahut se nām-war sardār māre ga'e. Agarehi Bābar ke mukhālīf, ki bare qawī aur zor-āwar the, mutafarriq ho ga'e; magar phir bhī is sabab se, ki sar-kashān-i-Kābul o Hindustān us ke 'aish ko munaghghas karte rahte the, dil-jam'ī se us ko pādshāhat karnī naṣīb na hū'ī. Ākhir ko chār baras saltanat kar ke san 1530 'Isawī meṇ us ne is dunyā se kūch kiyā.

Bābar tamām pādshāhān-i-Hind meṇ barā shujā' thā, aur bare bare kār-i-numāyān us se hū'e, jiu meṇ wuh Amīr Timūr se bhī gū-i-sabqat le gayā. Jis qadr wuh fath-yāb huā, usī qadr us ne shikast bhī khā'ī; aur jis qadr mulk us ne fath kiye usī qadr kho'e bhī. Par ākhir-i-'abd meṇ ba-istiqlāl saltanat kī larā'ī meṇ barā kāmīl sipah-sālār thā. Us kī tāqat-i-jismānī larā'ī aur shikār meṇ hadd-i-bashariyat se ziyādah thī. 'Ilm-i-mūsīqī aur fann-i-shā'irī meṇ ustād-i-kāmīl aur sakhi aur ṣaf-dil thā. Ka'ī daf'ah us ne apne jānī dushmanon par raḥm kiyā hai.

#### HUMĀYŪN PĀDSHĀH.

Zahīru-d-Dīn Bābar Pādshāh kī wafāt ke ba'd san 1530 'Isawī meṇ Humāyūn Ibn-i-Bābar, ki har-dil-'azīz aur aqlmand thā, takht-nishīn huā. Is Bādshāh ko 'ilm-i-nujūm ke sikhne kā barā shauq thā, aur khud bhī khūb māhir thā. Us ne sāt diwān-khāne sāt saiyāron ke nām par banā'e the. Chunāuchi sipah-sālār aur fauj ke sardār khāna'-i-Mirrikh meṇ bulā'e jāte the, aur Muftī aur Qāzī khāna'-i-Uṭarid meṇ, aur qāsid aur shā'ir aur musāfir khāna'-i-Qamar meṇ talab huā karte the, aur sāzinde aur rāg nāch wāle khāna'-i-Zubrah meṇ āyā karte the, aur 'alā-hāza-i-qiyaṣ. Awā'il-i-'umr meṇ wuh 'aish o nishāt meṇ maṣrūf thā, ki yakāyak saltanat kā boj us ke sar par ā parā, aur us imtiḥān meṇ wuh pūrā nīklā. Chand roz ke ba'd us ko ittifaq larā'ī kā Bahādur Shāh, Hākim-i-Gujrāt, se huā. Humāyūn ne ba-liḥāz ittihād-i-mazhab ke sardār-i-mazkūr ko, jab ki wuh Jaipūr ke Rāja se lar rahā thā, kuchh īzā na dī thī; magar ab ek fauj-i-jarrār le kar us par charbā'ī kī, aur us ko is qadr tang kiyā, ki wuh nāchār ho kar

Gujrāt ko bhāg gayā, aur wahān jā kar Shahr Chabā'i men apnā khizānah rakh kar Aḥmad-ābād ko bhāg gayā, aur Bādshāh ne Gujrāt ko fath kar liyā. Yih muhimm kuchh un muhimmāt se kam na thī, jo Timūr yā Bābar ne sar kī thīn. Ba'd az-ān Humāyūn ko us ke bhā'iyoṅ, ya'nī Hindāl aur Kāmrān ne, jo bādshāh ke 'afv-i-jarā'im aur rahm-dilī ke bā'is diler ho ga'e the, tang karnā shurū' kiyā. Chūnki fauj-i-shāhī in pādshāh-zādon ke pās pahle hī se rahtī thī, is liye unhoṅ ne ek dūstre ke ba'd saltanat kā da'wā kiyā.

Sher Khān Afghān, Hākim-i-Bangāla, ne jab yih dekhā, ki pādshāh ke ghar men jhagrā ho rahā hai, dilerī kar ke fauj-i-kaṣīr le kar Humāyūn par charhā'i kī. Chūnki Humāyūn be-intizāmiy-i-mulk ke bā'is se fauj-i-kāfi jam' na kar sakā; is wāste shikast khā kar parīshān-hāl Āgre kī taraf bhāg gayā. Jab Humāyūn ke bhā'iyoṅ ne dekhā, ki āpas ke nifāq ke sabab se mulk hāth se jātā rahegā, Humāyūn kī madad ko ā'e; magar āpas men kuchh dilī mahabbat na thī. Humāyūn ne ek aur fauj jam' kar ke Sher Khān par charhā'i kī; magar ākhir ko shikast khā'i, aur nāchār ho kar Dārū-i-Khilāfat ko chhoṛ kar chhoṛe chhoṛe hākimōṅ se panāh kā ṭālīb huā. Magar yih aisā bad-bakht pādshāh thā, ki kisī ne us ko madad na dī. Ba'ī parīshānī aur hairānī ke ba'd Rāja Māl Deo, Rāja-'i-Ajmer, ke pās panāh lene ko gayā, aur us se i'ānat chāhī. Rāja ne ba-ṣābir iqbāl kiyā, aur bāṭin men chāhā, ki "Kisī hīle se Humāyūn ko qaid kar ke dushman ke hawāle karūn;" magar ek Rājput ne, jo Humāyūn kā namak-khwār-i-qadīm thā, is bhed se pādshāh ko itīlā' dī. Humāyūn ma' apne rafiqoṅ ke ādhi rāt ko wahān se bhāgā, aur sau kos tak kahīn dil-jam'i se dam na liyā. Aṣṇā-i-rāh men us tamām giron ne pānī ke na milne se bahut taklifon uṭhā'in; kyaunki zaurīn registānī thī aur kosoṅ tak pānī na thā. Saikroṅ ādmī aur jānwar māre pyās ke mar ga'e. Humāyūn kī sawārī kā ghoṛā bhī mar gayā; ek sipāhī ne apnī wālidah kī sawārī kā ghoṛā bādshāh ko diyā. Jab logoṅ ne apne pichhe ghubār uṭhā huā dekhā, to yaqīn jānā ki dushman ta'āqub kiye chalā ātā hai; us waqt sab ke hosh o hawāss ziyādah-tar parīshān ho ga'e, aur jāhān tak bhāgā gayā, bhāge. Ittifāqan rāt kī tārīkī men Humāyūn ma' malikāh

aur bīs sawāron ke rah bhūl kar lashkar se judā ho gayā ; aur jab ṣubḥ hū'ī, to dushman ke ek giroh ne ā gherā. Humāyūn ne ko'ī ṣūrat ribā'ī kī na dekh kar shujā'at ko kām farmāyā, aur unhīn chand ādmiyon ko ham-rāh le kar aisā larā ki dushmanon kē jī ohhūrā diye. Us larā'ī meṇ nā-gahānī ek tīr mukhālifin ke sardār ke aisā lagā ki us kā kām tamām huā ; is sabab se wuh log titar bitar ho ga'e. Humāyūn ne fath-yāb ho kar wahān se kūch kiyā, lekin tīn rāt aur dīn rah meṇ kahīn pānī kī shakl na dekhī. Ākhir ko jab chand shakhṣon ke sāth Amar Koṭ meṇ, jo Sindh ke qarīb wāqī' hai, pahunchā ; to wahān kā Rāja nihāyat tawāzu' se pesh āyā, aur jo madārij, mihmān-nawāzī ke haiṇ, bajā lāyā. Isī jagah Aktubar kī chaudhwiṇ tārīkh ko san 1542 'Isawī meṇ Akbar mutawallid huā. (Yih wuhī Akbar hai, jo barā nām-war pādshāh Hindustān kā huā.) Lekin pādshāh ko nāchārī se bhāgnā muqaddam thā : yih ṭīf ek sardār-i-namak-hurām bad-zāt ke hāth ā gayā, jis ne us larke ko le kar Mirzā Kāmran, ya'nī pādshāh ke bhā'ī ko, jo Kābul aur Qandahār kā pādshāh aur Humāyūn kā dushman-i-jānī thā, hawālāh kar diyā.

Sultān Tāhmāsp Shāh-i-Fāras ne jab sunā, ki Humāyūn ne sukanā-i-Hind se bahut muṣibateṇ uṭhā'ī haiṇ, ek nāma badīn mazmūn Humāyūn ko likhā, ki "Tum yahān chale ā'o ; main har hāl meṇ tumhārā mu'in o madadgār hūn ; aur jis qadr mujh se ho sakegā, tum se nek sulūk karūngā." Humāyūn to jān se ba-tang thā, fauran Fāras ko rawāna huā, aur ek sāl tak Iṣfahān meṇ rahā. Shāh-i-Īrān ne Humāyūn se kuchh 'ahd o paimān kiye, aur us ko das hazār sawār de kar kahā, ki "Ab tum apne mulk-i-maurūṣī ko'do-bārā fath karo." Humāyūn ne yih madad ni'mat-i-ghair-mutaraqqabah samjhi ; aur pahle us ne Kābul par, jabān us kā bhā'ī, Kāmran, hukumat kartā thā, aur jis ke pās us kā beṭā, Akbar, thā, charbā'ī kī. Jab ki us ne shahr kā muhāṣarah kiyā, Kāmran ne us ke beṭe, Akbar, ko lakriyon meṇ bāndh kar faṣil-i-shahr se laṭkā kar dikhlayā ; aur us se us kā maṭlab yih thā, ki "Agar tum hamlah karoge, to main tumbāre is beṭe ko lakriyon meṇ jalā dūngā." Bā-wajūd is dardnāk aur rahm-angez hāl ke dekhne ke pādshāh apne 'azm par mustaqill rahā, magar bahut dhamkiyān is amr-i-qabīḥ ke rokne ke wāṣṭe detā rahā. Kāmran ne Akbar ko to kuchh na satāyā, magar apne ham-rāhiyon ko le kar

Kābul se nikal gayā. Humāyūn ne shahr men dākhil ho kar apne beṭe, Akbar, ko chhāṭi se lagāyā, aur khud az-sar-i-nau pādshāh huā. Nau baras tak Humāyūn ne is shahr men saltanat ki. Agarchi us kā bhā'i is 'arṣe men us ko bahut satātā rahā, lekin mutawātir shikast khā'i; aur anjām-kār maghlūb huā. Ba'd az-ān Humāyūn ne chha baras ke 'arṣe men apne tamām mamālik-i-maurūṣi ko fath kar liyā. Is hangāme men us kā ek bhā'i 'uzr o ma'zirat kar ke us se ā milā, aur aise aise shuja'at ke kām kiye, ki Humāyūn ki khāṭir se aglā malāl-i-ghubār raf' ho gayā, aur nihāyat mahzūz ho kar apne beṭe, Jalālu-d-Dīn Akbar, ko us ki beṭi ke sāth mansūb kiyā. Yih bhā'i Humāyūn kā kisi larā'i men mārā gayā. Aur dūsre bhā'i, Kāmran ko, jo nihāyat mufsid aur mutamarrid thā aur us ki chashm-poshī ko khayāl men na lātā thā, nāchār ho kar Humāyūn ne qatīl kiyā. Sab logon ko yaqīn thā ki Humāyūn us ko zinda na chhoregā; magar us ne Khudā kā khauf kiyā, shīr ānkhen us ki nikalwā dāḍh. Ek muddat ke ba'd Kāmran Mirzā ba-ijāzat-i-Humāyūn Pādshāh Makkah ko chālā gayā, aur wabān tin baras ke ba'd us ne itiqāl kiyā.

### KHĀNDĀN-I-SŪRI.

(*San 1540 'Isawī se san 1556 'Isawī tak.*)

Jab tak ki Humāyūn in ḥadīṣāt men muṭtalā rahā, Sher Shāh ne mauqa' pā kar tamām mamlikat-i-Hind par apnī saltanat ba-khūbī kar li, aur aisā intizām kiyā, ki har ek shakhṣ us se khush ho gayā. Chunānchī us ne Gangā se le kar Daryā-i-Sindh tak, jo tin hazār Angrezī mil kā fāsilah hai, ek sarāk banwā'i, aur us ki donon taraf mewanār darakhṭ lagā'e; aur do do mil ke fāṣile par ek ek kuwān khudwā diyā; aur har ek manzil par ek ek sarāe musāfiron ke utarne ko banwā'i, jis men har ek musāfir ko pādshāh ki taraf se muft khānā miltā thā. Wuh inṣāf ba-khūbī kartā thā: log bare aman aur chain se guzar karte the.

Pāñch baras Sher Shāh saltanat kar ke faut huā; aur us ki jagah Salīm Shāh, us kā beṭā, takht-i-Hind par julūs-farmā huā. Us ne nau baras saltanat ki; magar yih larākā dānā'i aur liyāqat men apne tāp ke barābar na thā. Ab chūnki saltanat kā wāriṣ ek

larḳā ṣaghīr-sinn rahā, is liye amīron aur nawwābon kī be-inti-  
zāmī ke sabab se barā fasād barpā huā.

Yih hāl Hindustān kā dekh kar Humāyūn ke khair-khwāhon ne  
us ke dil par munaqqash kar diyā, ki agar wuh thoṛī bhī fauj le kar  
Hind kā qaṣd kare to yih be-intizām mulk jald fath ho jā'egā.  
Humāyūn ne pandrah hazār sawār aur bahut Panjābī naukar  
shāmil le kar Hindustān par fauj-kshī kī, aur jis par ḥamlah-  
āwar huā, use apnī itā'at men lāyā. Daryā-i-Sindh 'ubūr kar  
ke awwal Tātār Khān, Hāk'im-i-Lāhor se larā'ī hū'ī, jis ko  
Bahram Khān, Sipah-sālār-i-Shāh Humāyūn ne hālat-i-ghaflat  
men ḥamlah kar ke shikast dī. Paṭhānon ne yih hāl dekh kar  
ek shakṣ, musammā ba Sikandar ko, jo Sher Shāh kā bhatijā  
aur fann-i-sipābhgarī men barī dastgāh rakhtā thā, takht-i-Dihlī  
par biṭhā diyā. Us ne assī hazār ādmī kī fauj jam' kar ke  
Humāyūn ke muqābalah par kūch kiyā; barī bhārī larā'ī jānibain  
kī sar-garmī se hū'ī. Akbar Ibn-i-Humāyūn ne, jo us waqt sirf  
terah baras kā thā, is larā'ī men barī dād-i-mardānagī dī; aur us  
ko dekh kar siyāh jān dene par musta'idd ho ga'ī. Chunānchi  
Paṭhānon ne shikast khā'ī, aur un kī fauj parishān ho ga'ī;  
aur Sikandar Shāh aise zar-khez mulk ko be-sar chhor kar koh-  
i-shimāl kī taraf bhāg gayā.

Humāyūn ne terah baras ke ba'd do-bāra apne bāp ke takht  
par julūs kiyā. Magar ek baras bhī us ke julūs ko guzarne na  
pāyā thā, ki ek roz kisī taqrib se kutub-khāne kī chhat par chṛhā,  
aur wabān der tak tafriḥan ṭahlā kiyā. Ba'd azān thuk kar hawā  
khāne ko baith gayā: is men azān hū'ī; chāhtā thā kī 'aṣā tek kar  
uṭhe: magar chūnki wabān sang-i-marmar kā farsh thā, is wajh  
se lakṛī phisal ga'ī, aur wuh saubhal na sakā, aur chhat se niche  
ā parā. Chand roz bīmār rah kar san 1556 'Isawī men jān-ba-  
Haqq-taslim huā.

Yih Bādshāh bahut shujā', bar-dil-'aziz, fāzil, aur bad-qismat  
thā. Jaisī muṣibaten is par guzrī hain, kisī par Eshiyā men nahīn  
guzrīn. Aur us kī yih wajh hai, ki wuh raḥm-dil bahut thā.  
Chunānchi Tārikh-i-Firishṭa men likhā hai, ki "Agar yih Bād-  
shāh sang-dil hotā, to nibāyat barā bādshāh apne waqt kā hotā."  
Agar is zamāne men yih qā'idah qayār pātā, ki siwāe bare bete ke

aur ko'ī beṭā wāris-i-saltanat na ho, to kabhī aisi qabāhaten pesh  
na ātīn, jo us waqt zubūr men ā'īn.

MUHAMMAD JALĀLU-D-DĪN AKBAR IBN-I-HUMĀYŪN PĀD<sup>SH</sup>ĀH.

Humāyūn Pādshāh kī wafāt ke ba'd Hindustān ke takht ne aise shahan-shāh ke julūs se zināt pā'ī, jis kā ṣānī, is mulk meṇ to kyā, kisī mamlakat meṇ na huā hogā. Yih bādshāh Jalālu-d-Dīn Muḥammad Akbar Ibn-i-Humāyūn Pādshāh thā, jis ke naiyir-i-iqbāl ke rū-ba-rū kisī bad-andesh aur mufsid kā chirāgh na jalā. Aur bā-wujūde-ki yih apne bāp kī wafāt ke waqt terah baras se ziyādah 'umr kā na thā, lekin kisī kā ḥaṣṣalah na paṛā, kī us kī takht-nishīnī kā mānī' hotā. Hangām-i-tufūliyat meṇ bajāe jaur-i-tarbiyat-i-ustād ke us ne barī barī muṣibatēn pīr-i-falak ke hāth se khīnchī thīn, aur bahut sī taklifēn apne bāp ke dushmanon se uṭhā'ī thīn. Bā-wujūd is ke apne zihn-i-'ālī kī ṣafā'ī aur 'aql-i-Khudā-dād kī rasā'ī se chand roz meṇ mu'āmalāt-i-siyāsāt aur mulk-dārī ke rumūz ko khūb samajhne, aur har amr ke nek o bad ko achchhī tarah pahunchane lagā.

Tālī' ki khūbī se Bahrām Khān atālīq bhī us ko aisā milā, jo hama-tan us kī khair-khwāhī kā dam bhartā thā, aur siwāe ek bāt ke, kī gustākhi aur bebākī us ke mizāj meñ thī, aur sab tarāḥ se apne mālīk kī wafā-dārī aur taraqqiy-daulat kī hawā-khwāhī meñ sābit-qadam thā. Akbar Pādshāh ke julūs ke thore din ke ba'd Hemūn Baqqāl, jo aṣl kā razīl thā magar haṣsalah-'i-jalīl rakhtā thā, barsar-i-baghāwat huā, aur fauj-i-kaṣīr jam' kar ke Mughlōn se do larā'iyōn meñ fath-yāb huā ; yahan tak kī Akbar ko Satlaj pār tak batā le gayā. Jis tarāḥ par us ne ibtidā meñ apnī taraqqiy-jah-o-hashmat ke wāste sa'y kī thī, agar usī tarāḥ apne irāde par qā'im rakhtā, to shubhab na thā kī Khāndan-i-Timūriyah kā nām o nishān Hindustān meñ baqī na rakhtā. Magar chūñkī thore pānī kā bullā thā, is liye jald phūṭ gayā, aur Dihlī meñ qiyām kar ke shān o shaukat kī namūd meñ maṣrūf huā. Is arse meñ Mughlōn ne Lāhor meñ jam'iyat baham pahunchā ke Dihlī kā phir qaṣd kiyā ; aur Pānīpat meñ donoñ lashkaron kā muqābalah huā. Hemūn-i-nā-maimūn kī fauj ne shikast kbā'i ; aur wuh khud giriftār ho kar Pādshāh ke rū-ba-rū ḥazīr kiyā gayā.

Us waqt Bahrām Khān, mushīr-i-tadbīr-i-salṭanat, ne ‘arṣ ki, ki “Jahān-paṣāh is kāfir ko apne hāth se qatl karen.” Agarchi dil pādshāh kā na chāhtā thā ki us ke khūn se apne hāth ko ālūda kare, lekin Bahrām Khān kī khātīr se shamshīr-i-barahna hāth meṇ le kar Hemūṇ ke sar se chhuā dī. Bahrām Khān ne usī waqt ek aisā hāth mārā, ki Hemūṇ kā sar tan se judā ho gayā.

Us waqt tak to Bahrām Khān bādshāh kā khair-khwāh rahā, lekin phir apnī khidmat par maghrūr ho kar minnat aur ihsān rakhne aur nakhwat karne lagā. Akbar ne bhī apnī qūwat ko jānch kar us se aisī be-‘itnā’ī kī, ki Bahrām Khān ‘alāniyah bāghī ho gayā; magar shikast khā kar is naubat ko pahunchā, ki paighām bhej kar pādshāh se multaji ‘afv-i-jarā’im kā huā. Akbar ke dil par us kī ṭaraf se mail na āyā thā; us ke quṣūron ko mu‘āf kiyā, balki bādshāhī julūs us ke lene ke wāste bhejā. Bahrām Khān ne āstāna-‘i-daulat par qadam rakhte hī dastār gardan meṇ ḍālī, aur nālān o dawān o ba-chashm-i-giryān apne ta’īn zer-i pāe pāya-‘i-sarir-i-khilāfat sar-nagūṇ kiyā. Akbar ne khair-khwāh-i-qadīm samajh kar donon hāthon se us ke sar ko uṭhā liyā, aur darjah-‘i-a‘lā par sab amīron se ūpar biṭhlā ke khil‘at-i-besh-bahā ‘ināyat kiyā, aur zabān-i-mubārak se farmāyā, ki “Agar Bahrām Khān ko kār-i-sipahgarī pasand ho, to hukumat Kālpi aur Chanderī kī us ke wāste maujūd hai. Aur jo Huzūr meṇ rahnā pasand-i-khātīr ho, tau bhī ‘āṭifat aur makramat-i-shahān-shāhī ba-dastūr-i-qadīm be kam o kāst us khair-khwāh-i-derīna kī nisbat mar‘ī aur malhūz hogī. Aur agar ṭabī‘at us kī ‘ibādat aur apne Ma‘būd kī bandagī ko chāhe, to Makke ke Hājī ko rawāna ho. Fauj-i-shāhī us kī ‘izzat aur manzilat ke muwāfiq wahān tak pahunchāne ke wāste sāth kar dī jā’egī.” Bahrām Khān ne jawāb diyā, ki “Banda jab ek martabah quṣūr-wār ṭhaharā, ab kis muṇh se tamannā Huzūr meṇ rahne kī kare? Huzūr se us ke quṣūr mu‘āf hū’e; usī ko daulat-i-‘Uqbā aur sa‘adat-i-dārāin samajhtā hai, aur yihī bihtarīn-i-in‘ām khidmāt-i-sābiqah kā appe haqq meṇ jāntā hai. Us kī tamannā-i-dilī ab yihī hai, ki fikr-i-‘Āqibat meṇ maṣrūf ho, aur Hazrat-i-Sulṭān se ijāzat Hājī kī mile.” Pādshāh is amr meṇ muta‘arriṣ na huā; aur Bahrām Khān ne bahut khīmāh o khargāh le kar Makkah-‘i-Mu‘azzamah



kā ‘azm kiyā; lekin rah men kisi shakhṣ ke hāth se, jis ke bāp ko us ne ek larāi men mārā thā, maqtūl huā.

Akbar ne bare ‘adl o dād ke sāth pādshāhat ki, aur bā-wujūd mutawātir larā’iyon ke bahut sā waqt intizām-i-mulk aur band-o-bast-i-umūr-i-mālī men ṣarf kiyā. Sā’ir muqaddamāt-i-jangiy o mulkiy o mālī aur maḥṣūlon ke wāṣṭe zābiṭe mu‘aiyan farmā’e. Us ne itne ā’in aur qānūn jāri kiye, ki un kā bayān is mukhtaṣar men gunjā’ish nahīn rakhtā. Abu-l-Faḥl ke Akbar-Nāma kī chand saṭron kā maḥmūd, jo yahān likhā jāta hai, us ke auṣā’ aur auṣāf kī kaifiyat men kāfi hai. “Hamesha is Pādshāh kī himmat isī par maṣrūf rahti hai, ki sab ādmīyon ke dilon ko hāth men lā’e. Aur bā-wujūd be-shumār shughlon aur be ḥisāb fikron ke, jo shahanshāh-i-‘adil o ra’iyat-nawāz ko zarūr hain, us ke dil par kabhī iṭtirāb nahīn hotā hai, balki jab dekho, shād nazar āta hai; kabhī marziy-i-Ilāhī se qadam bāhar nahīn rakhtā. Az-bas-kī tishna-’i-‘ilm o faḥl hai, ‘ālimon aur fāzilon kī suḥbat se istifādah kartā hai, aur apnī fahm-i-rasā aur intizām-i-shā’ista par nāẓar nahīn hotā. Har ek bāt ghaur se suntā hai, is khayāl se ki dekhiye, kis ke munh se kyā bāt sunne men ā’e, aur kis amr kī hidāyat aur ‘uqdaḥ-kushā’i ho. Bā-wujūd is qadr qudrat aur shaukat ke kabhī ghuṣṣah us ke dil men nahīn āta; balki hamesha khayālāt-i-nek us ke dil men rahte hain. Kisī millat aur mazhab kī taḥqīr o taḥḥik kā kalimah us ke munh se nahīn nikaltā; aur umūr-i-wājib men kabhī takāsul o taghāful us se zuhūr men nahīn āta. Yih bādshāh har bāt par shukr kā sijdah dargāh-i-Ezidi men bajā lātā hai, aur hamesha apne ḥāl aur affāl kā nigārān rakhtā hai. Bi-l-khusūṣ suḥb o shām aur niṣf roz aur niṣf shab ko apne dil ko tamām umūr-i-dunyawi se ḥaṭā kar Ma’būd-i-Ḥaqīqī kī ṭaraf rujū kartā hai. Gunahgāron kī taḥṣīr men mu’af kartā hai; ra’ayā kī rifāh aur āsūdagi par nāẓar rakhtā hai. Khwābish-i-nafsānī kā ṭalīb nahīn hotā; aur shab o roz men faqat ek martabā ṭa’ām tanāwul farmātā hai. Aur khwāb laḥut kam kartā hai; baqī tamām waqt umūr-i-zurūrī ke ingirām men ṣarf kartā hai. Shām ko thoṛī der ke ārām ke ba’d kam men maṣrūf hotā hai. Ba’d us ke khalwat men ḥukamā aur fuḥalā kī majlis jam’ kar ke dānā’i aur ‘aqlmandī kī bāteṃ suntā hai; ‘ilmon ke rumūz aur daḥiqon ko apnī

'aql-i-bārik-bī se daryāft kartā hai; aur na'e a'in ijād farmatā hai. Aslāf ki ghalatīyon ko islah detā hai, aur akhlāf ke wāste shāh aur durust zawābiṭ muqarrar kartā hai. Us ki majlis men fāzil tārikh-dān bhī ḥāzīr rahte haiṅ, aur riwāyat-i-peshīn ko be kam o kāst bayān karte haiṅ. Ba'd az-ān pādshāh kuchh rāt ga'e tak ḥukkām aur 'ummāl ki arziyān suntā hai, aur har ek par ḥukm-i-munāsib charhātā hai. Qabl tulū'-i-āftāb ke ahālī mawālī jam' hote haiṅ, aur dīn nikalte hī jalwah-'i-shāhī se bahra-yāb ho kar kornish bajā lāte haiṅ; ba'd us ke bahut se umūr-i-mutafarriq inqirām pāte haiṅ. Aur us waqt Pādshāh-i-bedār-dil thoṛī der tak khwāb-i-istirāḥat farmatā hai."

Is Pādshāh ne larā'iyān bhī bahut larīn: kabhī ko'ī shūbah-dār bar-sar-i-muqābalah āyā; kabhī kisī Hindū rājā se jang hū'ī; kabhī un Muḥammadī pādshāhon se, jin ki mamlikat ki ḥadeṅ us ki saltanat se muttāṣil thīn, khet parā. Mukhtaṣar yih hai ki Mālwa do daf'ah us ke qabṛe se nikal gayā, aur donoṅ martabah maftūh huā. Isī tarāḥ Shūbah-'i-Gujrāt bhī barī larā'ī se ḥāth āyā. Kabul men us ke bhā'ī ne sar-kashī ki, aur ākhīr maghlūb ho kar 'afv-i-jarā'im se jān-bar huā. Shūbah-'i-Bangāla men ka'ī daf'ah sar-kashī hū'ī: aur khitāh-'i-be-naṣīr-i-Kashmīr par, ki is waqt tak kisī se maftūh na huā thā, is Pādshāh ne khud 'azīmat ki; aur Dakan ki muhimṁ par apne bēṭe ko bhejā. Alqīsshah jāhān us ke lashkar kā nishān jātā thā, fath o nuṣrat peshwā hotī thī. Khāndes bhī us ne fath kiyā: Barār kā Shūbah sulḥ se ḥāth āyā: Ahmadābād bhī barī larā'ī ke ba'd maftūh huā. Is Pādshāh ki yih sab se picḥhī muhimṁ thī. Jis waqt ki wahān se Āgre ki taraf murāja'at kar ke āyā, ikkāwan baras ki saltanat ke ba'd san 1605 'Isawī men Akbarābād men is 'ālam-i-fānī se musāfir 'ālam-i-bāqī kā huā. Usī jagah us ki qabr Sikandara men hai. Al-gharaṣ yih pādshāh tamām 'umr shifāt-i-zātī aur ḥusn-i-intizām-i-umūr-i-mulkiy-o-mālī men nek-nām rahā. Us ki tārikh-i-wafāt yih hai:—

*Tārikh-i-wafāt-i-Akbar Pādshāh.*

Jab ki Akbar ne lī Bihisht ki rah,  
Hū'ī tārikh "Faut-i-Akbar Shāh."

1015 A. H.

Is pādshāh ke mazhab men ikhtilāf hai. Pa'zo kahte haiṅ ki wuh Shammās thā ; aur ba'z kahte haiṅ ki Hunūd ke mazhab se us ko barā i'tiqād thā. Magar aṣl hāl yih hai, ki wuh kisī aur mazhab kā mu'taqid na thā; hān, us ko har ek mazhab kī kitāb sunne aur har ek millat kī i'tiqādī bāten daryāft karne kā shauq bahut thā. Chunānchi isī wāste Purtukāl ke Pādshāh ko nāma likh kar tin. bār Pādri log taḥqīq-i-mazhab-i-'Isawī ke wāste bulwā'e, aur Injil sunī ; aur mutāḥaṣaṣh un men aur Musalmānon ke 'ālimon men huā. Chūnki Akbar kisī mazhab se ta'aṣṣub na rakhtā thā, isī wāste itne dinon tak us kī saḥānat qā'im rahī, aur sab log, Hindū aur Musalmān wa ghairah, us ke maddāh haiṅ.

SHĀH-ZĀDA SALĪM ABU-L-MUẒAFFAR NŪRU-D-DĪN,  
'URF JAHĀN-GĪR BĀDShĀH.

Shahanshāh Akbar kī wafāt ke ba'd us kā iklautā beṭā, Shah-zāda Salīm, san 1605 'Isawī men muṭābiq san 1015 Hijrī ke takht-i-Hindustān par Qil'ah-'i-Akbarābād men julūs-farmā huā, aur Jahāngir khiṭāb ikhtiyār kiya. Agarchi logon ne Khusrau Ibn-i-Jahāngir se sāziṣh kar ke chāhā, ki Jahāngir ke is beṭe ko takht par biṭhlā den, magar pesh-raft na ga'i; aur Jahāngir ne ba-sabab mihr-i-padarī ke is da'ah jurm apne beṭe, Khusrau, kā mu'af kiya. Magar Khusrau ne phir baghawāt kī: tab pādshāh ne us kī fauj ko shikast de kar us ko apne ḥuẓūr men bulwā kar jo yih hāl pūchhā, to us ne apne is jurm kā iqrār kiya, magar apne sāth ke sar-kashon kā nām hargiz zabān par na lāyā. Akhīr-kār tamām 'umr us kī qaid kā ḥukm huā ; aur us kī ḥimāyat karne wālon ko talāsh kar ke ek ek ko bahut taklīf de kar us ke sāmne jān se mārā. Das baras ke ba'd yih pādshāh-zāda qaid se ribā huā ; aur us ko us ke ḥaqīqī bhā'i, Shāh-Jahān, ne apne hāth se qatl kar dālā.

Jahāngir kī tārīkh men, us kā ek amīr-i-kabir kī mankūḥah par 'āshiq honā, aur us ke shauhar ke qatl karne ke b'ad us ko apne qābū men lānā, sab se barā mājarā aur gunāh taṣawwur kiya gayā hai. Us kā yih qisṣah hai, ki ek shakhṣ, musamṃā ba Khwāja Ayāz, kisī 'ālī khāndān kā bigrā huā qaum-i-Tātār se thā.

Jab muhtāj-i-nān-i-shabīna huā, to us ne ma' apnī bīwī ke Hindustān kā safar ikhtiyār kiya. Un aiyām men us kī 'aurat haml se thī. Jis waqt yih donon us dasht se guzar rahe the, jo Hindustān aur Tātār kī rāh men wāqī' hai, rāste men ek larķī paidā hū'ī. Khawāja Ayāz, us kā bāp, aur mān iflās men muhtalā the. Yih soch kar, ki is larķī kī parwarish kyūnkar karenge, aur kahān is ko le kar phirenge, aur yih bhī khayāl kar ke, ki yih larķī barī manhūs hai jo aisī muflisi men paidā hū'ī hai, us ko usī jagah jangal men chhoṛ kar qadam āge barhāyā. Lekin peṭ kī ānch burī hotī hai; mahabbat josh kar ā'ī; do do qadam par pīchhe muṛ muṛ kar dekhte the. Ākhir ko mān kā qadam āge na uṭhā; ek jagah miṣl sarv ke kharī ho kar zār zār rone lagī, aur rote rote wahīn registān par gir paṛī, aur miṣl-i-māhiy-i-be-āb us bachehe ko yād kar ke tarapne lagī. Magar itnī ṭāqat us men na thī, jo phir kar jā'e aur us bachehe ko uṭhā lā'e. Khawāja Ayāz kā dil bhī yih ḥālat dekh kar umand āyā: kahne lagā, ki "Ṣabr karo. Main jātā hūn, aur beṭī ko tumhāre pās le ātā hūn. Khair, jo qismat men likhā hai so hogā." Gharaz unhīn pā'on pīchhe phirā. Jab wahān pahunchā, jis jagah us ko chhoṛā thā, kyā dekhtā hai, ki ek kālā sānp us larķī se liṭtā huā hai. Yih be-ikhtiyār mahabbat ke josh men āge barhā, aur shor kiya. Wuh sānp fauran alag ho kar ek darakht ke khoh men chalā gayā. Ayāz ne bachehe ko ṣaḥīḥ'o salāmat pāyā; Khudā kā shukr kiya; jhapṭ kar god men uṭhā liyā, aur gale lagā kar munḥ ebūmtā huā us kī mān ke pās lāyā. Thoṛī dūr chale the, ki ek qāfilah musāfiron kā milā. Unhon ne un donon ko be-sar-o-sāmān dekh kar ba-taur khairāt ke kuchh khareh jam' kar diya. Zan o shauhar Khudā kā shukr baja lā'e; qat'-i-manāzil karte hū'e Lāhor tak pahunchē. Ayāz mard-i-zīrak aur ṣāḥīb-salīqah aur 'āqibat-andesh thā; jald-tar naukār ho gayā. Rafta rafta ehand roz men aisā barhā, ki Akbar Pādshāh kī 'adālat men Mīr Bakhshī ke 'uhde par mumtāz huā. Us ne apnī is beṭī, Nūr Jzhān Begam, kī ta'lim men babut koshish kī; chunā'chi wuh parh likh kar qābil hū'ī. Us kā ḥusn aur 'ilm aur 'adāt dekh kar Shāh-zāda Salim ke hosh bakhta ho ga'e. Magar chūnki us larķī kī nisbat Sher Afgan Khān Turkman se ho chukī thī, is wāste Akbar Pādshāh

ne Shāh-zāda-i-Salīm ki khātir se us nisbat kā chhurānā ba'īd-az-inṣāf samajh kar us amr men dakhl denā munāsib na jānā; yabān tak ki Nūr Jahān kā nikāh Sher Afgan Khān se ho gayā, aur Shah-zāda Salīm munh dekhtā rah gayā.

Lekin jab ki Jahāngir takht-i-saltanat par baitā, to apne maqsad ke hāsil karne ki fikr men parā. Ka'i daf'ah Sher Afgan Khān ke mār dālne ki tajwiz ki: magar wuh bhī aisi shujā' aur bahādur thā, ki pādshāh ko us ke 'alāniyah marwā dālne kā haṣalah na parā. Ek daf'ah pādshāh ne sher kā muqābalah Sher Afgan Khān se karwāyā, aur ek daf'ah ek mast hāthī us ke sāmne chhor diyā; par Sher Afgan Khān apnī qūwat-i-bāzū se, jo insān ki tāqat se bāhar thī, un donoṃ balā'on se salāmat rahā. Ākhir-kār Jahāngir ne ek amir ko, jis kā nām Qutub thā, Sūbah-dār Bangālā kā is shart par kiyā, ki wuh Sher Afgan Khān ko kisī larā'i men qatl kar dāle. Is par bhī chālīs qātil, jo is Sūbah-dār ne Sher Afgan Khān ke qatl karne ko rawāna kiye the, us ne mār kar bhagā diye. Ākhir Sūbah-dār-i-Bangālā fauj le kar us par charhā. Is daf'ah bhī Sher Afgan Khān ne barī dād-i-shujā'at di; aur Qutub ko, jo ek hāthī par sawār thā, ma' chand aur sawāron ke apne hāth se mārā. Magar jis waqt chār taraf se tiron ki bauchhār us par hone lagī, tab-lāchār ho kar mārā gayā.

Nūr Jahān, jis ke dil men pādshāh ki biwi banne kā shauq thā, aur jo hukūmat ki tishna thī, chhathe san-i-julūsiy-i-Jahāngir men apne khāwind ke marte hī pādshāhī mahall men dakhil hū'i. Magar pādshāh ko us ke khāwind ke marwā dālne ki aisi nadāmat thī, ki chār baras tak us 'aurat ki khavar bhī na pūchhī. Jab chār baras ke ba'd daf'atan ek roz pādshāh ki nazar Nūr Jahān par parī, to fauran us kā 'ishq josh kar āyā, aur mahabbat paidā hū'i. Ayāz, ya'nī Nūr Jahān kā bāp, Wazīr-i-A'zam huā; aur us ke donoṃ bhā'i barē barē 'uhdon par sar-afrāz kiye gaye; aur umūr-i-saltanat men ikhṭiyār-i-kullī unhen diyā gayā. Jab tak ki Ayāz jīta rahā tab tak us ki nek-zatī se kisī ko apnī haqq-talafi ki shikāyat na hū'i; balki us ki wizārat men ra'āyā apne haqq ko pahunchti thī. Magar Ayāz ki wafāt ke ba'd bahut fitne barpā hū'e, jin kā tadārūk barī dushwārī se huā. Chunānchi Shāh-zāda-i-Khurram, 'urf Shāh-Jahān, ne bāghi ho kar pahlē apne bhā'i Khusrau ko qatl kiyā, phir Sūbah-i-Dakan men bāp

par lashkar-kashī kī aur shikast kha'ī; aur khud giriftārī se bach kar ka'ī baras tak āwāra o parishān phirā kiyā.

Nūr Mahall yā Nūr Jahān apne bāp ke marte hī salṭanat meṇ ghadr machāne lagi. Akṣar farmānoṇ par Nūr Jahān ke ḥokm hote the. Āp darbār karti thī; Pādshāh miṣl diwānoṇ ke us kī ṣurat par 'āshiq o mahv rahtā thā. Jo farmān kī ḥasbu-l-ḥukm Nūr Jahān Begam ke likhe jāte the, un par us ke nām kā tuḡhrā likhā jātā thā aur us kī muhr ṣabt rahti thī. Agarchi khutbah Begam ke nām kā nabīn parhā jātā thā, magar rupai par ākhir ko sikkah Nūr Jahān kā mazrūb honā shurū' ho gayā thā.

Shāh Jahān jis waqt bāghi ho kar pādshāh se larā thā, to Mahābat Khān kī jawān-mardi bahut kām ā'ī thī; aur is liye Jahāngir ne us ko apnī 'ināyat se sar-farāz kiyā thā. Magar Nūr Jahān Begam ne, jo kisī ko Jahāngir kā manzūr-i-naẓar na dekh sakti thī, aur pādshāh ke mizāj par bi-l-kull qābiẓ thī, Mahābat Khān jaise' khair-khwāhoṇ ko judā karwā diyā. Shāh Jahān ne jo baghawāt kī thī, us kī wajh sirf yihi thī, kī wuh barā beṭā thā, aur salṭanat kā mustaḥaqq thā; aur Nūr Jahān ba-dil chāhti thī kī kisī tarāh Mirzā Shahr-yār, jo us kī beṭī se manṣub thā, takht par baiṭhe. Magar Shāh Jahān tamām beṭoṇ se ziyādah liyāqat rakhtā thā; aur us kī futūḥāt-i-Dakan ke sabab se us kī shuhrat ho ga'ī thī, aur barā nām ho gayā thā, aur us ko barī qudrat aur qūwat ḥāṣil ho ga'ī thī. Takht ke lālach meṇ is Shāh-zāda-'i-Shāh Jahān ne apne bare bhā'ī, Khusrau ko, jo ibtidā-i-salṭanat-i-Jahāngir meṇ khalal-andāz huā thā, aur ab ba'd das baras ke us ne rihā'ī pā'ī thī, aur pādshāh ko us kī ghaur o pardākht manzūr thī, qatl kiyā. Chunānchi Khusrau kī pyāri biwī ek roz ṣubḥ ko jo us ke khīme meṇ ga'ī, to kyā dekhti hai kī wuh khūn meṇ loṭ rabā hai. Is 'aurat ne bare zor o ghor se wāwailā kī. Tamām lashkar meṇ us kī āwāz sun kar dhūm par ga'ī, kī "Kyā huā?" Shāh Jahān us jagah gayā, aur ba-zāhir aisā ghammgīn huā kī us par kisī nau' kā shakk na hotā thā; lekin us ke bāp aur tamām admiyoṇ ko ṣābit huā, kī Shāh Jahān ne us ko qatl kiyā.

Jahāngir kā is nāzūk waqt meṇ sirf us kā Sipah-sālār, Mahābat Khān, barā madadgār thā. Is sardār ne us ko nibāyat istiqlāl se salṭanat par qā'im rakhā, aur basabab shujā'at ke pādshāh kā

ṭaraf-dār ho kar Shāh Jahān ko bārḥā shikastē dīn ; balki jis waqt Shāh Jahān fauj ke farāḥam karne ke wāṣṭe Gujṛāt yā Bangālā ko gayā, to is bahādur ādmī ne shāh-zāda-i-mazkūr kā aisā taʿāqub kiyā, ki us ko zarā fursat na dī. Al-gharaṣ is Pādshāh-zāde ko Mahābat Khān hī ne past-himmat kar diyā thā. Magar jab ba-tawaqqu'-i-in'ām-o-marḥamat-i-Sultānī. Mahābat Khān Dārū-l-khilāfat meṇ āyā, Nūr Jahān ne, jo Pādshāh ke ḥaqq meṇ badi kā firishta thī, Jahāngīr kā mizāj Mahābat Khān se bargashta kar diyā, aur yih samjhā diyā, ki “Mahābat Khān Shāh Jahān se mil gayā hai, aur ḥuṣūr-i-wālā ko takht se utārne kā irādah rakhtā hai.” Jab yih ḥāl Mahābat Khān ko ma'lūm huā, apnī jān bachāne ko apne Qil'ah-i-Rantham ko murāja'at kar ke chālā gayā. Pādshāh ke darbār se khafagī ke farmān ṣādir hone lage. Ākhir ko wuh qil'ah-i-mustaḥkam, jis kī ḥukūmat par Mahābat Khān muta'aiyan thā, Nūr Jahān Begam ke kisī āwurda ko soṅpā gayā ; aur Mahābat Khān ke nām ḥukm-i-muḥkam pahunchā, ki jald apne ta'in ḥuṣūr-i-sultānī meṇ ḥāzīr kare. Agarchi mā-fi-ẓ-zamīr pādshāh kā is ḥukm se zāhir thā, lekin Mahābat Khān apnī be-gunāhī ke bharose par be-andesha ḥuṣūr-i-shāhī meṇ jāne ko musta'idd huā. Us waqt pāñch hazār Rājput us kī madad par the ; aur pādshāhī lashkar Kābul ko jātā thā. Jab wuh Jhilam par pahunchā, to ma'lūm huā ki fauj-i-shāhī Jhilam daryā se utar ga'i, aur Nūr Jahān Begam apne bhā'i, Āṣaf Khān ke hamrah, jo Wazīr-i-A'ẓam thā, daryā pār chālī ga'i hai ; sirf pādshāh ma', chand amīron ke be-khaṭrah pīchhe rah ga'e haiṅ. Us waqt Mahābat Khān ne yih dilerī kī, ke Rājputon ko le kar āge barḥā, aur pul kā band-o-bast kar ke thore se sawār le kar pādshāh ke khīme meṇ ghus gayā. Umarā ne kuchh muqābalah kiyā ; magar dushman ko qawī-dast dekh kar sab dam-ba-khud ho ga'e. Mahābat Khān ne thorī talāsh ke ba'd pādshāh ko nihāne ke khīme meṇ pāyā. Pādshāh ne Mahābat Khān ko dekhte hī kahā, ki “Mahābat Khān, tumbārā kyā irādah hai ? ” Us ne jāwāb diyā, ki “Dushmanon kī sāziṣh se, jo bande ke khūn ke pyāse haiṅ, ḥuṣūr kī ḥimāyat meṇ āyā hūṅ.” Pādshāh ne pūchhā, ki “Yih fauj-i-musallah tumbāre sāth kis wāṣṭe hai ? ” Us ne jāwāb diyā, ki “Merī jān kī ḥifāzat aur kina kā badlā chāhtī hai.” Jahāngīr ne kahā, ki “Mujh ko terī

jān mārne kā khayāl bargiz nahīn thā,” aur kalimāt-i-nawāzish-āmez farmāne lage. Mahābat Khān ne pādshāh ko Rājputon ke pahre men sapurd kar diyā.

Nūr Jahān Begam ne, jo pār utar ga’i thī, jis waqt yih khālār sunī, sakht ghazabnāk aur muqtarr hū’i. Gharaz-ki mas̄hware ke ba’d yih ṣalāh ṭhahri, ki Mahābat Khān par pādshāh ki rihā’i ke wāṣṭe ḥamlah karnā chāhiye. Aur agarchi daryā se utarnā mushkil thā, kyaunki Rājput log muqābalah par the; phir bhī Nūr Jahān ne fauj kā dil barhāne ke wāṣṭe sab se awwal apnā hāthī daryā men dāl diyā, aur chār tarkash tīron ke khālī kiye. Is Begam ke chār pilbān māre ga’e; aur us ke betē ke bhī bāzū par zakhm lagā. Jab ki fauj-i-shāhī kināre par ā ga’i, Rājputon ne pai-dar-pai ḥamle kar ke un ko shikast di. Phir fauj-i-kaṣīr basar-kardagi bahādur amīron ke aṭrāf se ā ga’i, aur Mahābat Khān ki picḥhli fauj par ḥamlah kiyā. Yih fauj agarchi qarib pādshāh ke khīme ke pahunch ga’i thī, aur tīr barān ho rahā thā; magar sirf pādshāh ne dhāleṅ dāl di thīn, is liye wuh bach rahā thā. Ākhir-kār Mahābat Khān ne fath pā’i, aur Nūr Jahān Lāhor ki ṭaraf bhāg ga’i; magar pādshāh ne us ko khatt likh kar lashkar men bulwāyā. Mahābat Khān ne Nūr Jahān ke qatl karne kā irādah kiyā, aur pādshāh se bhī jabraṅ us ke qatl-nāma par dast-khatt karāyā. Lekin is ‘aqlmand Begam ne yih kahā, ki “Ab to main māri jā’ūngī; mujh ko mere malik se sirf mil lene do.” Mahābat Khān ne ijāzat di, magar is shart par, ki “Mere rū-ba-rū mulāqāt ho.” Chunānchi pādshāh ke khīme men wuh dākḥil hū’i, aur apne khāwind ke rū-ba-rū khāmosh khapī rahī. Jahāngīr bhī us ke husn aur khūb-ṣūratī aur ghamm ko dekh kar rone lagā, aur lāchār ho kar Mahābat Khān se minnaton kar ke apnī biwi ki jān-bakhshī karwā’i. Gharaz-ki Mahābat Khān ne us ki jān-bakhshī ki. Ba’d az-ān Mahābat Khān pādshāh ko Kābul le gayā, aur nihāyat adab se pesh āyā, aur tamām julūs-i-shāhī qā’im rakḥā.

Ākhir-kār quṣūr ke ‘afv karāne ke ba’d us ne apnā ikhtiyār sab chḥor diyā: pādshāh kā miṣl-i-sābiq ikhtiyār ho gayā. Magar us ne aisī ḥarakat na ki thī jo chāhī se baiṭhūā us ko naṣīb hotā. Pādshāh, Jahāngīr kā mizāj to albatṭah aisā thā, ki wuh us ke jurm ko mu’af kar detā, balki bhūl bhī jātā; lekin Nūr Jahān ke dil men



jo bughz thā, wuh bighair Mahābat Khān ke maqtūl hone ke hargiz raf' nahīn ho saktā thā. Mahābat Khān to bhāgā; aur Nūr Jahān ne fauraṇ us kā māl zaḥṭ kiya, aur ishtihār diyā, ki "Jo ko'ī Mahābat Khān kā sar kāṭ kar lā degā, barā in'am Sarkār se pā'egā." Tamām 'azlā' men us kī talāsh hū'ī. Āṣaf Khān, Wazir-i-Āzam, jo bajāe khud pādshāh thā, apnī bahan, Nūr Jahān ke zulm aur un ḥarakāt-i-nā-shā'ista se, jo wuh pādshāh ko bahkā kar karwāti thī, bahut nārāz thā, magar lāchār thā. Ek roz shām ke waqt jab andherā ho gayā, Āṣaf Khān ko us ke naukaron ne ittlā' di, ki 'Ek gharib admī kuchh 'arṣ karnā chāhtā hai." Us ke dil men raḥm āyā; us ko sāmne bulwāyā. Jab us ne dekhā, ki yih wuhī shakhs Mahābat Khān hai, jo abhī malik tamām Hindustān kā thā, us ko khalwat men le gayā, aur khud apnī bahan ke zulm aur Jahāngir kī be-wuqūfī kā iqrār kiya. Tab Mahābat Khān ne yih ṣalāḥ batlā'ī, ki "Sab se bihtar tadbīr, intizām-i-mulk ke wāste yih hai, ki Shāh Jahān takht-nishīn kiya jā'e." Āṣaf Khān ne taammul ke ba'd is rāe ko pasand kiya; aur usī waqt se khaṭṭ kitābat Shāh Jahān se shurū' hū'ī. Lekin chand mawānī' ke ba'is se is tajwīz kā iḥār na ho sakā. Isī 'arṣah men bādshāh ko dame kī bimārī Mulk-i-Kashmīr ke qiyām ke ba'is bahut barḥ ga'ī; aur nawīn tārīkh-i-Māh Nawambar san 1627 'Isawī ko muṭābiq san 1036 Hijrī ke us ne intiqāl kiya, aur Shahr-i-Lāhor Shāh-dara men madfūn huā.

Isī pādshāh ke waqt men Sar Tāmas Ro, Safir-i-Jems Awwal Shāh-i-Inglīstān darbār-i-shāhī men ḥāzīr huā; aur us ko Sūrat men koṭhī banāne kī ijāzat milī thī. Yih pādshāh nek-mizāj aur raḥm-dil thā, magar aisā mutalawwinu-l-mizāj thā ki us se intizām aisi barī saltanat ke umūr kā na ho saktā thā. Tāmas Ro Ṣāhib likhtā hai, ki "Agar yih pādshāh bad-mizāj hotā, to bihtar hotā." Ba-nisbat aur loḡon ke Ṣūfiyah aur mast faqīron se bahut khush thā aur un se suḥbat garm rakhtā thā.

#### SHĀH JAHĀN BĀDSHĀH.

Jahāngir Ibn-i-Akbar ke do larke, ya'nī Shāh Jahān aur Shahr Yār, us kī wafāt ke ba'd baqī rahe. Agarchi wafāt ke waqt Jahāngir

ne yih waṣīyat Nūr Jahān Begam ke warghulāune par kī thī, kī Shahr Yār, jo Nūr Jahān kī lar̥kī se manṣūb thā, aur yih lar̥kī usī Sher Afgan Khān se thī, ba'd us ke wāliy-i-takht o tāj ho ; magar Mahābat Khān ne, aur Āṣaf Khān, Wazīr-i-Āzam ne, agarehī wuh Nūr Jahān Begam kā bhā'ī thā, Shahr Yār ko zī-ḥaqq na samajh kar Shāh Jahān kī takht-nishīnī ke wāṣṭe tadbīr kī. Aur Shahr Yār, Shāh Jahān ke pahunchne ke qabl, kī wuh un aiyām men Dakhan men thā, shikast khā kar asīr aur andhā bhī ho chukā thā. Jab kī Shāh Jahān takht-i-saltānat par baiṭhā, to us se nihāyat kharāb tadbīren intizām-i-saltānat kī nisbat wuqū' men ā'īn. Wuh yih thiṇ, kī pahle apne bhā'ī, Shahr Yār, ko aur phir us kī aulād ko qatl kiyā ; aur Tīmūr kī aulād men sab mardon ko yahān tak kī bachchon ko bhī, zinda na rakhā : sab ko chun chun kar qatl kiyā.

Bā-wujūd is ihtiyāt ke raqīb-i-saltānat ek aur shakhs zāhir huā, ya'nī ek shakhs musammā ba Lodhī, jo apne ta'īn Afghānī Khān-dān se batlatā thā. Jis waqt Shāh Jahān Dakhan men bar-sar-i-fasād thā, is amīr ko Pādshāh Jahāngīr ne us ke muqābalah ke wāṣṭe rawāna kiya thā. Wuh Jahāngīr kī wafāt kī khabar sun kar Shāh Jahān kī takht-nishīnī kā mānī' huā. Shāh Jahān ne us ko kahlā bhejā, kī "Agar tū mutāba'at karegā, to tere ḥaqq men aachhā hogā." Wuh rāzī ho gayā ; aur us ko Sūbah-'i-Mālwa 'atā huā. Ba'd az-ān ḥasbu-l-ḥukm Shāh Jahān ke wuh Dāru-l-khilāfat men āyā, aur darbār men gayā ; waq'at-i-sābiqah ko badastūr na pāyā, balki ahl-kārān-i-shāhī ko tadbīr-i-giriftārī men pāyā. Yih dekh kar us ke betē, Āzmat Khān, ne darbār men talwār khīnch lī ; aur Lodhī apne makān ko jald bhāg āyā. Ek sau admī us ke ham-rāh the : sab us makān men mahṣūr ho ga'e. Magar chūnki wuh dushmanon men ghīr gayā thā, aur maut kā sāmna thā, is liye tarah tarah ke khadshe us ke khayāl men guzarte the. Isī 'arṣe men ghar se āwāz rone kī ā'ī. Lodhī fauran andar gayā ; dekhā to tamām 'auraton khūn men loṭ rahī bain. Ma'lūm huā kī in 'auraton ne ba-pās-i-'iffāt-o-nāmūs badīn khayāl, kī mabādā dushmanon ke hāth men asīr aur qaid ho jā'en, apne hāth se apne apne shikam men khanjar mār liye. Lodhī yih dekh kar diwāna ho gayā. Al-gharaz donon beton ko ham-rāh le kar

ghoṛe par sawār huā, aur naqqāre bajwātā huā makān se niklā, aur pukār kar kabtā jātā thā, ki “zālim Bādshāh ko in naqqāron se ittīlā’ detā hūn, ki main jātā hūn, aur do-bāra ā kar us kī jān par muṣibat barpā karūngā.” Agarchi us kā ta’āqub fauran kiyā gayā, magar wuh lashkar ko apne pās na āne detā thā. Afsos, ki Daryā-i-Chambal, jo mausim-i-bārān ke bā’is se tughyānī par thā, us kā sadd-i-rāh huā. Magar phir bhī us ne yih bahāduri kī, ki fauj ke qarīb āte hī ghoṛe daryā meṇ dāl diye. Aur agarchi Azmat Khān, us kā pyārā betā, aur us ke ham-rāhī māre ga’e, magar wuh pār ho gayā, aur Dakhan meṇ jā kar us ne ‘alam-i-sar-kashī afrākhtā kiyā. Aur apne rafīqon ko jam’ karne ke ‘alāwah Golkandā aur Daryāpūr ke Hākim ko bhī pādshāh se bāghī kar diyā; kyaunki yih log Shāh Jahān se āzurda-khāṭir bahut the. Shāh Jahān aisā dar gayā, ki us ko bidūn jang karne ke aur kueh chāra na sūjhā : aur chūnki tamām fauj par us ko bbarosā bahut na thā, is liye ‘alā-hidah ‘alā-hidah fauj ba-sar-kardagī Irādat Khān aur aur sardāron ke mukhtalif maqāmon par mufeidon kī tambīh ke wāṣṭe rawāna kī. Magar yih fauj Lodhī par bargiz ghālib na hū’i; sab ne shikast pā’i. Ākhir-kār Shāh Jahān ne Āṣaf Khān ko tamām fauj kā Sipah-sālār muqarrar kiyā. Āṣaf Khān kā nām sunte hī dushman parāganda ho ga’e; lekin Lodhī qismat-āzmā’i ke irāde par lartā rabā, aur ākhir ko shikast khā’i. Golkandā kā pādshāh muṭī’ ho gayā : aur chūnki Lodhī ke pakarwā dene kī bhī shart ho ga’i thī, is liye wuh apne mulk se nikal gayā. Aur agarchi pādshāh ne tamām raste band kar diye the, magar wuh shujā’ ma’ apne rafīqon ke Mālwa meṇ pahunchā. Shāh Jahān ne fauran ‘Abdullāh ko ma’ das hazār sawār ke Lodhī ke ta’āqub ke wāṣṭe muta’aiyan kiyā. Lodhī is bā’is se, ki us ko ittifaq hamlon kā aṣnā-i-rāh meṇ partā thā, bahut shikasta-hāl ho gayā thā. Jab us ne dekhā, ki fauj-i-kaṣīr qarīb ā ga’i hai, aur us kā barā betā bhī mārā gayā, sirf tīs admī sāth rah ga’e haiṇ, aur yih bhī ghir ga’e haiṇ; tab dushman par hamlah kiyā. Nāgahān ek golī us kī chhātī meṇ aisi lagi ki jān-bar na huā; aur hamrāhī bhī us ke sāth usī khet meṇ rahe.

Mahābat Khān, Sipah Sālār, aur Āṣaf Khān, Wazīr-i-Azam, Shāh Jahān ke dārbār meṇ mushīr hū’e : aur bādshāh ne un donon

ke mashware par ba'ze da'ah zulm aur sitam hī se nahīn dast-kashī kī, balki aur bahut achebhe kām kiye; chunānchi Rājā-i-Bundel Khand kī jān-bakhshī kī, aur phir us ko us ke mulk par bahāl kar diyā. Agarchi yih bādshāh mazhab-i-Islām mein muta-'aṣṣib na thā, magar ibtidā mein Hindū'on kī behūda bāten dekh kar un se bahut barham huā, aur un ko sakht izā dī. Jab dekhā ki Hindū apne buton kī parastish aur wāhiyāt rusūm se bāz nahīn āte, lāchār ho kar Musalmān aur Hindū donon ko yaksān samajhne lagā, aur phir kisi ko izā na dī. Us ke waqt mein Hind kī saltanat bahut wasī' ho ga'ī. Qandahār aur Balkh par bhī us ne charhā'ī kī. Agarchi wahān Shāh 'Abbās ke istihkām ke sabab se kām-yāb na ho sakā, magar Mulk-i-Dakhan ke rāja aur nawāb ba-nisbat sābiq ke us ke ziyādah mutī' the.

Hindustān mein Shāh Jahān Pādshāh ne bare bare raunaq-dār makānāt banā'e; chunānchi Dihli-i-nau ko Shāh-Jahān-ābād khitāb de kar apnā maskan muqarrar kiyā; aur Qil'ah Sang-i Surkh kā aisā tuhfah banwāyā, ki Pādri Hibar Shāhib farmāte hai, ki "Main ne apnī zindagī mein aisā tuhfah qil'ah kahīn nahīn dekhā." Jāmi' Masjid, jo is shahr mein banwā'ī, nihāyat 'ālī-shān hai; us ke barābar tamām Hindustān mein kahīn ko'ī masjid nahīn hai. Rauzah-i-Tāj Maḥall, jo Āgra mein is pād-shāh ne apnī pyāri biwī ke wāṣṭe banāyā thā, tamām 'imāraton se 'umdaḥ hai. Yih Rauzah sang-i-marmar kā banā huā hai, aur ek sau nawwe gaz murabba' mein banā hai. Bare qimati patthar us mein lage hū'e hai; quṭr gumbad kā 23 gaz hai; aur gird us ke barā dil-chasp bāgh banā huā hai. Is Rauzah kī ta'mīr mein 75 lākh rūpiya kharch huā hai.

Bīs baras tak Shāh Jahān kī saltanat amn se rahī. Jab Āsaf Khān aur Mahābat Khān, jo rukn-i-a'zam us kī saltanat ke the, mar ga'e, to pādshāh ko umūr-i-saltanat mein ziyādah maṣrūf honā parā; aur us ne tamām khalq ko apne se rāzī kiyā. Is pādshāh ke chār bete bare khush-naṣīb aur qābil hukm-rānī ke the. In larcon mein aur bāp mein bā-ham ba-darjah-i-kamāl irtibāṭ thā. Un ko bare bare 'uhdon par bādshāh ne muqarrar kar diyā thā. Magar jab ki wuh jawān hū'e, to un mein barī dushmanī paidā hū'ī; kyūnki un mein har ek da'wā takht kā

rakhtā thā. Dārā Shikoh, barā betā, bādshāh ko bahut 'azīz thā; wuh hamesha pādshāh ke sāth rahtā thā; us ke wāste wali-'ahdī kī tajwiz thī. Yih laṛkā agarchi nek aur 'ilm-dost aur 'aish o 'ishrat se mutanaffir thā, par 'āqibat-andesh na thā, aur us ke mizāj meṇ jaldī bahut thī. Dusrā betā, Shujā' 'Abbās, raḥm-dil aur dilāwar thā. Wuh Mulk-i-Bangālā par ḥukūmat kartā thā. Tisrā, Mirzā Murād, jalīl-ul-qadr aur diler aur jang-jū thā. Yih bādshāh-zāda Gujrāt meṇ ḥukm-rānī kartā thā.

Lekin chauthā betā in sab bhā'iyoṇ balki bap se bhī alag ek khaslat rakhtā thā. Is shāhzāda kā nām Aurang-Zeb thā. Wuh narm-mizāj thā, magar sard-mihr thā; aur agarchi bedār-maghz aur sāhib-i-iḥtiyāt thā, lekin sāth hī is ke pur-fann thā, aur toṛ joṛ meṇ lagā rahtā thā. Is bāt meṇ ustād thā, ki baṭīn meṇ kuchh thā, zābir meṇ kuchh. Agarchi tez-hosh aur zīrak thā, lekin tīra-baṭīn thā. Hamesha is fikr meṇ rahtā thā, ki dushman muwāfiq hoṇ, aur dost paidā hoṇ. Magar bā-wujūd in sab bātoṇ ke shujā' thā, aur fann-i-sipāhgārī meṇ hosh-yār aur khūb-ṣūrat aur wajīh thā; aur shurafā-o ahl-i-darbar se alṭāf aur mihr-bānī se pesh atā thā. Us kī taqrīr dil-pazīr aur faṣīḥ thī. Magar jumlaḥ umūr meṇ numā'ish us ke mizāj meṇ is darjah thī, ki us ke mazhab ke mu'āmalāt meṇ bhī riya kā ḡann kiya gayā hai. Aur agarchi us ne mazhab ko apnī tadbīr-i-mulki kā ek ālah banāyā ho, lekin ḥaqīqat meṇ wuh apne mazhab meṇ sādīq thā, aur muta'aṣṣib bhī thā; ḥattā ki ek martabah tark-i-dunyā kā izhār kiya. Aur tamām zindagī bhar wuh apne mazhab par aisā qā'im rahā, ki ba'z auqāt aise mu'āmalāt meṇ bhī, jo us kī gharaz ke nihāyat munāfi the, apne mazhab ko 'aqā'id kā pā-band rahā. Namāz aur tilāwat-i-Qurān meṇ maṣrūf rahtā thā, aur mubāḥasah-i-mazhabī kiya kartā thā. Us kī ṭabī'at meṇ inkisār thā; aur ranjish meṇ taḥammul, aur muṣibat meṇ taslim us kī khū thī. Sab se ziyādah 'alāwat ghulw-i-mazhab kī yih thī, ki but-parastī aur kufr ko dabāne aur apne mazhab ko farogh dene meṇ hamesha dil se sāfi rahtā thā. Bā-wujūd is ke ḥarīṣ o ṭammā' aisā thā, ki apne maṭlab ke istiḥṣāl meṇ ba'z waqt mazhab o akhlāq kā l'ḥāz na rakhtā thā. Aur chūṅki us ne muddat tak Dakhan kī fāuj par 'sipah-

salārī kī thī, is liye wuh ba-nisbat apne bhā'iyon ke ziyādah tajribah-kār aur fann-i-sipahgari men barā qā'idah-dān ho gayā thā.

Is asnā men Shāh Jahān aisā bimār huā, ki be-hiss-o-harakat ka'ī dīn tak parā rahā. Dārā Shikoh ba-mujarrad lāhiq hone is bimārī ke hasbu-l-ḥukm apne bāp ke pādshāh huā, aur saltanat kā kār o bār karne lagā; aur bhā'iyon se is tarāh pesh āyā, jis se rashk aur khayāl burā'ī kā sāf pāyā jātā thā; kyūnki us ne ḥukm-i-qata'ī de diyā thā, ki kisi tarāh kā khatt yā akhbār un ke pās ko'ī rawāna na kare: aur un tamām umarā ko, jo un ke khair-khwāh the, jalā-waṭan kar diyā. In ḥarkaton se us ke bhā'iyon ke dilon men, jo pahle hī se us se ranjida the, kīna kī āg ziyādah bharak ga'ī; aur ab tawaqquf karne kā ko'ī 'uzr na rahā. Bā-wujūd aise band o bast aur rok ṭok ke, un ko apne bāp kī bimārī kī khabar barābar pahunchti thī; balki un ko us ke marne kā shakk bhī ho gayā thā. Unhon ne bhī aisā taur ikhtiyār kiyā, jis se sirf yih sābit hotā thā, ki apnī jān kī muḥāfazat kar rahe hain. Mirzā Shujā' ne, jo Bangālā men thā, wahān se ḥarakat kī, aur Dārū-l-Khilāfat ko chālā. Us ke thoṛe dinon ke ba'd Mirzā Murād ne Gujrāt se tamām ḥaqīqat-i-hāl Aurang-Zeb ko likhī, aur us ko kahlā bhejā, ki "Ham tum donon mujtami' ho kar Dārā Shikoh par charḥā'ī karen." Is rāc ko Aurang-Zeb ne bhī pasand kiyā.

Is 'arsah men pādshāh ne shīḥat-i-kulli pa'ī. Dārā Shikoh ne nihāyat farmān-bardārī se umūr-i-saltanat se dast-bardār ho kar, phir ikhtiyār-i-saltanat apne bāp ko de diyā. Aur Mirzā Shujā' ko likhā gayā, ki "Chūnki tum ne fauj-kashī shahanshāh ke marne ke khayāl se kī thī, ab lāzim hai ki aisi bāton se tum dast-bardār ho." Lekin chūnki use hīrṣ o ṭama' aur arzū-i-saltanat-o-mulk-gīrī bahut thī, is khabar ko us ne ghair-mu'tabar khayāl kiyā, balki shahanshāh ne apne hāth se jo nāmē likhe the, un ko bhī us ne jā'li taṣawwur kiyā. Is liye Mirzā Sulaimān Ibn-i-Dārā Shikoh ne Gangā ke kināre par us ko jā kar ghikast dī; aur wuh bbāg kar Muṅger ke qil'ah men mustaḥshin huā. Sulaimān kī fauj ne us qil'ah kā muḥāṣarah kar liyā. Ek aur ma'rikah junūb kī tarāf yih huā, ki Aurang-Zeb ne fauj jam'

kar ke ḥasb-i-talab Mirzā Murād ke bahut jald kūch kiyā; magar Shāh-zāda-i-Murād ko aise kalimāt likhe, jin se us ko yaqīn huā, ki Aurang-Zeb merā muṭī' rahegā. Chunanchī Aurang-Zeb ne yih likhā, ki "Main sirf tumhīn ko takht-i-Hindustān ke lā'iq jāntā hūn; aur ra'ayā bhī tumhāre bādshāh hone se khush hai: aur main tumhārī madad karūngā. Aur mere dil ki to yih tamannā hai, ki gosha-i-'ibādat meṃ baith kar apnī zindagi yād-i-Ilāhī meṃ basar karūn." Yih likhā dekh kar Murād fareb meṃ ā gayā. Donoṃ pādshāh-zādoṃ ne fauj le kar kūch kiyā, aur Narbadā nadi ke kināre par milē. Ba'd 'ubūr daryā-i-muzkūr ke Jaswant Singh Rājput ko, jo bādshāh ki taraf se ek fauj-i-kaṣir sawāroṃ kī liye hū'e muqābalah ko gayā thā, shikast-i-fāsh di.

Shāh Jahān yih wāridāt sun kar bahut ḥairān aur hirasān huā; kyūnki wuh khūb jāntā thā ki anjām ko us par kuchh muṣibat paregī. Yih soch kar shahanshāh ne irādah kiyā, ki "Dārā Shikoh kī taraf ho kar main bhī maidān-i-jang meṃ jā'ūn." Magar Dārā Shikoh kī bad-qismatī ke sabab se wuh bāz rahā. Aur Sulaimān-Ibn-i-Dārā ko ḥukm huā, ki "Shujā' se sulh kar ke is dushman-i-khaufnāk par charhā'ī karo." Aur Dārā Shikoh ko ḥukm diyā gayā, ki "Tā-waqte-ki Sulaimān Shikoh na ā jā'e, dushman se larā'ī kā irādah na karnā." Dārā Shikoh ek lākh sawār le kar Daryā-i-Chambāl ke kināre par, jahān se Āgre ko ba-āsānī murāja'at ho sakti thī, morcha-bandi kar ke parā rahā. Aurang-Zeb aur Murād jab qarib ā'e, to shāhī fauj dekh kar bahut muta'ajjib hū'e. Mirzā Murād ne yih ṣalāh di, ki "Morehāl tor do." Aurang-Zeb ne 'āqibat-andeshī aur hoshyārī se yih bāt ba'id jānī. Use ma'lūm huā ki ek rāh pahāroṃ meṃ se sidhī Āgre ko jāti hai; is liye apne lashkar ko usī jagah chhor kar fauran Āgre ko rawāna huā. Mirzā Shujā' ko ab Dārū-l-Khilāfat ke chhoṛne yā larne, ke siwā chāra na rahā; lekin us kī garm-mizājī ne us ko āmāda-'i-jang kiyā. Gharaz-kī larā'ī hū'ī; aur donoṃ taraf kī fauj ke bhāg jāne ke ba'd Aurang-Zeb ke pās ek sau sawār rah gayā, aur Dārā ke pās ek hazār. Us waqt Aurang-Zeb māyūs ho gayā. Ittifāq se ek namak-ḥarām amīr kī ṣalāh ke sabab se Dārā Shikoh hāthī par se utar kar ghōre par

sawār ho gayā. Fauj men tahlukah par gayā ; is liye sārī fauj mutafarriq o parāganda hū'ī. Darā ki sipāh bhāg ga'ī, aur us ko shikast hū'ī. Tafṣīl is ki yih hai, ki in donoṃ Shāh-zādoṃ ki fauj ke do hisse the. Ek hisṣah par Mirzā Murād, aur dūsre par Aurang-Zeb ḥukm-rāṇ thā. Jis firqah kā Sipah-Sālār Murād thā, us par Darā ne barī teẓī aur zor se ḥamlah kiyā ; yahān tak ki ṣaff sipāh kī ṭūṭ ga'ī, aur Mirzā Murād zakḥmī huā ; balki us kī jān par khaṭrah thā. Aurang-Zeb ne yih ebālākī kī, ki usī 'arṣah meṃ barī sīna-zorī se muqābalah kar ke us fauj ko, jo us ke muqābil thī, bhagā diyā ; aur usī waqt dūsarī ṭaraf kī fauj kī madad ko gayā, aur fath pā'ī.

Ab donoṃ Shāh-zādoṃ kī fauj mil kar Agre ko ā'ī. Aur chūnki Murād zakḥmī ho gayā thā, is liye Aurang-Zeb ko khush-ṭalī'ī se tamām fauj kā ikhtiyār ḥāṣil ho gayā. Pahlē hī pahal us ne Sulaimān Shikoh ke pās elchī bhej kar us ko apne se milā liyā. Ba'd az-ān apne bāp, Shāh Jahān, ko qābū meṃ lāne kī fikr meṃ huā. Magar yih amr us ko bahut nāzūk aur dushwār ma'lūm hotā thā, kyūnki qil'ah bahut mazbūṭ thā ; aur is khabar ko sunne se, ki shahanshāh ko Aurang-Zeb ne qaid kar liyā hai, log bahut phir jāte, aur fasād par jātā ; aur Shāh Jahān aisā bhī na thā, ki us ke fareb meṃ ā jātā. Gharāz-ki fareb se bāp ko qābū meṃ karne kī tajwīz kar ke ek elchī Shāh Jahān kī khidmat meṃ rawāna kiyā. Us ne pādshāh kī khāṭir-jam' kī, aur mahabbat aur sa'ādatmandī kā iẓhār kiyā. Shāh Jahān samajh gayā, ki yih sab us kā fareb hai. Gharāz-ki shahanshāh ne farmāyā, ki agar us ke dīl meṃ kuchh fareb nahīn, aur wuh sa'ādatmand laṛkā hai, to kis wāṣṭe yahān ā kar ḥāẓir nahīn hotā ? Aurang-Zeb ne yih sun kar apne beṭe, Muḥammad, ko bhej diyā. Us ne jā kar dekhā, ki qil'ah meṃ sipāhī aur sawār kamīngāh meṃ Aurang-Zeb kī giriftārī ke wāṣṭe kharē the. Is liye Muḥammad ne 'arṣ kī, ki "Is sipāh ke yahān rahne se shakk partā hai. Agar sipāh na rabe, to mere wālīd ḥāẓir hon." Pādshāh ne sipāh ko ḥukm diyā, ki "Chale jā'o." Pas is ṭarah se Muḥammad Mirzā ne qabṣah Qil'ah-'i-Agra par kar liyā. Shāh Jahān bahut 'ijz o inkisār kartā rahā ; kuchh na huā.

Ab sīrf Mirzā Murād se Aurang-Zeb ko faṣlah kar nā tāqī



rahā; so us kī yih sūrat hū'ī, ki us ko kahlā bhejā, ki "Āj kī shah ko ap kī ziyāfat hai." Mirzā Murād khushī se āyā. Aurang-Zeb ne khūb nāch aur rāg aur rang karwā'e, aur barī dhūm se ziyāfat kī taiyārī kī. Mirzā Murād jab bad-mast ho gayā, aur māre maze ke rāt ko usī jagah par kar so rahā, us waqt hasbu-i-hukm Aurang-Zeb ke us ko bāndh liyā gayā, aur hukm diyā, ki "Agar wuh merī tabī'-dārī men zarā bhī quṣūr kare, to fauran mār dālo." Gharaz wuh bhī muqaiyad ho gayā. Ab kyā ho saktā thā?

Chūnki Aurang-Zeb pahle se barā 'ālim aur muttaqī thā, aur dam zuhd aur gosha-nishīnī aur nafrat-i-dunyā kā bhartā thā, aur Hājj kā irādah mashhūr kar rakhā thā; is wāste ab yakāyak dā'wā shahanshāhī kā karnā un auṣā' ke khilāf pā kar is amr kā tālib huā, ki log us ko samjhā den, ki "Āp khalqullāh ke inṣāf aur ra'āyā par raḥm karne ke liye irādah Hājj kā dūr kijiye, aur ādshāhat ikhtiyār kijiye." Chūnānchī aīkā hī huā: aur ba'd thoṛe i'rāz aur inkār ke apne dilī maṭlab ke bar lāne ko musta'idd ho gayā, aur takht-nishīn huā. Agarchi us ne tamām 'umr apne lāp ko quid men rakbā, magar hamesha us kī 'izzat kartā rahā.

### ILĀL AURANG-ZEB BĀDShĀH KĀ AUR ZAWĀL

#### SALTANAT-I-MUGHALĪYAH KĀ.

San 1658 'Isawī men Shāh Aurang-Zeb, jis kā laqab 'Ālam-gīr thā, takht-i-Hindustān par julūs-farmā huā, aur yih khayāl kiyā, ki "Jab tak Dārā Shikoh aur Mirzā Shujā' kā nām o nishān saflah-i-hastī se na miṭ jā'egā, tab tak merī saltanat mustaqill na hogī." Kyūnki Dārā Shikoh ko khud Shāh Jahān ne takht par biṭhā diyā thā; aur us ke auṣāf-i-ḥamīdah aise the, ki ra'āyā kī tabī'at us kī ṭaraf bahut mā'il thī. Is liye Aurang-Zeb ne awwal usī shāh-zāde ke istiṣāl kī fikr kī. Dārā Shikoh Lāhor kī ṭaraf murāja'at kar gayā, aur wabān pahunch kar us ne dushman kī jam'iyat se ziyādah fauj jam' kar li. Magar badīn sabab, ki us kī fauj na'ī thī, aur Aurang-Zeb kī sipāh āzmūda-kār thī, muqābalah karnā murāsib na jān kar Daryā-i-Sindh ke pār chālā gayā, aur us safar men bahut taklīf utbhā'ī. Aur us kī fauj ke ādmī rafta rafta kam hote ga'e, yahān tak ki bahut thoṛe ādmī namak-ḥalāl us ke han-rāh rahe.

Isī asnā men Aurang-Zeb ko yih khabar pakuchī, ki Mirzā Shujā', us kā dūsra bhā'i, Bangāla se fauj le kar us ke muqābalah ko chālā hai. Is liye Dārā Shikoh kā ta'āqub chhor kar Bangāla kī taraf larne ko chālā. Ilāhābād men us ko dekhā ki barī bhā'i fauj le kar parā hai. Jaswant Singh Rājput, jo Aurang-Zeb ke ham-rāh asnā-i-rāh men ho gayā thā, us se judā ho kar us ke 'aqab men hamlah-āwar huā. Aurang-Zeb ko barī diqqat waqī' hū'i : sāmne dushman se muqābalah thā, aur 'aqab men ek aur dushman-i-nāgahānī paidā huā. Us waqt bādshāh hairān huā ; lekin barī dilāwari se apne bāthī par jamā huā baithā rahā. Isī kār-zār men Aurang-Zeb ke ek sardār ne barī kar Mirzā Shujā' ke bāthī ko zakhmī kiyā : aur jānib-i-mukhālīf se ek amīr ne apnā bāthī āge barhā kar Aurang-Zeb ke bāthī ke pās lā kar aisi takkar lagwā'i, ki bādshāh kā bāthī ghutnon ke bhal baith gayā. Bādshāh hawāss-bākhtā ho kar chāhtā thā, ki bāthī se utre. Itne men ek sardār musammā Mir Jumlah ne, jo 'uhdah-i-wizārat par mu'azzaz thā, pukār kar kahā, ki "Hāthī se na utarnā." Yih sun kar Aurang-Zeb ko zarā dhāras hū'i, aur bāthī ke pair men zanjīr dāl wā dī. Magar wuhī ghalaṭī, jo Dārā se hū'i thī, aur Aurang-Zeb bhī jis ko karte karte bach gayā thā, Mirzā Shujā' se wuqū' men ā'i, ya'nī bāthī se utar kar ghore par sawār huā. Fauj ne hauda khālī pā kar himmat hār dī, aur bhāgnā shurū' kiyā. Maidān Aurang-Zeb ke bāth āyā. Shujā' Bangāla ko bhāg gayā, aur Qil'ah-'i-Munger men mutahassin ho gayā.

Is asnā men khabar ā'i, ki Dārā Shikoh ne do-bāra Daryā-i-Sindh se 'ubūr kiyā ; aur ba'd qatī' karne registān aur mashaqqat o zahmat mausim-i-garmā aur safar-i-sa'b ke Gujrāt men dākhil ho gayā ; aur Šubah-dār-i-Gujrāt ko, jis kī beṭī Murād se mansūb thī, apnā rāfiq aur ham-dam banā kar fauj-i-kaṣīr ham-rāh le kar Rājputāna ko rawāna huā ; aur qarīb Ajmer ke, jo us kā dārū-l-khilāfat thā, ek maqām-i-mustahkam ḥāsil kiyā hai. Is liye Mirzā Shujā' kā ta'āqub chhor kar bādshāh wahān jald pahunchā, aur us kā lashkar ek zamīn-i-balaud par parā huā dekh kar ḍar gayā, aur fauran larā'i kī taiyārī kī. Dārā ko sakht sust likhō shurū' kiyā, tā ki maidān men ā kar larā'i shurū' kare ; magar us ne kuchh khayāl na kiyā. Tab ek fareb Aurang-Zeb

ne aur kiya. Wuh yih tha, ki do sardaron ki taraf se is mazmun ka khat likhwaya, ki "Ham se bara qusur hua, jo ap ki rifaqat se juda hui. Agar qilah ka darwaza ap fulan waqt par khula rakhen, to ham ma' apne rafiqon ke Huzur men hazir ho kar, jo hukm ho, baja laen." Harchand musinn aur 'aqlmand logon ne salah di, ki is men fareb paya jata hai, magar Dara Shikoh apni raddai ke sabab se na samjha; balki bar-khilaf is ke, us ke din-agh men yih samaya, ki in sardaron ke milne se fauj ki kasrat ho jae. Chunarhi us ne waqt-i-mu'ayan par darwaza khol diya. Sardaran-i-mazkur dakhil hue; aur un ke piche tamam fauj-i-padeshahi andar ghus gayi. Us waqt us ko ma'lum hua, ki yih fareb tha. Magar phir bhi bahut shuja'at aur mardanagi se lara, aur akhir-kar kam-yab na hua, aur thore admiyon ke ham-rahi Gujrat ki taraf ladin khayal, ki wahan par us ko panah milegi, bhaga.

Lekin Hakim-i-Gujrat ne us ko panah na di; aur Marhaton ne, jo us ki baqi-manda sipah thi, us ka tamam asbab lut liya. Ab Dara be-sar-o-saman registar ki janib bhaga; aur jis qadr Humayun Padeshah par taklifon guzri thi, us se ziyadah us ko bardasht karni parin. Gharaz-ki chand ham-rahi le kar Thatta men pahuncha aur yahan se agar chalta, to Iran ko, jahan us ki bahut khair-dari aur tawazu' hoti, chala jata; magar us waqt us ki pyari biwi, Nadirah Banu, jan-ba-lab ho rahi thi: us ne us ki mufaraqat halat-i-naz' men gawara na ki. Qarib is mauzi' ke sardar Jahan Khan ka maqam i-riyasat tha. Us ne chaha, ki "Wuh mere sath mihman-nawazi ka tariq baja lae." Yih sardar bara zalim aur khun-rez tha; aur us ke qatl ke liye Shah Jahan Badshah ne do daf'ah hukm diya tha, magar Dara Shikoh ki shafa'at se donon daf'ah us ki khat mu'af ho kar jan bach gayi thi. Is tawaqu' par Dara ko khayal tha, ki "Wuh mujh se kuch husn-i-suluk karega." Magar bajae is ke, us muhsin-kush ne us ka ta'qub kiya. Jab ki Dara apni biwi se rukhsat ho kar chalta tha, ki kisi taraf ko nikal jae, sipahiyan ne us ko aghera, aur pakar ke Khan-i-Jahan ke hawalah kiya. Wuh Dara ko ba-kamal gillat o khwari Dihli men laya, aur 'Alamgir ke sapurd kar ke Lahr ki taraf rawana hua. Rah men Khan-i-Jahan ko kisi ne

qatl kar dālā. Pādshāh ne chand qātilon ko tajwīz kar ke hukm diyā, ki rāt ko Dārā Shikoh kā sar kāt dālen. Chunānchi aisā hī huā.

Ab sirf ek bhā'i, Mirzā Shujā', Pādshāh ki nazron men khār thā, aur sirf us ki jānib se us ko khatrah thā; kyūnki us ne fursat pā kar bahut fauj jam' kar li thī. Is wāste pādshāh ne apne bete, Shah-zāda Muḥammad Sulṭān ko, apne Wazīr, Mir Jumlah, ke ham-rāh Mirzā Shujā' ke muqābalah par rawāna kiyā. Wahan 'ajab mājarā guzrā. Mirzā Muḥammad Sulṭān aiyaṁ-i-tifli men apne chachā, Mirzā Muḥammad Shujā', ki lar'ki par 'āshiq ho gayā thā: aur is fasād ke sabab se, jo us ke bāp aur chachā men thā, agarchi us kā 'ishq faro ho gayā thā; magar ek khaṭṭ jab us lar'ki ne apne bāp ki sifarish men Mirzā Muḥammad Sulṭān ko likhā, to khaṭṭ ke parhne se 'ishq ki āg phir bharak uṭhī; is liye wuh fauran apne chachā se jā milā. Mirzā Shujā' ne us ki barī khāfir-dāvi kī, aur apnī lar'ki se us kī shādī kar dī; aur rusūm i-shādiy-c-khushī ke ba'd donon lar'kī men maṣrūf hū'e. Chūnki Mirzā Muḥammad Sulṭān ko yih gumān thā, ki "Mujh ko dekh kar Aurang-Zeb kī tamām sipāh mere ham-rāh ho jā'egī," is liye wuh sab se awwal ṣaff men kharā huā. Aur jab us ne dekhā ki dushman ke sawār us kī taraf barhe, to us ne nādānī se yih khayāl kiyā, ki "Yih log hamāre sāth shurik hone ko āte haiṁ." Magar jis waqt unhon ne sakht hamlah kiyā, us waqt us kī ānkhen khuliṁ; aur chachā aur bhatije donon khūb laṛe. Magar chūnki Bangāla kī fauj buz-dil thī, aur Mir Jumlah kī fauj āzmūda-kār thī, maicān-i-jang Mir Jumlah ke hāth āyā. Ab is Shah-zāda-i-Mirzā Muḥammad Sulṭān ko barā khauf huā, aur samjhā, ki "Bāp ke fareb se ab main na bach sakūngā." Isī asnā men Shah Aurang Zeb ne ek khaṭṭ Mirzā Muḥammad ke nām is taur par likhā, ki goyā wuh us ke khaṭṭ kā jāwāb detā hai; aur us men yih maẓmūn thā, ki "Tum apne susre kī rifāqat chhor do." Aur us khaṭṭ ko is tarah rawāna kiyā ki Shujā' ke hāth ā jā'e. Chunānchi aisā hī huā. Shujā' ne jab wuh khaṭṭ parhā, to us ko shakk paidā ho gayā, ki wuh apne bāp se milā huā hai. Harchand us ne sīdāqat aur ṣafā'i kā izhār kiyā, magar us ko aisā shakk paidā huā, ki phir us kā raf' honā muḥal ho gayā. Aur

Aurang-Zeb kā bhī us khatt ke likhne se yibī maṭlab thā, so wuh ban paṛā. Chunañchī Mirzā Shujā' ne hukm diyā, ki "Tum apnī bīwī ko le kar Bangālē se chale jā'o."

Ab Mirzā Muḥammad Sulṭān ko ko'ī jagah amn kī naẓar na ā'ī; kyūnki tamām Hindustān meṇ 'amal-dārī us ke bāp, Aurang-Zeb, kī thī. Nāchār us ne apne bāp kī ṭaraf rajū' kī; aur us ne fauraṇ giriftār kar ke Goālyār ke qil'ah meṇ us ko qaid kiya, jahān wuh sāt baras ke ba'd ranj o muṣibat uṭhā ke faut huā. Aur Mirzā Shujā' Arākān ko bhāg gayā. Wahān ke rāja ne us ko ma' us ke 'ayāl o aṭfāl ke daghā se pakar ke mār dālā.

Shāh Jahān zawāl-i-salṭanat ke ba'd āṭh baras qaid rahā; magar 'Ālamgīr ne us kī 'izzat aur tauqīr qaid meṇ bhī bahut kī, aur us kī sakht o sust bāton ko bardāshṭ bahut kiya. Jab us ko khābar hū'ī, ki mere bāp, Shāh Jahān, ke marne kā waqt qarīb hai, to us ko itnī jur'at na hū'ī, ki wuh bāp ke sāmne jā'e; is liye apne beṭe, Shāh 'Ālam, ko bhejā; magar wuh us ke pabunehne se pahle hī mar chukā thā. Shāh Jahān kī wafāt san 1686 'Īsawī meṇ hū'ī.

Sulaimān Shikoh ko, jo Dārā Shikoh kā beṭā aur Aurang-Zeb kā bhatijā thā, aur apnī jān bachāne ko Koh-i-Himāliya meṇ phirtā thā, Rāja Sirī Nagar ne ḥasbu-l-hukm Shāh Aurang-Zeb ke pakar kar, 3-Janwarī san 1661 'Īsawī, maṭābiq gyaṛhwīn Jumāda-l-Awwal san 1071 Hijrī ko Dihlī ko rawāna kar diyā. Us waqt us ko bāthī par sawār kar ke shahr meṇ tashhīr kiya, ba'd az-ān pādshāh ke sāmne lā'e; pā'on kī beriyān kāṭ dālī ga'in, magar hāthon meṇ hath-karīyān paṛī hū'ī thīn. Huzẓār-i-darbār us kā yih ḥāl dekh kar rone lage, aur Aurang-Zeb ne bhī ranj kī shakl ba-zāhir banā lī. Sulaimān Shikoh ne 'arẓ kī, "Is taklif aur 'azāb se, ki har roz mujh ko be-fa'idah dawa'eṇ pilā'ī jāti haiṇ, yihī bihtar hai ki ek dafa'h main qatl kiya jā'ūn." Bādshāh ne narm āwāz se farmāya, ki "Nahīn, tum se achchhā sulūk kiya jā'egā." Magar yih 'ahd pūrā na hone pāyā thā, ki "Sulaimān shikoh aur us kā bhā'ī, Sipīhr Shikoh, aur Mirzā Murād kā chhoṭā larkā, yih sab Goālyār meṇ thore hī 'arṣah meṇ mar ga'e. Aur bādshāh kā beṭā, Sulṭān Muḥammad, jo usī qaid-khāne meṇ maḥbūs thā, kā'ī baras tak zinda rahā; lekin ākhir ko us ko hukm rihā'ī kā mil gayā.

Mirzā Murād kā yih hāl huā, ki Sulaimān Shikoh ke muqaiyad hone ke chand mahīne ke ba'd is bādshāh-zāde ne qil'ah kī shahrpanāh se ek rassī laṭkā kar bhāg jāne kā irādah kiyā thā; aur us dīwār ke nicheek Hindū 'aurat rahtī thī; us se us ne ijāzat bhī niche utarne kī le lī thī. Jis waqt kamand par kūd kar wuh niche utrā, wuh 'aurat aisī chillā'ī, kī nigahbānoṅ ko khabar ho ga'ī, aur un ko ma'lūm ho gayā kī wuh bhāgnā chāhtā hai. Aurang-Zeb ne yih khabar pā kar dil meṅ khayal kiyā, kī "Jab tak merā bhā'ī, Murād zinda rabegā, tab tak mujh ko be-shakk barā khaṭrah hai." Is liye us ko phir qaid kiyā, aur ek aisā laṭkā talāsh kiyā jis ke bāp ko Mirzā Murād ne Gujrāt kī hukūmat ke zamāne meṅ qatl kiyā thā; aur us ko samjhāyā, kī "Tū Mirzā Murād par khūn kā da'wā pesh kar." Chunānehi aisā hī huā; aur us ke muqaddamah kī taḥqīqāt ke ba'd qisās kā hukm diyā, aur Mirzā Murād ko apne rū-ba-rū talab kar ke qatl kar dālā. Ab kuchh andesha is bādshāh ko na rahā; sab bhā'iyōṅ aur bhatijōṅ ko apne bāp, Shāh Jāhān ke taur par qatl kar ke Hindustān kā khud-mukhtār pādshāh huā.

Is pādshāh ke 'ahd meṅ Shāh Abbās, Pādshāh-i-Irān, se ek daf'ah kuchh be-luṭfi ho ga'ī thī. Us kā bā'is Mir Munshī kā quṣūr thā, jis ne ghalaṭī se nāma par yih likhā thā, kī "Shāhan-shāh Ālam-gir kī taraf se yih nāma Wāliy-i-Irān ko pahuncho." Shāh Abbās yih dekhṭe hī barham huā, aur fauran āmāda-i-jang ho gayā. Harchand is amr se Aurang-Zeb ko barā taraddud huā, magar bahut istiqlāl se kām liyā, aur apne umarā aur wuzarā se bahut āshtī kī, aur sab se 'ahd aur iqrār liye. Lekin isī 'asnā meṅ Shāh Abbās ba-qazā-i-Ilāhī fant ho gayā; aur us kī jagah Shāh Ṣafī, us kā potā, takht-nishīn huā. Us ne apnā muik be-intizām pāyā, aur is liye ghair mulk par 'azm na kiyā. Phir jānibain meṅ sulh ho ga'ī.

Isī pādshāh ke 'ahd meṅ ek 'aurat, Musammāt Bustāmiya, ne dād o dihiṣh aur khulq apnā dikhā kar, Mewār ke ṣil' se bis hazār ādmī kā lashkar, jin meṅ jāti aur faqīr aur jogī aur munī shāmil the, jam' kar ke is pādshāh par charhā'ī kī, aur Āgre tak fath kartī hū'ī ehalī ā'ī, aur yih mashhūr hogayā, kī is 'aurat ne aisī qism kā khānā taiyār kiyā hai, kī jab apne lashkar ko

khilā detī hai, bar-waqt-i-jang wuh dikhā'ī nahīn dete; aur wuh sāhirah hai. Is liye Aurang-Zeb ke lashkar par khauf chhā gayā. Harchand Aurang-Zeb sipāh ko samjhā'ā thā, lekin wuh i'tiqād-i-bāṭil un ke dil se na jatā thā. Is liye us ne eband ta'wīz likhwā kar apne jhandon par laṭakwā'e, aur sipāh ko kah diyā, ki "Ab us 'aurat kā jādū tum par asar na karegā." Is tarah par khauf un ke dil se dūr huā, aur dushman par us kī sipāh ghālib ā'ī, aur sab ko tah-i-tegh kiyā.

Usī shahanshāh ke 'ahd men ek fasād Kābul men barpā huā, magar us ne apuī hikmat se jald daf' kar diyā. Agarchi us mulk ko apne qabzah men na rakh sakā, us ko Golkandā aur Bijāpūr ke musakhkhar karne kī barī ārzū thī. Agarchi pādshāhān-i-sābiq aur khud Shāh Aurang-Zeb ne bhī ka'ī bār in shahron ko fath kiyā thā, aur wahān kā lashkar tabāh kar diyā thā, magar phir bhī un ko bahut zor hāsil thā. Chand dar-chand fasādāt aur wāq'āt ke bā'is se yih muhim mulawī rahī. Phir sañ 1682 'Isawī, ya'nī bā'iswen sāl-i-julūs men Aurang-Zeb ne lashkar-i-shāhi ke tūn hisse kar ke taskhīr-i-Dakhan ko rawāna kiye. Awwal Shāh 'Ālam ne, jo Walī-'ahd thā, Golkandā ko jā kar muhāṣarah kiyā : ba'd az-ān bādshāh ne khud ma' tamām fauj ke Bijāpūr par charhā'ī kī. Ākhir-kār qaht ke bā'is se bahūt se sharā'iṭ aur iqār ke ba'd wahān kī ra'āyā ne iṭā'at manzūr kī. Sikandar Ali Shāh, jo wahān ke salāṭīn men picchlā bādshāh thā, muqaiyad huā. Bā'd az-ān shahanshāh ne Golkandā par charhā'ī kī; aur sāt mahīne ke muhāṣarah ke ba'd ka'ī laṛā'iyon men fareb o daghā se us shahr ko fath kiyā; aur us shahr ke Hākim, Abu-l-Hasan, ko bahut zillat aur ruswā'ī se qatl kiyā, jis ke ba'd ko'ī barā hākim bāqī na rahā.

Isī asnā men ek na'ī qaum Hindustān men qūwat pakarne lagī; ya'nī Marhāṭe isī pādshāh ke 'ahd men ghālib hu'e. Yih qaum Gujrāt se Kanārā tak mulk-i-kohī men bastī thī. Un men se ek shakhs, Sīvā Jī, barā ṣāhib-i-haṣalah paidā huā. Sīvā Jī Musalmānon se barā 'inād aur dushmanī rakhtā thā. Is kī wajh yih thī, ki Aurang-Zeb 'Ālamgir ne Hindū'on ko bazor-i-shamshīr Musalmān karnā shurū' kar diyā thā; aur is liye Marhāṭe aur bahut sī qaumen us kī dushman-i-jānī hoga'ī thin; aur yihī amr salṭanat-i-Mughaliyah ke zu'f kā bā'is huā.

Sivā Jī ke ham-īāh pahārī qaumen bahut thīn, jo junūbī kohistān men rahtī haiñ. Yih log shahron ko lūṭe aur rūpiya jam' karte the : is liye Bijāpūr ke Hākim ne un ke muṭī' karne ke wāṣṭe ek lashkar-i-jarrār Afzal Khān ko de kar Sivā Jī par charhā'ī karne ko rawāna kiya. Sivā Jī ne yih kahlā bhejā, ki "Mujhe itā'at manzūr hai : lekin ek mulāqāt āp se tanhā karnā chāhṭā hūñ." Us ne manzūr kiya. Sivā Jī ne apnī sipāh ghāt men chhipā di, aur kah diya, ki "Jis waqt bigul kī āwāz suno, fauran dushman kī fauj par ā parnā." Afzal Khān pandrah hazār ādmīyon ko, jin ko wuh apne sāth lāyā thā, alag kar ke, tanhā maqām-i-muta'aiyan par gaya. Sivā Jī bhī dil men darta huā, char taraf se hoshyār ho kar, ek ek qadam par piche muṛ muṛ kar dekhtā huā, us maqām-i-muta'aiyan par pahunchā. Jāte hī Afzal Khān se bghal-gir huā, aur wahīn Afzal Khān ke peṭ men khanjar mārā. Afzal Khān ne talwār nikālī, aur Sivā Jī ke sar par mārī : magar chūnki us kī pagrī ke niche khod thā, is wāṣṭe wuh bach gaya, aur wār khālī gaya. Us ne dūsra khanjar mārā ; Khān-i-mazkūr kā kām tamām ho gaya. Jab fauj kā sardār mārā gaya, lashkar mutafarriq ho gaya. Is fatḥ se bahut sī lūṭ Marhaṭon ke hāth ā'ī ; aur Sivā Jī kā barā nām huā, aur us ne mulk men bahut dūr tak lūṭ mār machā'ī ; yahān tak ki Bijāpūr ke qarib tak us ne tamām mulk lūṭ liya. Ka'ī da'wah Hākim-i-Bijāpūr ne us par charhā'ī ki, magar wuh maghlūb na huā. Ākhir-kār wuh Šubah'-i-Bihār par mutasarrif ho gaya ; aur pachās hazār piyāde aur sāt hazār sawār rakhne kī ṭāqat us ko hāṣil ho ga'ī. Ba'd az-ūn shahanshāh Aurang-Zeb ne ek fauj ba-sar-kardagi-y-i-Shā'ista Khān rawāna ki. Us ne ka'ī larā'iyān mārīn ; magar ek khāṣṣ mauqa' par ghīr jāne ke sabab se Shā'ista Khān kā beṭā mārā gaya, aur ek ungli us kī bhī kaṭ ga'ī, aur wuh khirki se kūḍte hū'e zakhmī huā. Ba'd az-ūn us ne murāja'at kī darakhwāst kī ; aur chand roz Marhaṭon se larā'ī mauqūf rahī.

Sivā Jī ne fursat pā kar Shahr-i-Sūrat ko lūṭā, aur Marhaṭon kā lashkar yakāyak Sūrat men ghus gaya. Ahl-i-Inglishtān aur Walandez apnī apnī kēṭhiyon ke andar rahe ; aur yih fauj Marhaṭa kī tīn, dīn tak lūṭṭī phirā ki : jawahirāt-i-besh-bahā aur ajnās qīmatī ek karor rūpiya ke un ke hāth ā'e. Aurang Zeb yih ḥāl dekh kar



bahut bar-afrokh̄ta huā, aur ek barī fauj ba-sardāriy-i-Rāja-i-Nāhar us kī tambih ko rawāna kī. Wuh us ko Dihlī meṇ pakar lāyā, aur yih sharḥ kī, ki “Terā i’zāz o ikrām ba-dastūr-i-qadīm kiyā jā’egā.” Magar yahān wuh muqaiyad ho gayā; aur phir ek fareb kī chāl chālā, ya’nī, wuh aur us kā betā, donoṇ do ṭokroṇ meṇ baiṭh ga’e aur un ke ūpar miṭhā’ī rakh kar ḥalwā’ī un ko bāhar lā’e. Is taur par wuh mukhlīṣī pā kar Mathrā pahunchā aur wahān se Jagannāth ko gayā, aur ḥasb-i-dastūr-i-sābiq qazzāqī ikhtiyār kī.

‘Ālam-gīr ne jo us kī gosh-mālī meṇ der kī, is kī do wajheṇ haiṇ. Ek to yih, ki yih muḥsid aisā daghā-kāz aur makkār thā, ki Shāh ‘Ālam-gīr ko us se nafrat ho ga’ī thī. Aur dūsri wajh yih thī, ki us waqt Shāh-i-Irān ke muqālālah kī tajwiz ho rahī thī. Aur is ke Paṭna ke fa’ād ke daf’ karne meṇ bhī pādshāh maṣrūf thā. Is sabab se Sīvā Jī ko fursat jo mili, to us ne tamām aṣā’-i-maghribī ko lūṭ kar tabāh kar diyā, aur Sūrat ko phir dūsri daf’ah ghārat kiyā. Aur agarchi tisrī daf’ah us shahr meṇ dākhl na huā, magar bahut sā rūpiya wuṣūl kar ke le gayā. Qil’ah-i-Sang, jo Bibār meṇ wāqī’ hai, apne qabḡe meṇ kar ke apnā laqab Rāja muqarrar kiyā, aur sikkah bhī apne nām kā jāri kar diyā; aur apne barābar sonā tol kar Barahmanon ko diyā, aur hamesha dān pun karne laga. Is se us kā nām aur ziyādah ho gayā.

Phir Sīvā Jī ne Golkandā par bārah hazār sawāron se ḥamlah kiyā. Wahān kī ra’ūyā ne bahut sā rūpiya de kar shahr ko tārāj hone se bachāyā: aur Sīvā Jī ne shahr-i-mazkūr meṇ shāhāna darbār kiyā, aur Golkandā kā Rāja mashhūr huā. Aur maqām Janchī aur Velor waghairah meṇ apnī fauj muta’aiyan kī, aur Madrās aur Saringāpaṭam tak sab mulk fath kar liyā. Phir Bamba’ī par ḥamlah kiyā, magar ghālib na ā sakā. Gharaḡ-ki tirpan baras kī ‘umr meṇ phephre kī sozish meṇ mubtalā ho kar ba-tārīkh-i-panjum Aprīl san 1680 I’sawī meṇ wafāt pā’ī. Agarchi Shāh Aurang-Zeb us kī wafāt kī khabar sun kar khush huā, magar ‘uṭūfat o karam-i-shāhāna ko kām fārmāyā, aur us kī dil-āwarī aur jur’at kī ta’rif kī.

Sīvā Jī kī wafāt ke ba’d, us kā barā betā, Sambhā Jī, gaddī par baiṭh ke thore dinon tak Mughlon se muqābalah kartā rahā. Ākhir ko pakrā gayā; aur Musalmān hone se inkār kiyā, is liye san 1689

'Iswai men qatl kiya gayā. Aur Aurang-Zeb ne Arākān aur Chātgam ko fath kiya. Us ke ba'd Bijāpūr aur Golkandā fath kar ke Pathānōn' kī baghawāt kā maza un ko chakhāyā; aur Satārā tak, jo Marhātōn kā dāru-l-hukūmat thā, apne qabzāh men lāyā. Lekin Marhātē phir bhī barhte jāte the, aur har taraf lūtte phirte the; aur Aurang-Zeb un ke hāth se bahut tang thā.

Al-qisṣah muhimm-i-Bijāpūr o Dakhan se murājua't ke ba'd Aḥmad Nagar men pahunch ke Aurang-Zeb ne qiyām kiya. 'Umr us kī us zamānah men qarīb 90 sāl ke thī; aur zu'f-i-quwā ba-sabab amrāz-i-muzminah ke mustauli hotā jāta thā. Us zamānah men do larke us ke, ek Aẓam Shāh, mulaqqab ba-'Āli Jāh, wa Muḥammad Kām-Bakhsh, pisar-i-khurd, us ke ham-rāh the. Pādshāh ne in larkeon ko kisi mashwarah ke liye talab kar ke apne sāth rakha thā: magar bahamī nifāq kī khabar pā ke daf'-i-fasād ke liye Muḥammad Kām Bakhsh ko ba-tārīkh-i-17-Zi-Qa'dah, san 1118 Hijrī, khidmat-i-Sūbah-dāri Bijāpūr o Haidar-ābād kī 'utā farmā'i; aur Aẓam Shāh ko fitnah 'o fasād Dakhan kā dūr karne ke wāste Ujain ko rawāna kiya. Siyarul Mutaakhlkhirīn men likhā hai, ki Bādshāh ne Kām Bakhsh ko hukm diya, ki ba-'ujlat-i-tamām Dakhan men pahunchē; aur Aẓam Shāh ko tīn din ba'd us ke rawāna kiya, aur hukm diya, ki pāñch kos se ziyādah kisī din na chale, aur har manzil par do roz maqām kare. Usī mahīne men 28-tārīkh ko pādshāh ne rihlat kī. Tamām lashkar men hangāma barpā huā; bad-ma'āshōn ne dast-i-ghārat-garī darāz kiya; aur ra'āyā kī amn o 'āfiyat men khalal wāqī' huā.

Agarchi Shāh Aurang-Zeb shujā', muttaqī, dānā, aur mu'āmalāt-i-mulkiy o māli o jāngī men az-bas kār-āzmūda thā; magar us ke hīn-i-hayāt hī saltanat ke i-tihkām men farq ā chukā thā. Is amr se ḥairat hotī hai, ki us kī saltanat kā intizām achebhā kyaun na huā. Zāhirā wajh is kī yih ma'lūm hotī hai, ki us kā dil achebhā nahīn thā, aur mulāzim us ke us kī bad-gumānī ke bā'is shauq se khidmat na karte the. 'Uhdah-dāron kī nishat khufyah taḥqīqāt rahtī thī; ek dūse par nigarān rakhā jāta thā. Taham kabhī kisī Pādshāh ke sāth us ke mulāzimon ne itnī daghā na kī, na aisī burī tarāh se khidmat kī, jis tarāh Shāh 'Ālam-gir ke mulāzim us se karte the. Mazhabī mu'āmalāt men wuh barā muta'aṣṣib thā; aur

Hindū'ōn se dili tanaffur aur 'inād-i-qalbī use thā. Is ta'aṣṣub kā natījah yih huā, ki Hindū us se bāghī ho ga'e, aur saltanat-i-Mughaliyah ke istiḥkām men tazalzul ki binā isī wajh se us ke 'ahd men parī. Agar darbār men ko'ī rasm is qism kī jāri hotī, ki us se Hindū'ōn ke mazhab kī pā-bandī pā'ī jā'e, to mauqūf kar dī jāti thī. Magar bā-wujūd ta'aṣṣub ke mazhab ke bāb men wahm is pād-shāh kī ṭabī'at men na thā. Hindū'ōn se to us ko qalbī nafrat thī; magar us ne masjidon wa-ghairah par rūpiya bahut sā ṣarf na kiya. Dīn ke khādimon ko ba-dil nahīn māntā thā, aur faqiron aur darweshon kī sākhta buzurgī se nafrat kartā thā.

Al-qisṣah fauran ba-roz-i-wafāt-i-bādshāh, Zibū-n-Nisā Begam, daktar-i-Aurang-Zeb, ne ba-isti'jāl-i-tamām qāsid Muḥammad A'zam Shāh ke pās rawāna kiya, aur us ḥadīsh kī ittīlā' use kī, aur likhā, ki "Jis qadr jald mumkin ho, yahān pahunch jā'o." Yih khabar suhte hī fauran A'zam Shāh lashkar-i-shāhī men dākhil huā. Chand roz Aurang-Zeb kī wafāt kā gham kiya, aur marāsim-i-mātam-dārī adā kar ke daswīn tārikh-i-Zī-l-Hijjah ko ba-roz-i-Īd-i-Qurbān takht par julūs kiya. Lashkar aur ra'iyat kī istimālat aur khāṭir-dārī karnī shurū' kī. Khazānah, jo lashkar men thā, us par qābiḥ huā. Umarā ko ḥukm diya, ki darbār-i-'āmm men bār-yāb hon. Har ek par us ke rutbah ke muwāfiq nawāzish kī. Āṣuf-d-Daulab Asad Khān Bahādur ba-dastūr 'uhdah-i-wizārat par ma'mūr-huā; aur us kā beṭā, Zu-l-Fiqār Khān, jaisā ki sābiq men sipah-sālār thā, usī ṭarah barqarār rahā.

Muḥammad Mu'azzam, mulaqqab ba-Bahādur Shāh, jo A'zam Shāh se bhī barā thā, us zamānah men sar-ḥadd-i-Īrān par Kābul men thā. Muḥammad Mu'izzu-d-Dīn Jahān-dār Shāh, khālaf-i-akbar-i-Bahādur Shāh, Multān men ba-'uhdah-i-ṣūbah-dārī māmūr thā. Aur Āzimu-sh-Shān, khālaf-i-doum-i-Bahādur Shāh, Bangālā kā Ṣūbah-dār thā. Sultān Mu'azzam shahr-i-Kābul se, aur us kā barā beṭā, 'Āzimu-sh-Shān, Bangālā se 'Ālam-gīr kī shiddat-i-bimārī kā ḥāl sun kar Akbar-ābād kī ṭaraf chale. Aur jab aṣnā-i-rah men Sultān Mu'azzam Bahādur Shāh ne sunā, ki bād-shāh kā intiqāl ho gaya, to us ne awwal tārikh-i-Māh-i-Muḥarram roz Si-shamba san 1119 Hijrī men usī maqām par julūs farmayā, aur Muḥammad A'zam ko likhā, ki "Chūḳi Mulk-i-Dakhan

wasī' hai, li-bāzā tum ko munāsib hai, ki ba-mujīb warzī wālid ke us par iktifā karo, aur Mulk-i-Hind kī saltanat mere sapurd karo. Aur jung se sulh bihtar hotī hai; aur amn se fawā'id be-shumār zāhir hote hain." Azam Shāh ne, chūnki wuh apne bhā'i ko kuchh na samajhtā thā, sirf isī qadr jawāb diyā, ki "Do bādshāh dar iqlīme na gunjand."

Yih sun kar Mu'azzam Shāh ne apne bhā'i par charhā'i kī. Muḥammad Mu'izzu-d-Dīn, Hākim-i-Multān, bahut lashkar aur sāmān-i-farāwān le kar ba-maqām-i-Lāhor apne wālid kī khidmat men hāzīr huā; aur wabān se mil kar donoṅ Akbar-ābād ko ga'e. Aur Bangāla kī taraf se Azimu-sh-Shān bhī, jo fauj-i-jarrār aur bahut sā khazānah aur sāmān le kar āyā thā, Akbar-ābād men pahunchā. Ba'z tawārīkh se sābit hotā hai, ki wuh āth karor rūpiya le kar āyā, aur us ko asnā-i-iśāh men ek karor rūpiya se ziyādah hāth āyā. Us ne Mukhtār Khān, Sūbah-dār-i-Akbar-ābād ko, jo Shāh-zāda-'i-Bedār Bakht kā khusur aur Azam Shāh kā khair-khwāh thā, pakar kar qaid kiya; aur tamām khazānah aur asbāb-i-saltanat par, jo Akbar-ābād men ba-ifrāṭ maujūd thā, qābīz ho gayā. Magar qil'ah us ke hāth is wāste na āyā, ki qil'ah-dār ne yih 'uzr kiya, ki "Shāh 'Ālam-gīr ke tin bete saltanat ke wārīs hain. Abhī tak un men se ko'ī takht par nahīn baiṭhā. Jab ki ek shakhs un men se takht-nishīn ho jā'egā, us waqt yih qil'ah us kā hogā. Bi-l-fī'l main qil'ah kisī ko sapurd nahīn karūngā." Chūnki Azimu sh-Shān ko siwāe qil'ah-gīrī ke aur umūr kā intizām bhī zarūr thā, is liye is 'ahd-shikānī kī taraf us ne kuchh tawajjuh na kī. Us kā bāp, Mu'azzam Shāh, us khazānah ko dekh kar nihāyat khush huā: kyāunki us kī sipāh rūpiya kī qillat aur zurūrat-i-kharch ke sabab se bahut tang thī; aur us ne Khudā kā nihāyat shukr kar ke jam'iyyat-i-khāfir se sipāh kī zurūrat raf' kī.

Azam Shāh ne khabar-i-āmad-i-Bahādur Shāh ba-maqām-i-Āgra sun ke ba-qaṣd-i-muqābalah apne maqām se kūch kiya; aur pahlē Goālyār men ā ke Asad Khān ko ma' digar umarā sāth le kar Dholpūr men āyā. Bahādur Shāh ne us ke Dholpūr jāne kī khabar sun ke khud hī us taraf kūch kiya, aur maqām Jājo ke qarīb qiyām kā qaṣd thā. Hanoz khīme bhī na istāda hu'e the, ki Bedār Bakht, pisar-i-Azam Shāh, ma' chand umarā-i-nāmdār, misl Zu-l-Fiqār

Khān wa-ghairah ke, ā parā. Dakhnī logon ne, jo us ke sāth the, lūt mār shurū' ki, aur khīmōn men āg lagā dī. Logon ne A'zīmū-sh-Shān, Khalaf-i-Bahādur Shāh ko, is dast-darāzī ki khabar kī. Wuh bhī ma' apnī fauj ke musta'idd-i-muqābalah o kār-zār huā : hangāma-'i-jidāl o qital garm huā. Qarib thā, ki Azīmū-sh-Shān kī taraf shikast ho, magar Bahādur Shāh aur Jahān-dār Shāh 'ain mauqī' par kumuk ke liye pahunch ga'e. Ākhir ko Azam Shāh ke donon larke us larā'ī men kām ā'e. Is hādīṣah se Azam Shāh kī nazar men jahān tīra o tār ho gayā, aur us ne qasd kiyā, ki khud bhī, jis tarah ho sake, maidān-i-kār-zār men jā ke mar jā'e. Barī shujā'at aur istiqlāl se fauj men hāthī par sawār lartā rahā, magar chūnki us kī mant qarib thī, aur iqbal tanazzul per thā, bahut ham-rāhī aur rafīq aur bahādur us kī taraf ke māre ga'e. Ākhir ko mukhālīf kī fauj se kisī shakhs kī bandūq kī golī us ke mātھے par lagi; aur wuh fauran hāthī se gir kar jān-ba-Haqq-taslim huā. Bahādur Shāh ne ba'd-i huṣūl-i-fath apne bhā'ī kī lāsh ko dekhā, aur kamāl afsos se use dafn karā ke khud bilā-daghdaghhah takht-i-shāhī par julūs kiyā.

MUHAMMAD MU'AZZAM BAHĀDUR SHĀH BĀDSHĀH.

(San 1707 *Ṭisawī* se san 1712 *Ṭisawī* tak.)

Is bādshāh ne takht par baith ke chāhā, ki us kī qalam-rau men amn o sulh rahe, aur ko'ī kisī par zulm na karne pā'e. Chunānchī isī liye us ne Rājputon se bhī ek iqrār-nāma is mazmūn ka likhwā liyā, ki wuh bādshāh ke tābi'-dār rahenge, aur kuchh fasād aur lūt us ke mulk men na karenge. Agarchī yih itā'at sirf barāe-nām thī, magar phir bhī us ne apne mulk ke achēhche achēhche zar-khez gūbe Marhaṭon kī lūt aur barbādī se bachā'e, aur un ko chauth likh dī, ya'nī, mulk ke khirāj se chauthā'ī āmadani un ko denī manzūr kar lī; tā ki ra'āyā amn se rahe, aur Marhaṭon ke zulm aur lūt mār se āram aur chain hāsil ho. Dūsre mauqī' par is pādshāh ne yih bhī dikhlā diyā, ki main fann-i-jang men bhī mahārat-i-kāmil rakhtā hūn, aur jang karne se 'ārī nahīn hūn : aur yih tāqat is pādshāh ne ba-muqābalah Sikhon ke dikhlā'ī.

Qaum-i-Sikh kā zuhūr Bābar ke waqt men huā thā, aur us waqt men yih nayā firqah mashhūr huā thā. Is firqah kā bānī, Gurū

Nānak, rahm-dil aur 'aql o narm-mizāj admī thā. Us ne apne dil meñ yih mañsūbah bāndhā, ki "Hindustān meñ do qaumon ke bahut admī baste haiñ, Musalmān aur Hindū. Ko'ī 'ibādat aisi tajwiz karnī chāhiye, jis meñ yih donoñ qaumeñ shāmil ho jā'eñ." Chunānchi us ne donoñ mazhaboñ kī kitāboñ se wuh masā'il aur i'tiqādāt, jo donoñ ke nazdik musallam the, chun kar ek apnā Garanth banāyā; aur apne tābi'in ko us ke masā'il sikhā'e, aur waḥdāniyat aur jazā aur sazā kā pānā ṣabit kiyā. Magar jo masā'il kī donoñ firqoñ ke mu'taqad 'alaih the, sirf wuhī us ne liye, tā-ki un se ko'ī inkār na kare. Is liye bahut log jānibain ke us ke mazhab ko mānne lage. Magar chūnki Akbar Pādshāh ke waqt tak yih qaum kuchh ṭāqat na rakhtī thī, aur miṣl Hindū faqīroñ ke thī aur ra'āyā kī mānind rakhtī thī, is wāṣṭe aiyām-i-saltanat-i-Akbar Pādshāh meñ ko'ī un se muta'arriṣ na huā. Magar jab Aurang-Zeb ne jibād par kamar bāndhī, aur un logoñ ko taklif dī, to us waqt se yih qaum khāndān-i-Mughaliyah kī sakht dushman ho ga'ī. Chunānchi Aurang-Zeb ne Tegh Bahādur ko, jo us ke zamānah meñ us qaum kā Gurū thā, pakarwā kar marwā ḍalā. Gurū Gobind Singh ne, jo Gurū Tegh Bahādur kā beṭā thā, apnī taman 'umr is khūn kā 'iwaṣ lene meñ ṣarf kī; aur us kī quām ke log faqīrī tark kar ke sipāhī aur shah-sawār ho ga'e, aur bare diler aur sakht luṭere ho ga'e. Lekin Aurang-Zeb kī kār-āzmūda fauj ke sāmne in kī kyā ḥaqīqat thī? Ek hī larā'ī meñ sab mutafarriq ho ga'e; aur Gurū Gobind Singh ke do beṭe pakre ga'e aur qatl kiye ga'e; aur us ko jalā-waṭan kar diyā gayā. Wuh isī ghamm meñ dīwāna ho kar mar gayā. Magar us ke tābi'in ko yih ḥaṣalah thā, ki mutafarriq ho kar laṭe; aur muddat se Koh-i-Himāla meñ baiṭhe hū'e intizār kar rahe the, ki Aurang-Zeb ke marne kī un ko khabar pahunchī; aur is sabab se un ko Ṣūbajāt-i-shimālī ke qarib āne kā mauqa' milā. Us waqt un kā sardār, Bindā nāmī, ek Sikh thā, jo Gurū Gobind kā chelā aur gaddi-nishīn thā, aur jis ne ākhir ko apnā nām bhī Gurū Gobind Singh rakhā thā. Us ne Sarhind par qabṣah kiya: magar jab us ne sunā, ki Shāh 'Ālam mujh paṣ chārhā'ī kar ke chalā hai, usī waqt Dābar ke Qil'ah meñ, jo Koh-i-Himāla meñ wāqī' hai, bhāg gayā. Bahādur Shāh ne wuh qil'ah bhī le liya: magar Bindā jān bachā kar paharoñ kī rah se bhāg gayā.

Tamām pādshāhān-i-sābiq se Shāh 'Ālam barā rahm-dil aur l'āiq bādshāh guzrā hai. Wuh barā faiyāz thā, aur hamesha muhimmāt-i-'aẓīm ko sar karne kī koshish kartā thā. Agarchi yih pādshāh barā dīndār Musalmān thā, aur bahut khūb Islām kī haqīqat us kī rūḥ aur khūn men paiwasta thī, magar phir bhi us ne apne aiyām-i-ḥukūmat men misl aur pādshāhon ke kisī aur mazhab ke logon ko ba-sabab ta'aṣṣub ke nahīn satāyā. Yih pādshāh shihar-i-Lāhor men san 1712 'Īsawī men faut huā.

#### MU'IZZU-D-DĪN JAHĀN-DĀR SHĀH.

(San 1712 'Īsawī se san 1713 'Īsawī tak.)

Babādur Shāh kī wafāt ke ba'd us ke chāron beṭon men takht ke wāṣṭe bāham larā'ī hū'ī. Magar chūnki barē beṭe, Mu'izzu-d-Dīn, kā ṭaraf-dār Nawwāb Zu-l-Fiqār Khān thā, jo ki us waqt men ek barā ṭāqat-war ra'is thā; is sabab se Mu'izzu-d-Dīn kī fatḥ hū'ī, aur bāqī tīnon beṭon kī shikast hū'ī, aur wuh larā'ī men māre ga'e. Mu'izzu-d-Dīn jab takht par baiṭhā, to us ne apnā laqab Jahān-dār Shāh muqarrar kiya; magar barā nālā'iq pādshāh niklā. Saiyid 'Abdullāh aur Saiyid Husain ne, jo qaum ke Saiyid aur āpas men bhā'ī the, Farrukh Siyar ko, jo Babādur Shāh kā potā thā, pādshāhat ke wāṣṭe barangekhta kiya. Farrukh Siyar ne Mulk-i-Bangālā men 'alam-i-baghāwat baland kar ke Jahāndār Shāh aur Nawwāb Zu-l-Fiqār Khān ko shikast di; aur wuh donon māre ga'e, aur Farrukh Siyar Hindustān kā pādshāh ho gayā. Jahān-dār Shāh ne sirf ek baras bādshāhat kī.

#### FARRUKH SIYAR.

(San 1713 'Īsawī se san 1718 'Īsawī tak.)

Is pādshāh ke waqt men Saiyidon kā barā zor ho gayā thā. Chunānchi Farrukh Siyar ko Saiyid 'Abdullāh aur Saiyid Husain, jinhon ne us ko takht dilwāyā thā, apnā ghulām taṣawwur karte the, aur apnī marẓī ke muwāfiq tamām qalam-rau men aḥkām jāri karwāte the, aur barī quwat pakrī thī. Is pādshāh ke waqt men Bindā nāmī Sikh phir pahār se niche utrā, aur Daryā-i-Aṭak

ke kināre par lūṭṭā phirtā thā, ki fauj-i-shāhī ne us ko shikast di aur mār ḍālā. Saiyid ‘Abdullāh aur Saiyid Ḥusain ki ḥukūmat par aur umarā ko raṣṣk huā, aur āpas meṃ us kā charebā phailā, aur tamām umarā un Saiyidon ki ḥukūmat o ikhtiyār se jalne lage. Aur pādshāh ko bhī un ki tābi'-dārī nāgawār ma'lūm hū'i; aur us ne chāhā ki ab un ki iṭā'at na kare. Magar pādshāh ki yih sāzish un par khul ga'i; is liye unhon ne Bādshāh hī ko mār ḍālā. Phir un Saiyidon ne Aurang-Zeb ke bare pote ko takht par biṭhāyā; magar pāñch mahīne ki ḥukūmat ke ba'd wuh mar gayā. Phir unhon ne us ke bhā'i ko takht par biṭhāyā, jis ne sirf tīn hī mahīne bādshāhat ki. Ba'd azān Raushan Akhtar ko, jo Bahādur Shāh kā potā thā, takht-nishīn kiya; aur us kā laqab Muḥammad Shāh muqarrar kiya gayā.

#### MUHAMMAD SHAH BĀDSHĀH.

(*San 1719 Ṭisawī se san 1748 Ṭisawī tak.*)

Is pādshāh-zāda ne pahlē pahal to bilā-'uzr Saiyidon ki khāṭir-dārī aur 'izzat ba-dastūr-i-qadīm ki, magar ākhīr ko un ke qatl ke darpai huā. Is 'arṣah meṃ in donon bhā'iyon, ya'nī Saiyid ‘Abdullāh aur Saiyid Ḥusain, aur Nizāmu-l-Mulk, Ḥākim-i-Mālwa, meṃ kuchh nā-ittifāqī ho ga'i; aur yih ṣalāḥ ṭhahri, ki pādshāh ma' Saiyid Ḥusain ke sarkash Ḥākim-i-Mālwa par charḥā'i kare. Chūnki Saiyid Ḥusain ke mār ḍālne ke liye sāzish bhī ho chuki thī, is liye us ko rāh meṃ chākar ne mār ḍālā. Saiyid ‘Abdullāh ne yih khabar pā kar ek nayā bādshāh qā'im kar diya, aur apne bachā'o ki sūrat paidā kar li; magar us ko shikast hū'i, aur wuh qaid kiya gayā.

Maḥammad Shāh ne abhī bahut dinon ḥukūmat bhī na ki thī, ki us ki nā-liyāqatī ṣāhir ho ga'i; aur yih daryāft huā, ki wuh bādshāhat ke lā'iq nahīn hai. Kyaunki us ke anzā' aur aṭwār aise kharāb the, ki us ke do bare lā'iq Wazīr, ek Nizāmu-l-Mulk aur dūsrā Sa'adat Ali Khān, us se munḥarif ho ga'e, aur mustaqill ḥākim ho ga'e. Nizāmu-l-mulk ne to apnī ḥukūmat mulk-i-Dakhan meṃ qā'im kar li, aur Sa'adat Ali Khān ne mulk-i-Awadh meṃ. Alāwah bar-īn is nāzūk waqt meṃ Marḥaton ne bhī sar uṭhāyā,



aur mulk ko lūṭ liyā, aur saltanat lene ke wāṣṭe ka'ī larā'iyān laṛe. Chunānchī Ṣūbah'-i-Mālwa aur Gujrāt ko lūṭ kar Āgre ke darwāze tak jā pahunche. Yih hāl dekh kar Sa'adat 'Alī Khān, Nawwāb-i-Awadh, ne kūch kiyā; aur us ne Marhaṭon ko aisā maghlūb kiyā, ki agar Pādshāh us ko na rok detā, to wuh Marhaṭon kā zor bi-l-kull tor detā. Magar Bādshāh ne us ko hukm diyā, ki "Āp Marhaṭon se na laṛen; kyaunki bādshāh apne wazīr-i-khāṣṣ ko ma' sardāron ke un ke muqābalah ke wāṣṭe rawāna karegā." Yih hukm pā kar Sa'adat 'Alī Khān apne dil men zalil ho kar phir gayā. Marhaṭon ko jo furṣat mili, unhon ne Dihlī par hamlah kiyā, aur bahut sā māl lūṭ kar Mālwa ko ohale ga'e; aur siwā is ke tamām qalam-rau men ka'ī jagah lūṭ mār karnī shurū' kar dī.

Ālāwah bar-īn ek aur barā hādīsh Hindustān men wāqī' huā, jis kā hāl bayān-i-āyinda se zābir hogā. Mulk-i-Fāras men jab ki Khāndān-i-Safawi ko zawāl huā, to wahān Afghānon ne hamlah kiyā; aur Iṣfahān ko, jo ki Pāras kā Dāru-s-saltanat thā, chhīn liyā; aur Shāh Husain ko, jo us mulk kā bādshāh thā, qatl kar dālā, aur us kī aulād ko mār dālā. Us kī nasl men se ek larkā, musammā ba-Tahmāsp, bāqī rabā thā. Is larke ne gaderiyon men jā kar panāh lī; unhon ne us kī barī himāyat kī. Un sardāron men se ka'ī shakhṣ khud-ba-khud hākim ho ga'e the: ek sardār kā Nādir nām thā. Us ne apnā nām Tahmāsp Qulī Khān rakhā, aur apnī koshish aur liyāqat se sipah-sālār ho kar phir Iṣfahān Afghānon se le liyā, aur us mulk se unhen nikāl diyā, aur sipah kī riẓā o raghbat se bādshāh ban gayā, aur Nādir Shāh apnā laqab mashhūr kiyā.

Nādir Shāh ne Afghānistān par hamlah kiyā, aur Kābul aur Qandahār ko muṭī' kar ke Hindustān kī hūdūd par ā punchā, Ittifāq se us ke mulk kā ko'ī ādmī Hindustān ko bhāg āyā thā. Nādir Shāh ne ek qāsid rawāna kiyā, aur kahlā bhejā, ki "Yih ādmī mere hawālāh kiyā jā'e." Wuh qāsid jis waqt Jalāl-ābād men pahunchā, to wahān ke bāshindon ne us ko qatl kar dālā; aur is zulm kā inṣāf Muḥammad Shāh, Bādshāh-i-Hind, ne kuchh na kiyā. Is liye Nādir Shāh ne Aṭak Daryā se utar kar aisā jald kūch kiyā, ki chār roz kā rāsta Dihlī tak rah gayā; aur

Muhammad Shāh ko us ke āue kī khabar tak na hū'ī. Gharaz-kī jhat-paṭ fauj taiyār kī ga'ī, aur Nawwāb Sa'adat 'Alī Khān larne ko barhe, par unhoṇ ne shikast-i-fāsh pā'ī, aur asīr hū'e. Tab Nawwāb Sa'adat 'Alī Khān ne ek 'ahd-nāma Nādir Shāh ko is maẓmūn kā likh diyā, ki "Do karor rūpiya le kar apne mulk ko phir jā'īye."

Nādir kā irādah thā kī phir jā'e; magar Muhammad Shāh kī bewuqūfī se Nizāmu-l-Mulk ma'a Muhammad Shāh ke qabẓah meṇ ā gayā. Is liye Nādir Shāh āge barh kar Dihlī meṇ āyā, aur takht-i-Dihlī par baiṭh kar bādshāh-i-Dihlī ho gayā. Do roz tak to barā intizām aur chain rahā: dūsre roz afwāh urī, kī Nādir Shāh marā gayā. Yih khabar sun kar Hindū'oṇ ne us ke ka'ī sipāhī mār dāle. Jab Nādir Shāh ne yih hāl sunā, to us ko aisā ghūssah āyā, kī us ne qatl-i-'amm kā hukm diyā. Rāt ko yih hukm diyā thā; do-pahar tak Dihlī ke kūchoṇ meṇ khūn kī nadiyān bah ga'īn. Tab hukm diyā, kī "Ab qatl mauqūf ho." Usī waqt qatl-i-'amm mauqūf ho gayā; aur painṭis dīn tak shahr ke lūṭne kā hukm jāri rahā. Is 'arṣah meṇ jo lūṭ kā māl jam' huā thā, tīn karor bīs lākh rūpiya kā thā; jis meṇ se qarīb niśf ke to hīre, aur baqī jawāhirāt the. Yih saltanat-i-Mughaliyah kī harṣoṇ kī kamā'ī thī. Nādir Shāh ne Hindustān ko apne qabẓah meṇ rakhne kī kuchh khwāhish na kī; balki Kābul aur Qandahār aur un sūbajāt ko, jo Daryā-i-Aṭak ke maghrib kī taraf wāqī' haiṇ apne qabẓah meṇ rakhnā munāsib jān kar Muhammad Shāh ko phir takht par biṭhā kar san 1739 'Isawī meṇ Hindustān se kūch kiyā; aur apnī fauj kā ko'ī sipāhī Hind meṇ nā rakhā. Hindustān se kūch karne kī tārīkh se āṭh baras ke ba'd Nādir Shāh ba-maqām-i-Mashhad Khurāsān meṇ marā gayā; aur us kā mulk ka'ī ḥiṣṣoṇ meṇ munqasim ho gayā.

Aḥmad Abdālī, jo qaum kā Afghān aur ek afsar afsarān-i-Nādir Shāh se thā, yih hāl dekh kar ghar ko gayā; aur wahan jā kar apne shahr kā bādshāh ban baiṭhā. Jab us ne dekhā, kī merā mulk be-khalal mere qabẓah meṇ rahegā, aur kuchh andeṣha nahīn hai, us waqt us ko bbi Nādir Shāh kī muhimmāt kā lalach āyā. Chunānchī san 1747 'Isawī meṇ us ne Daryā-i-Aṭak se 'ubūr'kar ke Shahr-i-Sarhind ko ā kar ghārat kiyā; aur wazīr ko,

jo us se larne ko gayā thā, shikast dī, aur wuh larā'ī men mārā bhī gayā. Is waqī'ah ke ba'd Muḥammad Shāh Bādshāh mar gayā; aur us kā betā, Aḥmad Shāh, bajāe us ke takht par baiṭhā.

AḤMAD SHĀH BĀDShĀH.

(*San 1748 Ṭsawī se san 1754 Ṭsawī tak.*)

Is pādshāh ke 'ahd men darbār men barā hangāma aur fasād rahā kartā thā; kyūnki Aḥmad Shāh Bādshāh aur us ke wazrī, Ṣafdar Jang, men khāngī ranjish hamesha chali jāti thī. Chūnki Ṣafdar Jang Wazir ne ek Khawāja-'i shābī ko, jis ko Bādshāh bahut chāhtā thā, mār dālā thā, is liye Bādshāh us se bahut nārāz thā. Chunānchi us ne Amīru-l-umarā, Ghāziyu-d-Dīn Khān, kī ifānat se, jo Nizāmu-l-Mulk kā potā thā, Ṣafdar Jang ko apne darbār se nikalwā diyā, aur Ghāziyu-d-Dīn ko wizārat dī. Ghāziyu-d-Dīn pahle wazir se bhī badtar niklā: is liye Pādshāh ne us ke nikalwāne kī bhī tajwiz kī. Magar Ghāziyu-d-Dīn ne Hulkar Malhār Marhātā kī madad se Aḥmad Shāh ko pakar kar qaid kiyā, aur us kī ānkhēn nikalwā dālīn; aur Jahāndār Shāh ke ek betē ko, jis kā khitāb 'Ālam-gīr-i-Ṣānī mashhūr hai, takht par biṭhā diyā.

'ĀLAM-GĪR-I-ṢĀNĪ.

(*San 1754 Ṭsawī se san 1759 Ṭsawī tak.*)

Is pādshāh ke waqt men tamām qalam-rau men tahlukah par gayā. Afghānoṅ ne Panjāb par ḥamlah kar ke Multān aur Lāhor par qabḥah kar liyā; aur usī nawāḥ men Sikhōṅ kī bhī tāqat aur ta'dād barhni shurū' ho ga'ī; aur Jātoṅ aur Roheloṅ ne jā-ba-jā lūt machā dī; aur Marhāte bhī dāka mārte phirte the, yahān tak kī Rohelkhand ke shahr bhī unhoṅ ne lūt liye. Aise waqt men Ghāziyu-d-Dīn ne phir Panjāb ke fath karne kā irādah kiyā. Chunānchi ek 'aurat ko, jo qaum kī Paṭhānī thī, aur jis ko Aḥmad Shāh Abdālī Lāhor kī ḥukūmat sapurd kar gayā thā, Ghāziyu-d-Dīn ne giriftār kar liyā.

Yih khabar sun kar, Aḥmad Shāh Abdālī phir tīsri daf'ah Hindustān par chārḥ kar āyā, aur barā lashkar lāyā; aur Dihli men

pahunch kar san 1756 'Isawī men us shahr ko aisā ghārat aur barbād kiyā, jaisā ki Nādir Shāh ke bāth se san 1739 'Isawī men huā thā. 'Ālam-gīr-i-Šānī ne Aḥmad Shāh Abdālī se darkhwāst ki, ki "Ko'ī shakhṣ ba-ṭaur muḥāfiẓ ke apnī ṭaraf se yahan māmūr kijiye; tā-ki Ghāziyu-d-Dīn, jo merā wazīr hai, ap ke jāne ke ba'd mujh se bad-sulūkī se na pesh ā'e." Chunānchī us ne 'Ālam-gīr ki ḥifāẓat ke wāṣṭe qaum-i-Rohela kā ek sardār Dihlī men muta'aiyan kar diyā; tā-ki wuh Ghāziyu-d-Dīn ki qūwat ko barhne na de. Ghāziyu-u-Dīn ne Aḥmad Shāh Abdālī ke jāne ke ba'd Marhaṭon ki madad se fauran pādshāh ko bhī pakar liyā, aur Dāru-s-salṭanat par bhī apnā qabẓah kar liyā, aur pādshāh ko mār kar Jamnā men us ki lāsh phenk di. Magar us waqt us ko apnī jān bachānī dushmanon se mushkil hū'ī, aur har ek ṭaraf kā sitnah o fasād na raf' kar sakā; is liye Jāṭon men jā kar us ne panāh li. Ab Afghānon aur Marhaṭon men larā'ī hū'ī. Marhaṭon ne jab dekbā, ki maidān khālī hai, aur un kā ko'ī ḥarīf nahīn dikhā'ī detā, to unhon ne mulk kā da'wā kiyā, aur chāhā, ki ham Hindustān ke mālīk ban jā'eṃ. Chanānchī Sikhon se madad le kar Dihlī aur Āgra aur Multān aur Lāhor unhon ne fath kar liye, aur Afghānon ko mār kar Daryā-i-Aṭak ke pār utār diyā.

Yih khabar sunte hī chauthī daf'ah Aḥmad Abdālī barā lashkar le kar Hindustān par ḥamlah-āwar huā; aur Pānipat par ek jaug-i-'aẓīm Aḥmad Shāh Abdālī aur Marhaṭon se hū'ī, jis men Marhaṭon ne shikast pā'ī. Assī hazār ādmī Marhaṭon kā mārā gayā; aur Dattā Sindhiyā, un kā Sīpah Sālār, maidān-i-jang men kām āyā. Afghānon ki ṭaraf Shujā'u-d-Daulah, Šubah-dār-i-Awadh, aur Hāfiẓ Raḥmat Khān aur Dūnde Khān Robela the. Aur dūsri larā'ī Sikandara ke qarīb Hulkar se hū'ī. Us ne aisī tabāhī aur muṣibat uṭhā'ī, ki us maidān se chand ham-rāhiyon ke sāth wuh khud to bach kar bhāg gayā; magar sab fauj maidān men kām ā'ī. Abhī yih sāl pūrā na hone pāyā thā, ki Marhaṭon ne ek fauj ek lākh chālīs hazār ādmī ki jam' kī; aur is fauj kā sardār Shīu Deo Rāi Marhaṭā, Peshwā kā bhatija thā. Us ne Wazīr se mil kar aur Jāṭon ko ham-rāh le kar Dihlī ki ṭaraf kūch kiyā. Aḥmad Shāh Abdālī Daryā-i-Jamnā se pār ho kar dushman ke muqabalāh ko gayā. Agarchi us ki fauj dushman ki fauj ke sāmpne kuchh

ḥaqīqat na rakhtī thī, magar Marḥaṭon ko ḥauṣalah na huā, ki us ke sāmne ā'eṇ; magar Pānīpat ke morchoṇ par unhoṇ ne ā kar apne ta'īn chhupāyā. Aḥmad Abdālī ne un kā ta'āqub kiyā, magar kuchh fā'idah na huā. Phir maidān kī larā'ī hū'ī: Marḥaṭon kī fauj mutafarriq ho ga'ī; aur bā'is hazār qaidī aur pachās hazār ghore aur bahut māl ghanīmat kā Aḥmad Abdālī ke bāth āyā. Nawīn mās Janvarī san 1761 'Īsawī ko Aḥmad Shāh Abdālī ne Dihlī ko chhoṛ kar wilāyat ko kūch kiyā; aur 'Ālam-gīr-i-Ṣānī ke bare beṭe 'Ālī Gauhar ko, jis kā laqab Shāh 'Ālam thā, aur jis ko Ghāziyu-d-Dīn ne 'Ālam-gīr-i-Ṣānī ke mār dālne ke waqt san 1759 'Īsawī meṇ takht par biṭhā diyā thā, barāe nām bādshāh kar diyā.

#### SHĀH 'ĀLAM-I-ṢĀNĪ.

(San 1759 'Īsawī se san 1806 'Īsawī tak.)

Shāh 'Ālam Marḥaṭon kī madad se phir Dihlī par qābiṣ huā. Lekin thore roz ke ba'd ek Rohela, Ghulām Qādir nāmī, ne Bādshāh kī āpkheṇ nikalwā dālī. Aur jab Sindhiyā, Marḥaṭon ke Sardār, ne Dihlī ko fath kiyā, to us ne Shāh 'Ālam ko qaid meṇ rakhā: aur jab kī san 1803 'Īsawī meṇ Dihlī Angrezon ke qabṣah meṇ ā'ī, to unhoṇ ne ek lākh rūpiya māhwārī tankhwāh Bādshāh kī muqarrar kar dī. Chunāneḥi us tarīkh se is khāndān meṇ pādshāhoṇ kī jān bachī; ra'āyā ko amn milā; mulk kī taraqqī hū'ī; ābādī barh ga'ī; 'ilm Hindustān meṇ phail gayā; sarkeṇ durust ho ga'ī. Marḥaṭon aur Jāṭon aur Rohelon aur sab dushmanon kī sarkobī ho ga'ī. Sarkār Kampanī Bahādur kī 'amal-dārī ke khatm hone aur Janāb Malikah-'i-Mu'azzamah Vicṭoriyā, dāma mulkubā, kī ḥukūmat ke shurū' hone tak, ya'nī san 1857 'Īsawī tak, gaddī-nishīnān-i-Mughaliyah kī ek lākh rūpiya māhwār tankhwāh be khalish jāri rahī. Shāh 'Ālam kull paṇṭālīs baras takht par ba-taur yādgār-i-shāhān-i-sābiq ke rahā.

#### AKBAR SHĀH-I-ṢĀNĪ.

(San 1806 'Īsawī se san 1837 'Īsawī tak.)

Us kā nām Abu-n-Naṣr Mu'īnu-d-Dīn Akbar Shāh ḥaj. Yih beṭa Shāh 'Ālam-i-ṣānī kā thā. Tārīkh 7, Mās-i-Ramāṣān, san

1173 Hijrī, muṭābiq-i-san 1759 'Īsawī ko, shab-i-Chār-Shamba ko paidā huā ; aur apne bāp, Shāh 'Ālam kī wafāt ke ba'd, 7, Ramazān, san 1221 Hijrī, muṭābiq-i-san 1806 'Īsawī, roz Chār-Shamba ko takht-nishīn huā. Iktis baras, nau mahīne, ikkis yaum, us ne qil'ah kī ḥukūmat kī ; aur ba-roz-i Jumū'ah, 28, Jumāda-s-sānī, san 1253 Hijrī, muṭābiq-i-san 1830 'Īsawī ko wafāt pā'ī. Muddat -i-'umr is bādshāh kī 79 sāl, das māh ikkis yaum hai. Wafāt ke ba'd Bastī Qutub Shāhib, wāqī'-i-junūb-i-Dihli men madfūn huā. Agarchi is bādshāh ke waqt men Kampanī Bahādur kī ḥukūmat Panjāb ke ḥudūd tak ba-khūbī ho ga'ī thī, aur Fauj-dārī aur Dīwānī Shāhibān-i-Angrez Bahādur ke sapurd thī, illā muqaddamāt bāshindagān-i-qil'ah ke pādshāh khud faisal kartā thā, aur laqab-i-pādshāhī aur 'amlah-'i-shāhī aur chatar aur takht aur qil'ah bādastūr-i-sābiq us ke qabzāh men rahā.

SIRĀJU-D-DĪN ABŪ ZAFAR BAHĀDUR SHĀH.

(San 1837 'Īsawī se san 1857 'Īsawī tak.)

Yih ākhīr pādshāh Khāndān-i-Tīmūrī kā hai, jis par is khāndān kā nām bhī tamām ho gayā. San 1189 Hijrī men wuh paidā huā thā ; us kī tārikh-i-paidā'igh lafz-i-*Abū Zafar* se nikaltī hai. Us ko shī'r-go'ī men bahut dakhil thā : chunānchi us ke akṣar shī'r Hindustān men har ek ādmī kī zabān par jāri hai ; mahfil-i-raqs-o-sarod men us kī ghazlen akṣar ga'ī jāti hai ; aur mahfil-i-hāl-o-qāl-i-Šūfīyān men us ke shī'ron par riqqat āti hai. Is bādshāh kī tamām 'umr kutub-i-tasawwuf ke muṭāla'ah aur shī'r kahne aur 'aiyāshī men ṣarf hū'ī. Yih bādshāh 'ilm-i-mūsīqī men bhī mahārat-i-kāmil rakhtā thā, aur apne do buzurgon kī mānind barāe nām bādshāh thā.

Sarkār Kampanī ne is khāndān kā nām qā'im rakhne ko ka'ī tajwīzen bahut khūb kī thi. Ek tajwīz yih thī, ki is khāndān men barā beṭā gaddī-nishīn hotā rahe, aur shāhī āmadānī ke 'alāwah ek lākh rūpiya māhwārī tankhwāh bhī barābar jāri rakhi jā'e. Balki tajwīz thī, ki chūnki Bādshāh qarḡ-dār hai, sawā lākh rūpiya us ko māhwārī de kar qarḡ us kā adā kiyā jā'e, aur

Bādshāh-zādon ko 'ilm kī ta'lim kī jā'e: chunānchi ek Madrasah-i-Shāhi qā'im hone walā thā. Qismat ne jo gardish khā'i, to fauj-i-Angrezi ba-sabab takrār ke, jo un ke afsaron se kārtūs kāṭne kī bābat wuqū' meṇ ā'i, jis kā hāl mufaṣṣal khātimah-i-hukumat-i-Kampani Bahādur meṇ likhūngā, munharif ho kar is Bādshāh ke pās jā kar jam' hū'i. Angrezon ne Dihli kā muḥāsarāh kar liyā; kā'i laṛā'iyān hū'īṇ: anjām-i-kār sipāh-i-muṣsid kuchh mārī ga'i, kuchh bhāg ga'i. Is liye is Bādshāh ko Angrezon ne Mulk-i-Barhmā meṇ le jā kar muqaiyad rakhā. Us kī biwi, Zinat Maḥall, aur Mirzā Jawān Bakht, us kā chhoṭā beṭā, bhī us ke hamrāh thā. Yih Bādshāh san 1279 Hijrī, muṭābiq-i-tārīkh 11, Nawambar san 1862 'Īsawī ko fālij kī bimāri se Rangūn meṇ faut huā. Is par khāndan-i-Timūrī tamām huā. Yih tārīkh kisi shā'ir ne is Bādshāh ke julūs aur wafāt kī kahī hai : —

*Tārīkh-i-julūs o wafāt-i-Sirāju-d-Dīn Abū Zafar Bādshāh.*

Sirāj-i-Dīn Bū Zafar musāfir wuh sū'e Jannat huā rawāna,

Ki jis ke bā'is ma'e khushī se chhilak rahā thā ayāgh-i-Dihli.

"Chirāgh-i-Dihli" julūs kā sāl hai; so ab bhī muṭābiq us ke  
1253 A. H.

Sarosh-i-ghaibī ne sāl-i-riḥlat kahā, "Bujhā hai Chirāgh-i-Dihli."  
1279 A. H.

THE END.









